


綏寇紀略

附補遺

二





綏寇紀略

附補遺

(二)

吳偉業輯

綏寇紀略卷七

開縣敗

楊嗣昌，嘗德武陵人也。與父鶴先後舉進士。天啓中，逆璫魏忠賢、兵部尙書崔呈秀用事，鶴以南贛巡撫放爲民。嗣昌爲戶部郎移病，父子皆齟齬歸。楚人多稱之。烈皇帝立，僂大愨，大學士黃立極在內閣，首條奏閣舊惡中慚。上新卽位，以輔弼大臣有翊戴功，優容之。閔鳴泰爲兵部尙書，於崔魏交至深，亦得弗坐。六卿皆閣黨也。天子新簡用閣員，華亭錢龍錫等六人，大半起謫籍，未至。在直者倡執中之說以相持。自劉鴻訓從長山近先入，爲上分別黑白奏之，異論者稍稍詘。天子思任老成，手詔召蒲州韓爌爲首輔，而國事始定。鳴泰以人言罷，改刑部尙書。王在晉代之。在晉太倉人，有當關舊勞。鴻訓力稱其籌邊練職，爲人醇謹無他略。時楊鶴以左僉都御史召用，而嗣昌病良已，入朝。定州知州陳新甲亦由遷官，同日廷見。崇禎元年五月之二十九日也。鴻訓尋以他事，與在晉皆被譴，而韓爌柄國，大起廢籍，以工部左侍郎王洽爲兵部尙書。洽，臨邑人，由忤璫召拜，舉朝以爲賢。狀未許以知兵也。當崔魏時，詞臣最著節者，江南錢謙益、姚希孟、文震孟、江西姜曰廣等十數人，旣湔祓，隱狀負公輔望，而史館倪元璐、黃道周有重名。天子夢想賢傑，再以資地推擇閣員，臺諫舉謙益居首，禮侍郎周延儒、尙書溫體仁皆不得與。延儒緣召對承

恩眷體仁銳身出。借科場事。訐謙益。目爲黨魁。排去之。延儒體仁相繼晉用。其間邊人不戒。兵尙書治有罪。下獄死。左侍郎申用懋攝部務。拜爲眞。事定。自劾免。方倉卒時。戶部郎梁廷棟一言當上意。驟用以督撫薊遼。故總督張鳳翼官簿。遠出廷棟右。尋召之。俾襲其後。守關門。而令廷棟入。代用懋爲兵部尙書。時流寇已大起西北。楊鶴改左副都御史。總督陝西三邊。不能討賊。乃主撫。廷棟鄢陵人。目偏盲。伉健有智謀。在部與職方李繼貞論賊事。調度頗合。卒不能有所戡定。他陰事蜚語聞。上怒其懷詐負恩。遂落職。而楊鶴撫賊不效。致於理。嗣昌已從關內道巡撫永平矣。席橐請身代父。上爲其子故。翫法減死論。鶴請室疏謝。略曰。朝廷未嘗講究兵食。徒以重任責二三疆吏。號爲知兵。臣本書生。力過其任。故顛蹶至此。今羣臣又謬舉臣之子嗣昌。鎖鑰關門。臣旣不効於前。子豈能效於後。兵者危事。非一人智力所能辦也。大司馬虛位難其人。江西熊明遇。在熹廟初爲九卿。至是由南刑部尙書改任。以秦督承疇所請。剿寇餉不覆。奏召詰責。明遇惶恐不能對。罷之。次第用張鳳翼。鳳翼選悞不學。顧老吏頗熟諸將姓名。善候伺人主意。得爲兵部尙書最久。當是時。流寇已踰畿輔。擾中原。且上犯山陵。天下洶洶。指目二三執政。延儒早謝事。體仁總機務爲首臣。在上前遇兵事。不敢可否。上嘗有所訪逮。輒推謝曰。臣夙以文墨待罪。禁林上不知其駑下擢。至此盜賊日益衆。誠萬死不足塞責。願臣愚無知。自審稟擬勿欺耳。兵食大計。獨上神聖裁決。而鳳翼旣當職。無可避。得楚豫急奏。輒頓首省戶下曰。臣曉夜治文書。調兵食。非不盡狗馬力。如將士不

用命何。惟上死生之。天子輒哀憐。以爲此歸誠無私且久。故不忍廢。狀亦不甚重也。初上之任相也。慮己禮遇之甚。自劉鴻訓錢龍錫相繼得罪。不能無疑。而體仁伺間用朋黨中之。又自以排廷論。取中旨得相。日夜患詹翰諸臣之偪己。其才且賢者。必害之以事。抑勿使前。取癡篤謹愿無能之人布腹心。引與同列。苟以充位塞爭。且假之形已長而固寵。故體仁用事八年。他相非病免物故。卽以他事去職。上寢厭薄館閣侍從。謂儒緩不習事。而祖宗朝內外得竝相。於是外寮爭以他途進矣。淄川張至發者。以兵侍郎拜爲特恩。木彊無所長。體仁窺上意于將謁歸。進其黨薛國觀。由大常少卿入國觀。狼鷲而陰沉不及體仁。又不熟掌故。每調旨。瞪目不能下筆。堂吏皆非笑之。上又疑京朝官起家清要。不更吏職。惟封疆勞苦之臣。練習機宜。間察諸督撫。獨楊嗣昌在宣大可用。方以艱歸。卽家拜兵部尙書。且倚以相。非它司馬比也。嗣昌爲人。不如其父鶴。鶴得罪由秦按臣興化吳牲劾奏。牲本同年生。鶴出獄無怨言。曰。吾儒生不嫻軍旅。興化以國事劾我。何嫌乎。嗣昌自緣邊臣進。於朝士無纖介。特以父喪奪情。憂天下嫻己。又上倚之辦寇。一不稱而廷臣用故事責我。且無計自全。以此左郤右顧。積猜多忌。識者竊憂之。曰。此復爲體仁矣。當體仁之用事也。伎而專。臺諫有異己攻之者。內銜次骨。所罷斥甚衆。獨慈谿馮元飈得爲都給事中。而東陽張國維撫江南。數以事觸體仁。賴上知之。故弗斥。此兩人同鄉里。時浙東稱爲多賢。諸詞臣惟文震孟至相。值體仁在告日。上出不意驟命之。已而顯爲難。不兩月罷。

震孟初入直。體仁有票擬必請正。有改必從。震孟曰。溫公虛懷乃爾。何云奸。同官何吾驕。

曰是人伏機甚深何可信越數日體仁知其疎凡震孟稟擬徑抹去不用震孟拍案大呼以諸疏擲體仁體仁亦不顧未幾許都諫譽卿被謝冢宰陞糾擬旨爲民震孟力爭之不得日言官以革職爲榮體仁持其語入奏并曰廣希孟元璐皆爲體仁所中傷而黃道周數廢數起官至少詹事潔廉無比於書無所不閱天下望以爲相道周性忠直好面折廷諍時相多舒緩養望浮沉取大位道周羞之不忍爲天子一日開文華延詞臣問以用人理財策道周據古今條對甚切上亦名重之呼先生者三知其博洽故以見聞相折辨它翰林楊廷麟楊士聰等多所指陳其大者論考選考選者賢守令以材望咨訪備近臣而吏尙書田唯嘉欲從之取賅不得則先期撮其尤者補部主事名爲移陞衆不服於上前發之且及他奸私并相至發交關狀上乃命在召者得一切賜考拔張縉彥等授翰林臺諫官縉彥爲秦中清澗三原兩縣令清澗僻處賊巢環而攻之者百萬率鄉勇死守幸不沒調三原壯邑扞禦仍有功移陞已歷司農郎上自識而用之嗣昌之爲中樞也陳新甲用知兵顯亦以遭喪起復爲宣大總督道周儒者念國家卽無人奈何數以墨衰從政貽後世笑慨然思論之仰視熒惑逆行太白晝見嗣昌所籌寇事滋失策顯謂馮元颺等天象如此此人必誤國宜率同列固爭道周前召對時補牘被譴訶幾不免矣中夜讀書至宋臣真德秀傳拊几歎曰古人立朝一月三十六封事而吾儕默然已乎每見詔書有不便輒屏人削牘不起草手自書之有一字更定曰此誠不足以格主屏弗奏其欲糾嗣昌也爲數劄子論邊事寇事其一言奪情并論新甲未上也上傳部院舉閣員時至發行惟嘉逐吏尙書商周祚初視事諸君子浸向用馮元颺謂枚

卜無出道周上者。獨苦其好言事。疏入或觸忤。卽推且弗用。道周重國事。於己進退固弗恤。元颺等遣所知日守之。曰公得政。所挽回者大。奈何必以口舌爭。卽輕宰相。獨不爲天下計乎。以此久不發。上初用詞。臣言去一相一家宰。諸大僚多側目。比論相。上意默有所屬。故再三駁。廷推以觀之。周祚素所無執持。乃盡籍坊局之資。輕者名以上。其同官先達中。摘瑕疵爭同異語。浸尋至上前。上震怒。切責周祚濫狗。而自用嗣昌等五人入閣。皆卿貳官。五人者自嗣昌方達年外。程國祥素以清節著。爲司農。倡間架之說。請預不能與體仁比。范伏粹奉佛最謹。晨夕跪拜不輟。此三人皆無所表見。惟方逢年係翰林。亦以禮侍郎拜云。上素知道周學行。謂其性偏執。非救時相。故後之道周亦非以不相少有缺望。特恨爲同列所誤。不早擊嗣昌。竟就初藁爲三疏以進。上之相嗣昌。疑非朝士意。道周又衆所推。而出身強諫。憚其詞直。欲以理折服。召諭羣臣曰。嗣昌久歷巖疆。守制已踰小祥。奪情原有舊例。黃道周彼時不言。今因簡入內閣。借名妄詆。朕聞無所爲而爲者。謂之天理有所爲而爲者。謂之人欲。道周已不見用。而出此。當與卿等共議之。公卿見上變色。皆戰栗流汗。嗣昌陽引救。徐出微言挑激。道周頓首力爭。終無撓詞。旣對畢。叩頭入班。上目而斥之曰。佞口。道周再入至上前。曰請爲上分別忠佞。反覆數百言。上益怒。緹校在殿下。惴惴將有所收縛。上終以儒者優容之。奪三官。得江西幕僚以去。已而編修劉同升、趙士春、都給事中何楷皆以爭奪情謫官。南九卿有公奏。上怒主藁者。兵尙書范景文削其籍。南御史成勇、金吾騎逮訊。而嗣昌權益重。它相不敢與侔矣。嗣昌旣相之次年。

夏。上以蜀撫傅宗龍爲兵部尙書。還嗣昌於內閣。嗣昌幸於解機務。幾得以功名終。未浹日。而張獻忠反。嗣昌自念上數貫我罪。穀城事。熊文燦又其所薦。再負國。討賊之任將安歸。上亦漸悟嗣昌之麓疎。言過其實。終不足仗。願已撓羣議而用之。庶一出行師。邀萬一功。有以謝天下。嗣昌知之。乃自表請行。十二年八月二十八日。上諭嗣昌曰。間者邊陲不靖。卿雖盡瘁。不免爲法受罰。朕比因優敍。還卿前所奪官。卿引愆自貶。堅請再三。所執甚正。難相聽許。朕聞春秋之義。以功覆過。方當降徒干紀。西征失律。以卿才識。戡定不難。可馳傳往代出郊之事。不復內。御特賜尙方劍。以便宜誅賞。卿其芟剪螫賊。早奏膚功。詩不云乎。無德不報。賊平振旅。朕且加殊錫焉。晝漏上二刻。被詔日晡時。嗣昌上書請對。翼日。上乃召閣臣薛國觀等。吏尙書謝陞。戶尙書李待問。兵尙書傅宗龍來平臺。嗣昌避與閣臣齒。需再命而後入。見畢。上問待問曰。楚軍及豫皖二撫告缺餉。卿部前已發乎。方專征度。何道而足。待問曰。督餉臣伯鯨。軍興是其專責。微臣關掌文書而已。今輔臣係皇上特遣。宜就臣部題留款項設處。開支多寡。伏候進止。上問宗龍曰。張獻忠舍豫楚而寇秦。三路見兵幾何人。宗龍曰。臣至部閱實。其數近十萬人矣。上問陞曰。嗣昌行以何銜。陞曰。臣以爲宜用督師輔臣。上召嗣昌前曰。朕以寇亂。煩卿遠行。朕不忍卿去左右。嗣昌曰。微臣實不稱職。致方內多倣。仰塵宵旰。咎皆在臣。蒙皇上又貫其罪而用之。臣敢不竭其駑駘之力。繼之以死。上曰。卿行軍以何者爲先。嗣昌曰。兵難險度。容臣馳至襄陽。條方略上之。嗣昌又請合剿與練二餉爲一。用緩急爲

期會上恐因變制滋濡滯不可。嗣昌因言戶部爲京運不足，借剿之半以充。今派練餉及補缺額餉共五百萬，經制有餘，可還舊額資軍費。上從之。嗣昌曰：兵事煩倚監軍以辦寇，今其人多不可用。上曰：卿自擇可者。嗣昌曰：若張克儉、宋一鶴皆其選也。嗣昌曰：賊勢初散，今合先後不同。張伯鯨遠駐池州，轉輸遼緩。戶部咨均糧溢地二餉，一半解京，一半解剿。剿餉侍郎張伯鯨奏爲遵均溢半留之旨，酌派督理治數目。事內晉蜀二省應於秦撫項下解還，戶部外實半留銀一百一十三萬二千三百八十六兩。若以崇禎十年額派二萬八千兩計之，僅得十分之四，尙有皖、鄖二撫共十八萬有奇不與焉。臣遵紹舊款，各以四分爲率，于理臣項下派三十萬兩，秦督派十四萬兩，楚撫派十萬兩，豫撫派十六萬七千六百兩，皖撫衙門創設別無支持，不得不仍派一萬兩，鄖撫以特請奉旨，照原數仍派八萬兩，沅撫二萬八千三百八十五兩，先奉部派已定，不敢增減者也。以上共派一百二十四萬六千七百七十五兩，內不敷銀十一萬三千六百八十九兩。臣撥事例銀宜移之楚豫用兵地，其江南用一司官催運便。左良玉雖敗，其人有大將才，兵亦可用。當進爲平賊將軍，上命皆允行。嗣昌曰：臣聞君言不宿於家，臣朝受命，夕當上道。從丁廐馬，衣裝鎧仗，惟所司早給，便臣辦嚴。上曰：卿能如此，朕復何憂。大悅。諸臣叩頭退，駕還宮，漏下二鼓矣。越日上賜嗣昌精鏤百大紅紵絲表裏四斗，牛衣一襲，賞功銀四萬，銀牌一千五百，紵絲緋絹各五百，佩以督師輔臣印，撥剿餉五十萬予之。九月六日，嗣昌陛辭，先期光祿寺設饗於平臺之寢殿，北面重席，上親爲之起，手揚罍酌醴，命左右宥以飫之者三，樂作一。小黃門奉黃封立於旁發之，御製七言詩一章。御製詩鹽梅令暫作干城上將威嚴細柳營，一掃寇氛從此靖。還期教養遂生民。上笑曰：朕爲卿贈行，其詩比之於周方叔、漢亞夫。嗣昌跪而誦之，拜且泣，晏畢。上有造膝語，中官皆屏於東廂，見上誣諉者再。嗣昌頓首曰：必死。既而命撤饗具以賜之，曰：已令有司祖。

於國門。朕需卿早飲至。爲勞旋之宴。

九月初一日。楊嗣昌奏。臣昨奏。剿餉練餉。當相乘除。恐徵解不前。必至兩誤。皇上面諭。剿餉自練餉。頭緒原各分明。再有更

張恐生遲滯。欽此。但戶部前因缺餉。議將剿餉一半留用。一半解至京中。其後議派練餉四百餘萬兩。又派補缺額餉一百餘萬。且欽遣科臣守催。則京餉有餘。不宜分剿餉明矣。乞救戶科勿分剿餉。爲蕩寇第一急務。

既行十五日。於磁州疏謝恩。十九日。過河抵汴。檄有司諭上意。以救民水火。二十九日。至襄陽。入文

燦軍中。先是左良玉羅漢山之敗。獻忠謀入秦。秦督鄭崇儉率副將張應元、汪之鳳、賀人龍、李國奇、扼興

安。賊犯蜀興山、太平等縣。屯於永寧關、大巴山、分水嶺。秦蜀之交境。又從義溪走馬家洞、沙子嶺。以闕合

江。從鹿耳坡、高竹坪。以窺大寧。蜀撫邵捷春遣其兵二千人。同副將王之綸、方國安、分地拒險。八月。官軍

敗績於湯家壩。王之綸力戰不支。都司何口明沒於陣。裨校多傷。九月。方國安所部將岳宗文、譚鈺、破賊

於三尖峰。又破之於黑水河。張獻忠羅汝材分其軍。自白水之碧魚口入秦。合江之蕭家坡入楚。文燦待

罪襄陽兩月。自審禍及羣帥。詭稱治父聽刑。不受發召。賊狂走巴山庸部。文燦不知所出。張縉、彥奏。以爲

一譁再譁。駐師興安。茫無進取。總兵陳洪範。誤信五營貼兵。被創。今道。嗣昌既視事。十月朔。大誓三軍。方

遙何地。左良玉署掌河南總兵。關防未見成功。河南總兵應否別推用。嗣昌既視事。十月朔。大誓三軍。方

孔炤、左良玉、劉元斌、自當陽、陳洪範、自鄖陽、來會。楊素有口辨。加使相威重。爲諸君述上語。申訓誡。又自

以受厚恩。誓必滅賊。誅賞所必行。副將以下皆失色。退與文燦語。頗尤之。文燦訴兩年剿餉。不至者六十

餘萬。又新附諸人不從逆。均州五營雖亡去。其中多思自拔者。欲以此爲解。嗣昌納其說。累疏聞。李萬慶

願從征。請得比劉國能給以餉。張伯鯨以乏與貶秩。司官王揚基、李爲珩、白衣視事。從督師請也。是月也。

彗星見。上傳旨修省。以王紹禹爲河南總兵。賊格里眼等掠葉縣。圍沈邱。入項城之郭焚之。犯光山。副將張琮、刁明忠率禁旅踰山行九十里。及其巢賊。大營已移。挑其銳返鬪。先驅射賊。殪絳袍而馳者二人。知光山吳敏師齎糗糒至。士益奮。追奔四十里。斬首一千七百五十級。嗣昌稱詔頒賞。十一月。王國寧再自歸。以其衆千人馬五百匹。願從良玉自効。請得比李萬慶。嗣昌於襄陽受之。處其妻子於樊城。然而熊文燦竟逮治矣。左良玉受平賊將軍印。浸驕。恥以囊鞬禮見。遣侯閻以書來謝。嗣昌不能無望。十二月。賀人龍以秦兵大破賊。嗣昌請加職賜獎。欲漸貴之。以其班抗左。左窺見萌芽。恨之。兵部尙書傅宗龍奏事失指。下獄。傅宗龍因洪承疇請推總兵劉肇基部議不允。上以違旨藐抗。故意掣肘阻撓。戲視封疆。革職提究。上素憤中樞失職。嗣昌權譎免。宗龍戇猥承其後。偶不當意。輒移積怒。怒之時。冬月已盡。大司馬考成。用小故被重譴。百僚震懼。嗣昌軍中聞之。亦心動。十三年庚辰正月。楚師敗績於麻黃。嗣昌歸獄於撫臣方孔炤。上命逮治。以荆南宋一鶴代之。楚制府鎮上游兵多。下游稍薄。而撫臣自以護陵爲重。分漢南屬治。臣王鰲永調容美土司。增當陽遠安戍。以備荆州而已。提陵兵五千。標兵一萬五千。專斷德黃。兼顧陵寢。其敗也。無所辭咎。故得譴。而嗣昌亦戴罪。狀以初至軍。爲法受過。上意不甚責也。當是時。賊分爲三。西則獻忠。負岷蜀楚之界。東則革左四營。豕突隨應。麻黃南則曹過十營。鷲伏漳房興遠。曹過尋從興遠入寧。昌在是年之臘月。我師視東略爲緩。河南江北。自撫鎮外。藉朱大典。盧九德爲策應。而麻黃千里。委之郭金邦二三裨校。以設防。其京兵滇兵。多聚西南。議以左將軍先行。

獻忠之誅。餘可次第剪滅。閣部迺大計兵食。規形勝之地。專倚襄陽爲根本。濬城外爲三濠。造機橋。列橫。柙以啓閉。每門設一副總兵。文移出入。譏訶驗問。立軍府監。以道臣張克儉儲備甲仗累億萬。諸道餉皆輸之。申嚴號令。大會師襄陽之射堂。斬後期者。興安路監軍殷太白以徇。所奏薦萬元吉等。起自廢籍。監諸道軍。元吉有識略。委以軍謀進止。所言無不用。閏正月。檄諸道進兵。左良玉於二十四日。合諸軍擊賊於枸坪關。獻忠敗走。乃請從漢陽西鄉入蜀。追之。閣部前調秦督率賀人龍、李國安之兵從西鄉入蜀。於良玉則欲其駐兵興平。別遣偏師追剿。良玉不從。嗣昌與元吉計而疑之。移檄良玉曰。觀賊形勢。似不能入川。仍當走死秦界。將軍今從漢陽西鄉入川。西太兵多。紫興兵少。萬一賊從舊路折回。疾趨平利。仍入竹房。將用何兵禦之。不則走寧昌以入歸巫。與曹操合。我以大將尾追。趨賊入楚。非算也。依幕府本謀。秦督提兵入川。秦府駐兵西紫。我兵仍駐興平。此爲正著。量遣偏裨入蜀追剿。此爲奇著。其詳議以聞。良玉報曰。蜀地饒衍。賊渡險任其奔逸。後將難制。且逆獻被創入川。則有糧可因。回郾則無地堪掠。良玉料之。賊非萬分窘急。必不復竄楚境。鄭嘉棟前報折回吉家莊者。此捍子手。乃老獍。一斗粟之殘賊。嘉棟誤以爲獻耳。夫兵合則強。分則弱。今已留劉國能、李萬慶守郾。若再分三千入蜀。卽駐興平。兵力已薄。逆賊折回。能遏截之耶。良玉所統。乃剿兵非守兵。若主兵不出戰。而戰兵又代爲守。賊將何時盡乎。今日惟當出其不意。盡銳疾攻。一經大創。自狀瓦解。縱使折回房竹間。人蹟俱斷。彼且從何得食。況郾兵扼之於前。

秦撫在紫興抄之於右。庸能狂逞。若寧昌歸巫。險而且遠。曹獻窮而歸曹。其中必有內相併者。可無慮也。良玉已於二月朔。涉蜀界之漁渡溪矣。嗣昌得其書。以示元吉。元吉曰。良玉初稱入蜀之路。定於西鄉。今倏易而大竹。進退皆主之。不復稟承督府何耶。嗣昌曰。良玉書詞慷慨。惟敵是求。將在外不中制。古也。宜從之。於時獻忠營太平縣之大竹河。規取其邑。以休士馬。良玉駐軍漁渡溪之兩日。而秦督崇儉亦引其兵來會。獻忠聞兩道俱至。乃移營九滾坪。以待我兵。見瑪瑙山險峻。將據之以決勝。左兵秦兵以初四日追賊於九滾坪。不見賊。部勒行伍。指畫形勝。初七日始抵瑪瑙山。而賊已奔山巔結壘。乘高鼓噪。其氣甚盛。左將軍下馬。披荆榛相險易。周覽者久之。既而謂所親信曰。吾知所以破賊矣。分所進道爲三。左兵當其二。秦兵當其一。令曰。聞鼓聲而上。我所部兵或衝其中。或衝其右。而賀李二將從左路夾擊。賊置陣堅不可動。我師奮勇鏖戰。賊潰墜崖澗者亡算。追奔四十餘里。左兵斬首二千二百八十有七。內有掃地王曹威白馬鄧天王等十六級。皆賊將。而張大經亦爲官軍所殺。獻忠妻妾九人。被擒者七。獲僞金印一。鏤金龍棒一。僞令旗令箭各八。卜卦金錢二。馬羸千餘頭。甲仗軍費以數千計。陣降賊將三百三十八人。秦兵斬首一千三百三十有三。降賊將二十五人。人龍所將卒。獲上賜熊文燦准撫獻忠敕書。別將收獻忠大刀。上鏤天賜飛刀四字。是役也。左良玉功第一。賀人龍次之。閣部主調遣。而秦督在行。楚巡按御史汪承詔方差次其績以上。制府先被二月十四日詔書。上以閣部在行間鬚髮白。又調度有

方賞罰明信。所以勞勉切至。發御前賞功銀一萬兩。賜嗣昌斗牛服御廐良馬金鞍各二。使者甫出國門。而瑪瑙山露布告捷。上大悅。時陳新甲由宣大總督入爲兵部尙書。召見賀楚捷。上先免嗣昌良玉戴罪。再發五萬金。錦幣千端。爲軍賞。令新甲定諸將功格。而急趣進軍。是月也。楚將張應元汪之鳳乘勝逐北。十六日。及之於水右壩。斬馘九百。獻忠又走岔溪。千江河。蜀將張令方國安十九日與戰。復破之。張令者。故奢崇明降將。年七十餘。能馬上用五石弩。中必貫革。爲賊所憚。獻忠乃由千江河之十二灣。轉入柯家坪。其地崇牙錯峙。菁薄綿亘。賊彌山漫谷。依阻其中。張令於二十七日。分其軍爲五路。負勇爭利。賊衆我寡。方國安支軍後距。取僂道得脫。而令深入被圍。居絕坂之中。猛氣彌厲。挽強持滿。屢奔賊營。應絃以斃。甚衆。而水遠士渴。賴天雨得濟。圍終不解。鄖襄道張克儉犒軍入蜀。謀於秦督崇儉曰。張令健將。奈何棄之。急呼張應元汪之鳳從八台山進。賀人龍從滿月槽進。三月八日。過箐入坪。楚兵先至。張令方與賊鬪。呼聲動巖谷。內外合勢。賊乃解去。應元之鳳功居多。是役也。張令以五千人。當賊數萬。相持十三日。力戰得不沒。所殺賊亦已數千。雖救自諸將。人皆服其勇云。當是時。獻忠既遁。與歸山中。尋自鹽井竄興歸界上。鹽井屬四川。○賀人龍李國奇高杰等以三月初九日。追賊及之于寒溪寺。翼日再及之于鹽井。共斬首一千五百有奇。賊目三人。先後率所部降于陣。已而木瓜渡黃墩兩戰。秦楚蜀之師皆會。木瓜溪斬首一千二百八十。有二黃墩斬首三千。四月。左良玉大軍進屯興安平。利諸山。連營百里。諸軍憚山險。圍而不攻。賊重賄山氓。市鹽芻米酪。其人有反爲賊耳目者。獻忠收散亡。養痍傷氣。乃稍稍振。久之。自興房走白羊山而

西。西卽羅汝才入寧昌道也。初汝才之在寧昌。其地阻江爲險。汝才與過天星分兵出羊頭坂。窺渡。二
四日。大昌參將劉貴擊之半濟。尋犯巫山。三月十日。石砭女將秦良玉盛兵維門。百子溪扼渡。再縛筏。巴霧河。
四月初。秦翼明以三千人設守大昌。游擊楊茂選力戰卻之。旣屢挫不得渡。潛求附於獻忠。獻忠之走白
羊山。卽巫巴深險處。掩息旗鼓。轉入轉西。汝才之聲援漸近。旣至。遂與之合。獻忠剽悍。雖累敗。不以氣下。
汝才。汝才分士馬以資之。語次頗憂江險爲難渡。獻忠曰。不狀。立馬江岸。有不前赴者。斬之。其下爭死鬪。
我師劉貴等皆退。賊乃由魚住溪渡江。結營萬頃山。苦桃灣。其別部陣於紅茨崖。青平寨。歸巫之間。震焉。
督師在襄陽聞之曰。二賊合。西郵必倣。急引其軍出夔陵。夔陵與巫山接壤。荆楚之門戶。先是宋一鶴鎮
當陽。以滇兵劉元斌控荆門。以禁旅地勢相爲犄角。督師標兵三萬餘人。張伯鯨解餉至者。八十七萬。幕
府如袁繼咸。萬元吉。皆奇士。有智謀。故總兵猛如虎。以白衣從征。自效。文武將吏。一志專力。賊且旦夕可
滅。乃嗣昌虛恢自用。又煩碎無大略。其上夔陵也。偕幕士飲酒賦詩。流連名勝。酷好形家者術。遇梵刹邱
隴。指興替以訪其驗否。舉鞭於馬上算之。萬元吉以爲不急廢務。狀亦未敢強諫。躬親文簿。過於米鹽。反
滋叢脞。軍行必自裁進止。千里待報。動失機宜。偏裨駕馭難周。輒經年無所調發。將吏以之解體。鄖治王
鰲永因關門共事之舊。乘間言之。終不見聽。鰲永旣罷。疏曰。臣目擊督輔行間盡瘁。舉鳳皖秦豫楚蜀諸
檄文往返。動稽時日。比至而情形已變。又須另請調度。所以有經年不戰之兵。其將所自爲出奇。僅得瑪
瑙山一戰。若遵督撫之令。則左良玉應守興安。無此捷功矣。臣以爲督撫之責。成諸撫。不必人人而授之。

機宜止核其條上。駐彝陵一月不進。取華嚴第四卷。謂可詛蝗已旱。公狀下教郡邑。且以上聞。朝士聞而
機宜之當否可也。歎曰。文若其將敗乎。擁百萬之衆。戎服講經。其衰已甚。將何以戰。五六月間。曹過再越巴霧河。侵開縣。開
失。鄭嘉棟擊之于仙寺嶺。賀人龍擊之于馬溺溪。各有斬獲。馬溺溪斬一千九級。羅汝才同小秦王等東奔。而
過天星特過開縣而西。賀人龍李國奇又折回追之。縣過天星之突過開。當是時。諸將士馬居山谷中。罹災
蒸瘴毒。疾疫物故者十二三。京兵之在荆門。雲兵之在簡坪。楚兵之在馬蝗坡。久屯思歸。多衆夜亡去。關
河旱蝗人相食。土寇蠭起。秦有竇阿婆賊。破名城。殺長吏。豫有李際遇等賊。河汝之間多從之。嗣昌乞恩
請罪。上爲發帑金五萬。軍前營療醫藥。二萬賙恤饑民。于嗣昌傳旨切責而已。王鰲永緣議不合。解任。代
以監軍道袁繼咸。秦督崇儉老不任事。謝病。上不許。俾率鄭嘉棟歸秦。留劉賀李三將討賊。秦之長武。楚
之羅田。蜀之新寧大竹。皆告陷。嗣昌不得已。規以便宜招撫。爲諭帖萬紙。散之賊中。革左全營自歸。未幾
颺去。王光恩素有善意。并說其八營俱降。見閣部猶豫不能專決。久之八營之降者復叛。七月中。羅汝才
小秦王混世王等。自蜀折回興山。楚兵之備興遠者。副將王允成。王之綸等。京營總兵孫應元等。以十四
日擊之豐邑坪。大有斬獲。賊之折回也。尚有滿天星。一連驚共五股賊。在興山。連營舒洞口。初圍香爐寨。
餘人亦瑪瑤。十六日。小秦王混世王降。惟汝才佚去。嗣昌見楚地不足憂。決策以八月二十六日。出師入
蜀。嗣昌楚人。不欲賊一騎蹂楚。其初至軍也。卽謀以蜀困賊。勢不得不先困蜀。撫恐蜀之門戶堅。反而致

死。凡撫戲下之強者。輒調之以飭他備。撫邵捷春。提弱卒二萬守重慶。恃秦良玉張令爲左右手。張令忠勇善戰。軍中號神弩將。秦良玉自將兵三萬授夔城。過夔一步。卽其石碛司守夔亦守家也。知綿州陸遜之罷官歸。撫遣之按行營壘。過秦。秦冠帶佩刀出見。見左右男妾十餘人。狀能制其下。視他將加肅。爲陸置酒。歎曰。邵公不知兵。吾一婦人。受國恩應死。所恨與邵同死耳。陸請其故。秦曰。邵公移某自近。去其所駐重慶三十四里。而遣張令守黃泥窪。固已失地勢矣。賊在歸巫萬山之上。俯瞰吾營。鐵騎建瓴而下。張令破。次及我。我敗。尙能救重慶之急乎。且閣部驅賊入蜀。無愚智皆知之。邵公不及此時爭山奪險。令賊毋敢卽我。而坐以設防。此覆軍之道也。時又有降賊自言於邵公曰。某降幾日矣。而公不從我計。有疑我用汝。賊曰。吾作賊久。恨失身。欲于國家圖報効。故背以自歸公。若疑則速殺我。否則當早用吾計。賊大衆饑疲。乘之可殄滅。倘有它賊以軍糧接濟者。雖百萬衆。無能破之矣。邵俯仰從其策。賊盛言山中賊所害金銀處。以動諸將。而又道上所遇。皆餓殍無人色。其死者剖其腹。皆草樹皮。謂可信。乃盡邵親軍二萬人。以深入。而皆爲所沒。無何。楚兵於土地嶺敗績。先是監軍萬元吉集川將守巫巴諸隘。而秦將賀人龍、李國奇、楚將張應元、汪之鳳、張奏凱專使擊賊。楚兵自達州入夔。營於土地嶺。而賀人龍逗撓不至。楚兵多新募。不習鬪。獻忠悉銳來攻。應元等苦戰不決。賊分兵從後山下。突入其營。官兵譁。賊乘之合圍。應元中流矢。突圍出。收其兵稍稍集。賊度巴霧河。猶力與之爭。之鳳走他道。所將潘映奎沒於陣。餘士卒從東平散回巴霧川。之鳳苦戰久。山行道渴。飲斗水而臥。血凝臆而死。賊退屯圓渡坪。元吉馳赴楚軍。命應元兼領其衆。楚蜀兵勢皆危。嗣昌惟以受降爲得策。九月。過天星聞

小秦王混世王之既降也。亦請降求內徙。嗣昌徙小秦王於房縣。過混於竹溪山中。初嗣昌之用蜀困賊也。蜀險且曠。再遠則松潘徼外諸蠻。吾藉將士力蹙賊而致之蜀。蜀能守則守。不能守而棄涪萬松雅之間。以啗賊。秦兵斷棧道。臨白水。滇兵屯曲靖。扼白石江。我率大兵掩擊其後。驅入松潘諸蠻。在豫楚取蜀爲阱。在蜀又取徼外爲壑。策固當。乃賊謀尤狡。覘嗣昌喜諛。詭言畏督師天威。諸部悉捧馬足。督師慮降者與行營雜處非便。輒發內地安插以遠之。先時兵圍賊久而大軍反爲賊所圍。嗣昌不悟。川東道康四海。鄖襄道張克儉。區畫新附。日不暇給。賊得免死牌。莫冑散。自擇便地。連營數百里。河南北大祿。饑民就食襄漢者日數萬。賊因之闌入。張克儉心憂之。上書督府曰。襄陽自古要區。在本朝筦鑰。獻陵視前代尤重。近者西河饑民雲集。新舊降丁。逼處其間。一夫叫嘯。皆足致亂。況秦兵以長武之變。西歸鄖房。軍府初立。降營碁置。何啻放虎自衛。紫漢西興。初無重門之備。可不爲之懼乎。嗣昌報曰。昔高仁厚六日降賊。百萬卒擒阡能。故事可法也。參軍何怯耶。於是嗣昌遣親將至京師。上進軍狀。且曰。臣嗣昌驚怯。竊冀奉神靈。揚威討逆獻。指日授首。狀後掃除餘孽。拜見闕廷。上亦以功必成。出其章示羣下。兵都給事張縉彥言于上曰。督師專征以來。所上章前後多不相讐。瑪瑙山獻忠單騎奔逃。已而突巫山。掠巴東。所在見告。革左全營歸命。不數日皖將又以陣亡。今謂過渠束手。竹房漳保。已無內顧。泝歸巫而上。盡敵可期。在督師定有成算。迥非前事之比。狀臣不能不慮之也。十月。張獻忠陷大昌。先是萬元吉駐巫山。邵捷春駐大昌。

相聲援。捷春用其將邵仲光之言，以大昌之上中下馬渡水淺地，平難持久，乃扼水寨口之觀音巖爲第一隘。而夜叉巖、三黃嶺、磨子巖、魚河洞、下涌諸處，各分兵三四百人，以守。元吉以兵力弱爲憂，賊以九月先突觀音巖、三黃嶺，窺上馬渡，無備，破之。元吉急檄諸將，邀之於譚家嶺、七箐坎、乾溪，而張奏凱以專兵屯淨壁。捷春用羅洪政、沈應龍二將兵助之，已而獻忠從竹菌坪突過淨壁，進屯開縣。嗣昌聞蜀兵潰，取觀音巖守將邵仲光斬以徇。是時張令秦良玉皆敗。張令性輕敵，有賊策一騎于山呼其壘曰：誰是張將軍，令易之。躍馬出，賊曰：若善弩，今用相報。矢中項以瘞，令宿將死。藝川人惜之。賊大至，秦石砧兵亦覆沒。秦單騎見撫曰：事急矣，盡發吾溪洞之卒可也。萬我自廩其中，半餼之官，足破賊。土官家用一箸一帚，調兵者最急，箸以能飯者畢至，帚則掃境內出也。邵見嗣昌與己不相中，而蜀無見糧，令竟以死。而捷春自收其兵扼梁山，羅汝才自豐邑坪返走，再與獻忠合。獻忠以梁山河水深不得渡，乃與汝才謀曰：達州河淺，不如自開縣西走，復東向而趨達州。時方國安奔敗，引殘兵保達之郊，獻忠至，不敢與之爭。賊旣渡，遂長驅深入，捷春退屯綿州，扼涪江。賊疾走陷劍州，趨廣元，將從間道入漢中。趙光遠賀人龍拒之於陽平百丈二關，不能進，乃踰昭化，復走巴西。張應元合楚蜀官兵，邀之于梓潼，戰小利，賊返鬪被屺。蜀將曹志耀、王光啓、張世福等力戰卻之，降將張一川、張載福俱陷陣遇害。萬元吉命卹一川，妻于於夔陵。捷春涪江師遂潰，賊屠綿過浮橋，直抵成都。嗣昌先以大昌失事，糾捷春罪，用監軍道廖大亨代之。邵撫蜀有惠政，其逮也，成都巷哭。蜀王爲引救不得，卒論死。十一月，嗣昌進軍重慶，萬元吉大饗將士于保寧，以諸軍進止不一，立大帥以統之，用猛如虎爲正總統，張應元副之，率

其軍趨綿州。諸將分屯要害。而元吉自間道趨射洪。扼蓬溪以待賊。賊方屯安岳之周里場。諜知官軍且至。宵遁抵內江。猛如虎。選驍騎逐賊。元吉與應元營安岳城下。以遏賊歸路。十二月。嗣昌在重慶。下令赦汝才。罪能降者。授都司以下官。惟獻忠不赦。有能擒斬者。賞萬金。爵通侯。次日。堂皇庖福。徧題有斬閣部來者。賞銀三錢。嗣昌瞠視咄叱。疑左右皆賊。勒三日進兵。會雨雪道斷。再戒期視師。三檄賀人龍。驕蹇不奉約束。初。嗣昌憂左良玉跋扈。人龍屢破賊有功。私許以人龍代左爲平賊將軍。賀大喜過望。已而良玉有瑪瑙山之功。嗣昌禮重之如故。顧謂賀將軍且需後命。賀不得意。具以前語告左。左深阻內恨。而人龍徧中。顯謂其衆曰。閣部不足爲盡力。當獻忠之敗瑪瑙山而走也。追急遣賊馬元利操重寶說左曰。獻忠在。故公見重。公獨不之思乎。公聽所部多殺掠。而閣部猜專。無獻忠。卽滅不久矣。左心動。實縱之去。獻忠在山中。得收集潰亡。左兵驕玩。久不之擊。督師數移文責讓於左。賊窺知其故。於所過要路。故署其壁曰。某日候戰。又不到。欲挑兩人釁而乘之。左憂閣部之聞而按之也。順旨請亟戰。狀其中實不用命。萬元吉雅知兩將皆怨望。進曰。軍心不一。未可以戰。盍令前軍躡賊。後軍爲繼。中軍從間道出梓潼。扼歸路。以徐俟濟師。此萬全策也。嗣昌有驕色。曰。賊易與耳。焉用分軍示弱耶。是月也。張獻忠陷瀘州。瀘州三隅皆形銳。而面江止立石站一路可北走。賊旣走絕地。元吉謀以大兵自南搗其老巢。伏兵旁塞玉蟾寺。蹙賊北竄。永川逆而擊之。可以盡殲。永川令戴堯雲者。先期遁。猛將軍詢嚮導。無一人應者。元吉輕騎按行城中。

惟見丞簿一二人。我師宿西關空舍。不戒於火。延燒民屋。已而抵立石。賊營先移。秦師屯小市廂。隔水而陣。賊渡南溪返走。秦兵隔水詭云追之不及。賊遂越成都。走漢川德陽。元吉單騎至籍田舖。賊渡綿河入巴州。閣部先既詘。監軍謀不用。將以十四年辛巳正月。自統舟師赴雲陽。檄三軍陸行。疾趨追賊。毋令他佚。諸將迺盡從瀘州躡賊後。賊折而東返。歸路盡空。不可復遏。猛如虎所將寧國兵止六百騎。餘皆平賊。鎮兵驕悍不法。焚屋于永州。掠馬于仁壽。皆其卒也。惟參將劉士傑深思立功。諸軍從良玉。多優游不戰。今從如虎馳逐山谷風雪中。軍中謠曰。想殺我左鎮。跑殺我猛鎮。時賀人龍兵已大譟西歸。關外所賴。止此一旅。人心如此。元吉深用爲憂。諸將軍會于瀘州。中軍陳可立擁蠡牛頭山。飲酒奏倡樂以觀鬪。元吉令之赴敵。背道馳去。賊之入巴州也。自巴抵達。逡巡及於新開。正月某日。我師追賊。及於開縣之黃陵城。日晡雨作。諸將請以詰朝戰。劉士傑奮曰。吾四旬逐賊。今乃及之。舍而不擊。縱使佚去。吾不能也。擐甲持矛。大丈夫獨取獻忠耳。如虎激其衆。鼓而竝進。士杰所當摧陷。賊大披靡。獻忠登高以望我師。見無秦人旗幟。而左兵亦攜阻不前。士杰孤軍跳盪。後無繼者。迺密抽壯騎。潛行箐谷中。乘高大呼馳下。左兵先潰。士杰及游擊郭開。如虎之子猛先捷。皆戰死。前兵既覆。如虎率牙兵苦戰。中軍馬智挾如虎潰圍。圍開衝突以出。旗纛軍符盡失。嗣昌在雲陽聞敗。頓足曰。吾悔不用萬參軍之言。故敗。今引兵急歸楚。顧根本再破。賊退回重慶。傳箭召潰兵。順流東下。賊已席卷出川。西燒新開驛。置楚蜀消息中斷。襄陽尙未審知敗問。賊大隊已至當陽。鄖治袁繼咸方謀出軍。

獻忠令汝才與之持。自以輕騎。一日夜馳三百里。未抵襄陽。先遣劉興秀等二十八騎。偽為官軍。持軍符令箭。日晡叩城門曰。督府調兵守者。合符信。啓關入。夜半賊從中起。放機橋納大衆。城陷。鄖襄道張克儉。推官鄺曰廣。死之。襄王被執。獻忠坐王堂下。屬之酒曰。吾欲斷楊嗣昌頭。嗣昌在蜀。今當借王頭。使嗣昌以陷藩伏法。王其努力盡此酒。遂害之。嗣昌出蜀。抵荊州沙市之徐家園。方圖告敗。曰。上待我厚。謀再舉。俄聞襄陽破。遂不復食。迺李自成陷雒陽。福王先以正月遇害。報踵至。於是撫膺大慟曰。無面目見上。以後事付元吉。伏毒死焉。上聞其死也。且恨且憐之。得元吉所上死狀。歎曰。督師功雖不成。志亦堪憫。宜用輔臣禮歸葬。既而詔諭羣臣。嗣昌二載辛勤。一朝盡瘁。雖有瑪瑙山功。不能掩其闖獻。張兩藩罹禍之罪。下所司會勘。以聞。中外皆知上意。引傅輕典。即議功為解。上可之。中軍會議嗣昌中外纔知有二府三

知以密本。嗚呼。當嗣昌在軍中。薛國觀早得罪。因召周延儒為首臣。乃先後竝坐法。賜死。餘相雖或枋用。不下部也。不次。其任遇皆不及嗣昌。繼起筦中樞者。傅宗龍使過陣亡。陳新甲失職棄市。才亦遠出其下。惟張國維。馮元颺相繼受任。元颺初以侍郎署部事。上問誰可。大司馬元颺以史可法。李邦華。張國維。三人對。上以邦華在戎政。為兵士所恨。而南樞不可無。可法。故用國維。國維到未兩月。而得罪。即以元颺代之。國維再下獄。見釋。元颺被上知遇最深。因病獨得放還。癸未年。袁時中被擒。上念舊樞臣。馮元颺調代之。國維再下獄。見釋。元颺被上知遇最深。因病獨得放還。度功。特發上傳。加太子太保。病痊。即與起用。而張縉彥由庶僚超拜。賊已躡秦蹂晉。遂巡乎畿輔矣。其爭奪情諸臣。黃道周幾斃詔獄。復原官。范景文召用。遂擢為相。上亦深悔前撓廷論。專任責成之非。狀十六年。遣輔臣吳甡討賊。面諭以自楊嗣昌死後。

廷臣無復能督師者。以此知君臣之際其相知爲深也。十一日召輔臣語曰朕昨夕夢故輔嗣昌稽顙庭章見詆故歸訴皇上朕語之曰如某疏猶公平否張獻忠陷武陵發楊氏兩世家破其骨有血自二年彗
嗣昌搢首日亦不朕語畢天顏慘惻久之見筆記星見楊鶴節制三邊受流寇降父子遂與寇禍終始鶴有弟曰鶚辛未進士上以嗣昌故遂用爲兵侍郎
撫薊後改川湖雲貴總督而國已亡矣。

外史氏曰嗣昌之敗在乎用良玉而不能得其心信元吉而不能行其計朕皆以筭樞失策有以致之不
待督師而後悟也嗣昌實畏討賊而引文燦以爲己貳恐其顛覆乃曲意護之初以良玉威名足仗欲文
燦倚以就功不知其短于駕馭穀城之役良玉既顯相齟齬嗣昌終信文燦以左右其謀比受降事壞又
不欲顯其是非故薄羅漢山之罰而反加委任良玉有以窺見其微且從而心輕之矣區區一平賊鎮印
謂足以服豪傑而得其死乎元吉見兩帥離心其意實主於不戰卽嗣昌非不知持重萬全顧其生平本
不識用兵竭其私智專以揣摩迎合目舉六月盪寇之言以摩切闔外明知其勢之未可冀倖身不在行
姑以之塞上意而規自脫既不得已受專征去左右在萬里之外自念往昔在上前謂智略輻輳功在反
掌今出師經年糜餉百萬情見勢屈責我者且四面而至矣故雖將驕卒惰終僥倖於一決其戰也初非
辭元吉而別有成算斯其所以敗也嗣昌奏臣受理臣交代之兵新收王國寧之兵與續調遼兵合之京
營勇衛大同之兵一月約餉十萬餘兩又楚鄖二撫派餉未足于理
餉內通融支給約每月楚撫支二萬七千元吉之爲人果達精警其從嗣昌也初無意於富貴特以識事
鄖撫支一萬三千合之前數共爲十五萬

機習勞苦。將乘機會以垂功名於竹帛。其自保寧進達州。賊燒絕驛置。七百里不見烟火。單騎崎嶇箚銑。間舍騎放舟。始及大軍。故一見督師。卽請分兵以爲後距。開縣之敗。元吉親至戰處。爲文以祭陣亡將士。劉士杰等哀動三軍。在夔門收召殘兵。登白帝以望賊騎。歷歷在山谷間。我師川湖諸將反出其後。無一人禦之者。不覺拊髀流涕。而痛吾謀之不用也。嗣昌之縊於沙市。雖曰無面目以見天子。亦緣良玉因其敗。平牒倨傲。不復存節制之體。故憤而自裁。元吉畏禍。未敢深言。又逆揣上旨。知在元臣正終。援春秋之義。微之而已。上覽表唏噓。亦以監軍有勞。敗非其罪。後之君子。追論其事者。於君臣朋友之間。有三歎焉。嗚呼。嗣昌一生心力。不專用於辦賊。蹟其議論奏疏。亦可謂之能臣。而機變有餘。忠誠不足。國事債而身亦從之。小雅節南山之詩曰。不懲其心。覆怨其正。此秉國成者。所當引以爲戒也。

附紀

當嗣昌之討賊於楚蜀也。秦中大旱。土寇蠭起。長武被陷。環縣以借賑殺鄉紳。白水以徵糧殺縣官。皆岌岌爲長武之續。賊首竇阿婆、闖子黃三鵠等爲雄。竇阿婆名竇開遠。咸陽諸生也。十三年六月三日。賊同其黨渠魁百人。自桃鏡川赴料峪關。漢羌總兵趙光遠率諸軍追之。賊初據關山嶺。繼據張家後山。皆爲我軍所奪。監軍道伍右文、催諸將趙大允、魯文彬、黨威、疾擊之於西維峪。闖子懼而逃於牛圈子。竇阿婆謀走於娘娘山西遁。我師覺之。先伏山之左右以待。文彬威夾擊驅賊。賊勢急奔山。大允迎

頭截殺。竇賊在陣被擒。闖子來救不及。東西奔潰。凡擒斬共一千七百有奇。運籌則伍右文。力戰則趙大允爲上。魯文彬黨威次之。秦撫丁啓睿以聞。

李長祥曰。閣部之駐彝陵也。下檄曰。賊東走大寧大昌。由彝陵下荆襄者。我當之。賊西走紫興房竹入秦者。左良玉當之。賊西入夔關者。蜀撫邵捷春當之。蜀之險在夔門。而大寧大昌與竹溪房縣聯界。有三十二隘口。閣部以爲隘多而力分。不如厚集兵勢。以專守夔門。棄大寧大昌以啗賊。我師四面蹙之。以決勝。邵撫曰。令甲失一城者撫坐之。且有諸隘口不守。而使賊得入。是閣部殺我也。欲分兵出關。堅守三十二隘。閣部乃命猛如虎以兵至夔關。助扞禦焉。時張令死矣。四川總兵爲方國安。隘將楊茂選。覃恩岱者。有驍名而不相得。思岱譖茂選于邵撫曰。通賊。捷春召令計事而戮之。卽以茂選之兵隸覃部。茂選之兵怨覃。相率驟委去。賊遂從此一路入。旣入。諸隘亂俱潰。賊乘夜斬夔關。夔將士尙臥未起。遂驚亂。方國安兵敗。收殘卒數百騎。過達州。達州設守嚴。獻忠從白馬渡過江。壁達之西關。僅三千人。已而閣部亦率其兵至。有數萬人。相守旬日未交綏。獻忠僞爲閣部之旗幟。穿其營遁去。閣部引兵追賊。已過蓬溪綿州而攻成都。再往瀘州。而閣部追及賊。又掣其兵轉至達州開縣。我師與之戰而大敗。按全蜀形勢。夔門去達州八百里。而開縣在其中間。長祥達州人。親拒賊設守。其言極推重嗣昌。而專以邵撫爲失策。雖持論稍偏。未必無所見也。

內江王于蕃曰。當武陵視師。獻忠由大寧大昌開縣達州以入綿竹界。遂逼內江。內江有土司家將毛文者設守。賊至。文大敗之於東瓜崖。殺其渠魁曰曹四。獻忠乃偃旗鼓疾走成都。成都城龜形。其下皆甃石。惟北角樓用土填築少瑕。賊夜至。穴城數處。將穿矣。覺之。城中出董卜蠻者與之戰。獻忠大敗。殺其卒萬人。乃遁走。其後甲申八月之九日。成都陷沒。賊仍從北角樓以入。盡殺蜀人。所以報董卜蠻之怨也。

鄒漪曰。世之議武陵者。指摘幾無完膚。予心以爲太過。及讀其中樞奏議。又未嘗不服其才。亮其心也。武陵嘗上四正六隅一疏。謂下三箇月苦死之功。了數十年不結之局。及爲督師。建圓盤議。點滴不漏。謂滅獻一股。以全勝之力制闖。可無餘孽。若果其言得行。釜魚阱獸。賊自可平。無奈撫臣邵捷春未必同心。鎮將左良玉全不効命。卒致剿局無成。中原糜爛。殺藩王。隳名城。而督師以身殉之。其亦異於後之受賄偷生。欺君伏法者矣。特以處分漳海一事。爲不理於衆口。狀觀獻忠初納降時。遣腹將薛姓者入京。朝士無不婪其厚利。而不受獻忠錢者。止武陵一人。亦可見其清執矣。迨其後兩世之棺遭賊發掘。襄王之死也。賊語之曰。吾欲斷嗣昌頭。而嗣昌在蜀。今當借王頭。使嗣昌以陷藩伏法。則賊之致恨於武陵者極至。不可以見武陵之心耶。夫元和討賊。全倚裴度。建興恢復。獨任武侯。武陵受上知遇。亦欲爲國宣勞。獨是薦熊文燦爲首功。緹洪承疇爲首罪。功罪混淆。人心不服。而開縣之敗。由不用萬元。

吉之言。此則有難爲武陵解者。朕予友李翰林長祥推許不啻口出。而杜貢士濬亦言其才可用。豈阿私所好乎。至以加餉殃民爲武陵罪。則剿寇需兵。用兵需餉。前督師盧象昇早已建議請行矣。後之君子未嘗設身處地。而苛求不已。恐未可爲定論也。宜乎上諭有云。功雖未成。志亦可憫。武陵亦可瞑目於九原矣。

綏寇紀略卷八

汴渠墊

洪武三年大封諸子。列聖相承家法。建置維屏。訖于季代。二百八十餘載。或除或絕。存者三十王。太行以西曰晉。曰瀋。雁門以東曰代。覃懷以北曰趙。曰鄭。曰潞。河濟之間曰魯。曰德。海岱曰衡。洞庭以南曰岷。曰滎。曰吉。曰桂。豫章以西曰益。曰淮。蒼梧界蠻徼曰靖江。此十六王者。所封負絕河山。或僅以免。卽先後被兵。中十餘年獲休息焉。君子于其事也。始之書。終之書。非不一書而足也。大梁湖洛入汝。惟四王。周。高皇帝第五子。封開封。定王櫛以下。十傳而端王之子恭枵紹封爲周王。唐。高皇帝第二十三子。封南陽。定王經以下。九傳而裕王之子聿鏡紹封爲唐王。崇。英宗第五子。封汝寧。簡王見澤以下。七傳而昭王之子由績紹封爲崇王。福。神宗第二子。常洵。封洛陽。爲福王。又封其次子由崧爲德昌王。關中絕隴道。惟五王。秦。高皇帝第二子。封西安。愍王棧以下。十四傳而□王之子存樞紹封爲秦王。肅。高皇帝第十四子。封甘州。改蘭州。莊王樸以下。九傳而憲王之子識鉉紹封爲肅王。慶。高皇帝第十六子。封慶陽。改寧州。又改寧夏。靖王榘以下。九傳而憲王之子帥鉉紹封爲慶王。韓。高皇帝第二十子。封開原。改平涼。憲王松以下。十一傳而敬王之子亶。紹封爲韓王。瑞。神宗第五子。常浩。封漢中。爲瑞王。自鄂達郢屬之蘄春。惟四王。楚。高

皇帝第六子封武昌。昭王楨以下八傳而恭王之子華奎紹封爲楚王。襄仁宗第五子封長沙。改襄陽。憲王瞻墉以下八傳而靖王之子翊銘紹封爲襄王。荆宣宗第七子封建昌。改蘄州。憲王瞻墉以下九傳而定王之子慈翼紹封爲荆王。惠神宗第六子常潤封荊州。爲惠王。梁山跨劍閣。惟一王蜀。高皇帝第十子封成都。獻王椿以下十三傳而恭王之子至澍紹封爲蜀王。寇初起。西延闔鎮反。慶肅國被邊地唇齒。而臨洮寧夏之兵疾討賊。不與于亂。韓恃固原爲捍蔽。秦有金城之固。瑞有雲棧之阻。秦將吏旣破賊。則桐封以草竊爲不足憂。崇禎之六七年。賊渡河再入關。往來豫楚而窺蜀。諸侯王之被兵者。其鬼神以震擾闕其禋祀。田疇以蕪穢棄其耕耘。民人則辛苦墊隘。罔敢寧居。聘問則淹洫雍闕。失于期會。卒至于枝葉凋。本根撥。底喪亡而莫之救也。蹟其形勢。楚懸絕大江則緩。周秦蜀通都居重則緩。荆處蘄春非上游。肅洮河之陽。慶賀蘭山下。遠則亦緩。唐與福負秦嶺。距關崇。涉于淮泗。韓據涇渭。西控隴。瑞縮梁益。出褒中。襄惠通庸漢。面犍之江。七王不幸當天下之衝。疆場日駭。大懼社稷之顛隕。以恥王室。故數以賊情上聞。瑞王之言曰。臣賴先帝休德。獲奉西藩。未期年而寇至。比晉賊再渡河。闌入漢興。七年正月十五日。破詢陽。紫陽。平利。白河。繼陷。督臣洪承疇來救。單騎布甲。披荆棘入險阻。搜捕山間寇。臣助犒軍。及賑饑銀七千餘兩。賊始奔遁。近境以寧。旣而鳳縣再陷。蜀賊入秦州。楚賊上興安。六月。自興安西鄉犯郡界。游擊唐通憑漢江力拒。不能渡。賊方東鈔澤。北據鳳。西擾沔縣。寧羌。南鄭。孤城在萬山絕谷中。賊四面至。覆亡。

無日。臣于肺腑。至親近也。于藩封。至僻陋也。于寇盜。至危迫也。惟陛下哀憐韓王之言。曰。賊以七年九月。初五日。攻平涼。東西兩門交急。賊已從東關之北攀而上。都司李應孝。劉添祿。手擊賊。殺七人。擲其首。城下。賊乃轉而東。自辰薄。旣行。始盡。崇信靈臺涇州相繼失。又轉入平涼之郭。爲李應孝所卻。而鎮原華亭咸被圍。平涼屬城十破其五。邠乾汧隴鄰封。鈔略殆遍。聲言芟夷四境。卽平涼在掌握。無所逃。國初設平涼衛。屯田碁置。列三百寨。官二百。軍三千有奇。今僅存尙羸百十老卒。何以守。前一年。皇上念潞王苦寇急。增設一參將。兵三千人。卽潞州衛屯糧充餉。臣願以韓比潞。邀親親之恩焉。初。賊纔過河入豫楚也。雖稍偏。宛汝荆襄各有警。而荊州當陽先陷。故惠王奔命告急。南陽城庫薄。唐王捐千金謀修築。太守陳振豪弗授功。又與王因他事齟齬。王以爲言。上震怒。逮振豪下之理。王請以陳永福爲耑將。亦援潞事。以比。上弗許。八年冬。賊再犯南陽。王又奏曰。臣有莊田數百頃。爲朝廷恩賜。及臣祖父之所封殖。以十月十一日之交。賊燔燒聚落。儲侍略盡。守舍輔國將軍顧煜遇害。其母梅夫人重創死。賊往來瓦屋石橋。臣祖墳園咫尺。繫臣心腑。旦夕靡寧。南陽恃鄙而不警備。臣出私財。蓄火藥。布渠答。賊是以避弗犯。而焚我郊保。今七月不雨。二麥未藝。臣鄉沈家沖饑民揭竿。有平林下杜之志。可爲寒心。又曰。臣府護衛千二百人。近制以其半爲汴梁班軍番直。給撫臣以下由使。甚無謂也。惟明詔念臣困厄。以全軍見還。臣得賴國恩。周廬擊柝。遠斥堠無恐。上報之曰。南陽班軍番直。祖宗朝定制已久。朕不敢變。諸可以爲王捍禦者。不

愛于王。當上之從信邸入也。篤宗廟。厚同姓。以崇重諸侯之禮。郡縣吏弗詘體于王者。王得自言。卽所持非是。上輒飭天下法以右王。上又數召見宗人。遴其才擢之官。欲以通宗祿之窮。而變其制。其後上書言事得乘置。至京師。日益衆。或非所宜言。上亦浸厭之。不能有以禁也。上發金匱書。得高皇帝制曰。宗室子孫入爲中朝官者。得以其階換。授有司議。議者曰。將軍中尉皆一品。如此卽三公九卿一朝而盈。廷者數百人。非所以爲法。上拂然曰。親親任賢。古之道也。何不可。卻其奏。再詳之。有朝士顯謂儀制郎吳之屏曰。君胡不以有唐故事告上乎。夫入爲卿士。出爲牧伯。此三代制。唐室諸侯王兼官借職。不必以其階。如曹成王者。傳稱其爲參軍刺史。可考而知也。今宗人坐糜國儲。奈何不講求通變于當世。可施行者。而專以固陋逆上意。吳愕。哈弗應。宰相大僚無一人讀書識國體者。以此久不決。禮侍郎陳子壯署部事。主覆奏。遂欲以守官堅執爲名高。各藩皆知上意所向。懷廷論切弗敢爭。而唐王獨貽書子壯相駁難。王素辨博。喜文詞。其書稱說典訓。援據經傳。皆有本。廷臣顧弗及。知特以諸侯厲蠱氣。持異同爲足畏而已。上尋惡子壯疏詞強諍。下之獄。衆口惜子壯者。輒以尤王。王亦浸驕薄。公卿爲不足重。當高皇帝時。諸王得巡行所部。革除後。網漸密。京師所置吏。握其事。禁私車。將從輕媮出。卽送喪至諸墳園。非詔令不許。南陽旣寇。衝八年後。彌甚。王嘗望烽火接天。思海內且大亂。終日守空宮。對僕隸拊髀太息曰。安能鬱鬱効龐涓死。此下乎。中州督撫大臣見諸藩各以輕重逼寇患。周王好行其德。福王日閉閣飲醇酒。崇王奉浮屠。戰守

事皆聽將吏所爲而南陽日陳兵自衛得材武稱然王血氣方剛恣自用又不能卹其宗人過濶淫上聞非真有淮南濟北之心伍被開章之計也上既撓羣下重骨肉漸聞諸王怙恩德驕盈不自簡束南陽要害地而王建請轉廣書辭不遜順失藩臣禮傾側擾攘之際恐有赤眉樊崇平陵方望註誤王以成狂狡之謀意不能無纖介會都門有急王請提軍入援事不行廷臣輒文致其罪上乃下詔廢爲庶人禁錮之自此諸藩慄息不敢復言兵事矣上爲討賊需餉歲百萬民力大屈有司捐薪俸有紀錄民入錢佐軍者假清卿秩優之下詔褒美風示海內焉武清侯李誠銘者慈聖皇太后姪也先朝待外戚有體太后母天下詎冑金錢私其親熹廟失御累朝所積無訾省有傳其在李氏宮省事祕人莫知侯有孽子其母微家衆不以爲兄弟齒侯亡爭財忿閔告其兄藏禁物精鏐環寶累萬萬上召見侯長子諭令輸助國以自爲名固對曰無有因發怒稍迫趣之亡何得病死上追感先后取田宅還之餘弗問誠銘長子錦衣百戶李國正國正奏莊房地土金銀外它珍寶數百萬上命遵吉解部以襄城工國瑞娶于新樂又時有上書者與嘉定爲婚姻故新樂太夫人及嘉定伯奎皆爲之請上弗許後以慈聖憑語于皇子而免曰諸王跨土連城衣租食稅此皆縣官力也今天子憂勞日昃苦征繕之不給王高枕而王一郡天下有急王獨得安耶願下明詔遣近臣諭旨其上國帑以贍軍用上曰朕以方內不靖爲諸王憂維王骨肉兄弟共吾一體詩不云乎餅之罄矣維壘之恥其詔有司弗復言久之卒莫應國初親王祿五萬石後改爲一萬石秦晉楚蜀地相埒周于後徙封皆極天下膏腴商賈百貨所輳殖其富比京師萬歷中人傳楚王

名他人子爲子。後嗣王姊張大主索貲財不能滿。宗人相告言。楚恭王無子。取舅王大之子。其家亦取家人子一人以進。乃後封通山王者也。恭王長女張郡主爲討蘆洲不應。又宗人雙橋貢王府貲五百金被鎖。郡主請寬不從。怒而發其事。上遣官卽訊。王行金累億萬。事得解。楚坐此少減耗。而四國俱完。他王雖高帝子不及也。文皇靖難後。自言我子不得與先帝子等。祿不及十之五。累聖所封後親屬漸以疎。卽恩賚亦浸薄。惟神宗四子上叔父最親。瑞惠桂在熹宗朝始之。國開邸之日淺。土瘠而多故。天下皆憐之。獨福王在兄弟中莫得以爲比。福王神宗之愛子也。母鄭貴妃最幸。王皇后無子。光宗于兄弟居長。繫中外心上。意亦素定。第貴妃早貴。願天下有出鄭氏上者。卽缺望。雖至尊亦兩難之。仗廷諍力稍自強。浸尋乃日爲離間。諸大臣調護萬端。元良旣册命。而四子同日出閣。恩寵惟均。凡以爲鄭氏也。福王大婚。費三十萬。營洛陽府等二十八萬。上非貴妃不寢食。妃一子。雖長猶不離抱。聞其將遠離。日夜泣。請之國日期者數十百。奏置弗省。最後妃弟子鄭養性亦言之。雖非至誠。願以太子名號久正。上春秋高。久病。不乘此時早就邸。爲王富貴計。何庸復待乎。妃亦心動。言之上。不能戀戀母子情。獨辦治國裝宜厚。上喟然從之。當是時海內全盛。上所遣稅使礦使數十人。月有奉。日有進。廣南明珠。滇黔丹砂。空青寶石。豫章磁。陝西異織文毳。蜀重錦。齊楚礦金礦銀。他搜括羸羨億萬計名。人主私財入貴妃掌握。擬斥十之九以資王。諸宮人中使竊言曰。王本共天下。此不足計也。上爲下詔。賜莊田四萬頃。所司爭之力。得減半。中州腴土苦不足。度山東湖廣界以充王。又奏乞江陵故相所沒產。江都至太平沿江荻洲雜稅。并四

川鹽井權茶銀自益舊制王府田聽民占而徵其賦王左右勸王多規肥饒地入府爲永業既則俾承奉諸官假履定步畝爲名乘傳列旌旗笳吹所至索輿阜餼廩無算田之良楛租之多寡肯懸其口常過汝州擅殺人山東江楚之間富家憂攘奪農夫疲供億天下騷動其請福府食鹽也于洛中設邸閣中使至淮揚支王鹽一千三百引乾沒要求輒倍中州舊食河東鹽有令旨非王店所出不得鬻淮商開中既訕晉引復滯九邊軍餉無所資上悉其故命換給長蘆然去洛陽遠以爲不如河東便弗冑改自慈聖登遐未兩月而愛子去膝下上忽忽不樂瑞王年二十有四婚未成惠桂齒相亞無選擇命羣臣交章叩閣率寢遏而福邸信使通籍中左門一日數請朝上夕報可四方奸人亡命之徒探風旨走利如鶩閔不畏死張差龐保劉成之變緣是而生然兩宮慈孝無間王亦專奉己無所睥睨訖于三朝繼續骨肉晏如原本祖宗家法之善而光廟因心篤愛爲卓絕已及崇禎中王失神考久貴妃亦前歿內官宮媪爲王中訶京師者多失勢老病死河南大亂王于國家屬尊地近在宮中時幾奪宗獨性不喜賓客智謀奇計之士莫進乎前所好惟婦女娼樂中外爲不足忌然終用敗十三年河南大旱蝗人相食王謹錄籥牡不憂念宗人百姓援兵之過洛者口語籍籍或詈道中曰王府金錢百萬厭梁肉而令吾輩枵腹死賊手南大司馬呂維祺在城中聞之惟以大計動王王不用先是秦大破李自成于潼關原餘衆散略盡自成竄漢南秦兵蹙其北左兵扼其南窘不知所爲伏一年有餘不復出食且盡謀自經養子李雙喜止之是年秋自

成令軍中盡殺所掠婦女。以五十騎突圍走。由鄖均向伊洛。河南饑民相率歸之。復大振。十二月。李自成陷永寧。殺萬安王采鏗。熊耳以西。民保聚山澤者。連拔四十八寨。遂陷宜陽。十四年正月壬寅。黃霧四塞。日皆無光。河南分守道王允昌率邑紳警備。總兵王紹禹。偕劉羅二副將。引其兵抵洛。王召三將入。賜宴加禮。出構醪犒軍。十七日。紹禹請以兵入城。王箋阻者三。不可止。劉羅二軍背東南關而舍。薄暮有叫呼聲。束苜燒土門。詐云逐賊。抵七里河。與之合。十九日。賊至。羅用其火軍反攻東城。見乘障有固志。獲保者訊。應實報曰。城守嚴。馮太守俊守南。王兵備昌守西。張知縣正學守東。王總兵暨衛推官靖忠主行檄。而西北陬爲衛分地。賊命其下向西北攻。二十日。王見事急。出千金募士。縋而出。用矛以入賊營。昏時賊漸退。夜半。王紹禹親軍反。從城上呼賊相笑諾。執王允昌。屬刃于其頸。口噤。齧索餉。紹禹從旁解軍。以手推之曰。此豈老總兵當言時耶。揮刀殺守堞者。燒城樓。開北門。賊入。王逃匿民舍中。明日。賊蹟而執之。道遇呂維祺。年已邁。爲賊反接。奮其首視王。謂曰。王死生命也。名義至重。無自辱。王瞠不語。尋遇害。賊踞王宮。醢飲。薦王于俎。汨其血。雜鹿醢嘗之。曰。此福祿酒也。維祺大罵賊死之。有兩承奉伏王屍哭。賊捽去。承奉呼曰。王死某不願生。就若乞一棺收王骨。卽齏粉不恨。賊義而許之。桐棺一寸。載以下車。兩人卽其旁自縊。東關迎恩寺僧道濟者。鄭貴妃所剃度。以替王入道者也。乘賊間。昇其襯。止廡下。祠而哭之。審理李春茂。典膳張守賢。典樂劉文魁。縋城遁。世子亦走免。遇官兵。疑腰有寶物。裂其裳。裸露道旁。得一護衛軍牽挽過。

河。廬于孟縣。訪求福王妃尚在。相見不復識。抱持哭。初賊之入王府也。珠玉貨賂山積。裝縑囊負任以入。盧氏山中。發王府中金及倉粟。大賑饑民。時杞縣人李巖。術者宋獻策。起從賊。教自成爲好言。給衆曰。王侯貴人。剝窮民視其凍餒。吾故殺之。以爲若曹。令饑者以遠近就食。男子二十以上。願從軍者。月食四十金。趨敢能爲將者倍之。從我可富貴。無爲交手死。民奔走赴之者百萬。燒王宮。火三日不絕。用雒陽掾邵時昌爲僞總理。俾守城。實棄之去。爲豫撫李仙風。于二月十日至河南府。取時昌及從逆張旋吉以下十數人梟懸之。稱恢復功。其道府推知等官皆在。惟白尙文死。不得其尸。云已爲饑民所噉食矣。叛將羅泰。劉見義。不知何以見獲。伏法。王紹禹初傳死于兵。後膠致京。磔于市。事聞。上震悼。輟朝三日。泣謂羣臣曰。王皇祖愛子。遭家不造。遘于閔凶。其以特牛一告慰定陵。特羊一告于皇貴妃之園寢。河南有司改殯王具弔綵。世子在懷慶。授館餽餐。備凶荒之禮焉。上發御前銀一萬。坤寧宮四千。承乾宮三千。翊坤宮三千。昭妃銀五百。皇考孝溫定懿妃五百。俱著王裕民冉興讓葉高標齋往。以慰卹福藩世子。嗚呼。春秋之義。大責帥。以上相專征之重。而親王不以其道終。君子謂督帥之罪無所辭矣。夫洛陽周王城。自漢以來都之。三川天下之中。地四達。善戰者所必爭。嗣昌乃專力于鄖襄。而緩備于京洛。賊因抵隙踏瑕。而王紹禹羅泰之軍。得以動于惡。乃道路所傳。有謂兩王繼陷。福弊而襄隨之者。上與羣臣弗信也。嗣昌之將行。言于上曰。臣請以襄陽爲根本。其規度襄陽城也。仞深溝。方洫而三環之。造飛梁。設橫柢。陳利兵而譏訶。非符要合者不得渡。嗣昌雖移駐夔峽。軍資甲

仗在焉。諸將左良玉以下，并帑于城中。江漢間列城數十，倚襄陽爲天險，賊之得志于洛陽也。移師汴梁，百道攻城者七晝夜。周王出庫金五十萬資守陴者，而特懸賞。有殪一賊者，予五十金。士踴籍大呼擊賊，賊未退。同時南陽、汝寧皆午道疲敝。唐新立崇，僅堞宮垣以守。上詘指念磐石諸宗曰：秦蜀遠，楚與豫接壤，而荆僻處江介，一州當有虞心。襄陽宿重兵，卽惠邸在郢中，可無恐。況襄王乎？一日，御武英方進灸，咄咄顧左右問汴梁云何。忽宗人丞傳襄府福清王有表，上推案起曰：果爾，襄王真不免矣。福清王奏曰：臣嘗澄襄王之次子也。臣藩奉國厚恩，世守赤社，不意二月初四日夜半，南門火，一城糜沸。傳曰：監軍道家丁反，臣父殿廬火亦起，融風吹之，延熾萬屋。臣睡夢中聞人馬聲，飛鏃著臣頭，目見城中兵亦與格鬪。天明賊大至，太守王承曾、保臣及臣弟進賢王嘗淦突圍出。臣遣人探父動定，始知初五日被賊執至西城樓，殺死，放火燒城，肢體爲燼，拾頭髓骨數寸以歸。臣一慟殞絕。臣宗弟貴陽王常法于西城門外被殺。臣兄已故世子宮樞盡焚，殺死蘭陽王母夫人徐氏、太和王妃郎氏、宮人李氏等四十三口。臣父國寶、內官張進喜投井得存。臣兄襄世子嘗添先于崇禎十三年十一月二十五日薨，妃聶氏繼逝。臣父前經赴告，道梗未奉愍綸，痛念臣父托體王家，沒身賊手，臣不能相從灰土，慚負天地。惟皇上早殄此賊，俾微臣雪父兄暴骨之恨。上覽之感動，命所司喪葬一如福邸禮。襄王追謚忠王，葬城西青安山。拊几嘆曰：襄洛天下形勝，而襄建瓴東南，憲王以仁宗愛子，徙封于襄，有深意。襄亡陪京，必震恐。且曰：朕爲天下討賊，浹辰之間，兩王皆以

國斃是天厭我家而翦棄其子孫也不然賊何以至此顧疑楊嗣昌獨無奏久之知張獻忠遣殺關部餉官于路竊其文書傳箭以入城嗣昌所積五省餉金弓刀火藥數十萬及守兵數千人皆歸賊洛陽國帑而襄陽軍資兩藩陷闖獻遂不可復制嗣昌在重慶聞亂返荊州將謁惠邸王命閹者謝曰先生願見寡人者請先朝襄王嗣昌慚乃縊是年東宮田貴妃薨妃上所愛幸生兩男皇五子早殤永王年少上感天下亂悽愴骨肉傷懷有老宮人及見定陵問以宮中往事稱神宗晚年王皇后稀進見福王辭之國出宮門召還數四期以三歲來入朝大漸時顧視貴妃用洛陽爲念因言孝恪皇太后病篤光宗請旨得往省孝恪目已盲兩手捫太子欲有告光宗遽曰皇父鄭娘娘待兒子厚今鄭娘娘長御隨以來孝恪悟其意嚙指曰我所嘗備極天下苦兒知之足矣復何言遂訣光宗卽位之三日懸母畫像對之拜且哭會宴駕無人譚貴妃時事者果母子耑寵擅天下耶以今觀之亦何益上爲歎歎起周皇后居坤寧宮宮禁禮重太子定王旣出閣非上命不得朝一日上坐便殿太子前致請案上有急奏河南寇以某月日破某城而上嘆曰若不知得幾見而母而動關我乎今後弗復泥常也宮中所奉宣懿康昭劉太妃者神宗妃嬪中推謹厚撫愛諸王上以主慈寧宮禮之如太母常朝歲節畢見上就便坐俄欠伸偃別榻太妃戒勿驚命尙衣謹覆之左右植立以俟頃之上覺起攝衣冠謝曰神祖時海內少事至兒子苦枝梧多難兩夜省文書未嘗交睫心煩懣輒廢餐自以年才踰壯爲國事磨耗蚤困劣在太妃前惛然不自持一至此大

妃爲之泣下。上亦汎瀾者久之。諸宮人莫能仰視。劉太妃以十五年薨年八十有六上之憂汴急也。尋聞圍解。乃由王故

得全。則大喜。既下詔褒王。且加勞曰。此高皇帝神靈憫宗室子孫。維城莫固。啓王心而降之福也。又以其

意諭秦蜀楚諸藩曰。王不鑑洛陽已事乎。苟能如周王。城何患不完。寇何患不滅。先是肅王親廟不戒于

火。祔主犧象皆亡。賊登臯蘭山。涉乾鹽池。入慶藩國界。荆王見革左。詭降欲與爲好。召入宴。盛帷帳。陳女

樂。具百人之饌。以饗兵。見者皆憂其啓寇心。荆王嘗戴小帽。過酒肆茶坊。遊戲曰。如此世界。且圖樂耳。其它王初因遠不及寇。皆以書

來省難。比李青山蠢戾于濟北。呂瘦子跳梁于湖南。益王益王端王十一世孫。定王由木之子。亦稱建昌妖人。密教實繁。有

徒。江湖海岱。亡命蠶起。而臨藍平涼。乃云宗人通賊。長沙城內有穀城主撥置。奸黨楊吐虹等爲賊內應。上以爲此同姓深恥。皆由

諸王平昔不能樹之以德。董之以教。故窮奇饕餮。棄親卽異。生其禍心。論天潢支屬。惟周爲睦。故惓惓以

周王爲宗室儀表。周自定王啓土。憲守其共德。而加之以文。東書堂集古法書。手自臨摹。勒石。暇則製樂

府。被新聲。梁園士女絃歌之。泯泯乎盛世之響焉。高皇諸子。蜀獻王好學。帝呼爲蜀秀才。妙選名儒侍講。

幄。繕寫購藏。圖書甚富。而周有中原文物之盛。比肩儷美。稍欲加尙之。萬歷初。周鎮國中尉陸樸爲宗正。

招延通儒。講串經義。以教同姓諸生。作五經稽疑。帝系世表。竭四十年之力。訪求遺書。牙籤識別。登萬二

千五百餘卷。自大內祕本所未有者。西亭竹居。悉丹鉛讐勘。西亭卽中尉竹居者。其子也。王卽趙宋故宮

爲寢城。南有繁臺遺址。四方賢士大夫曳裾來游。比于相如嚴助。它王小子侯。雞鞠狗馬。多豪少年之戲。

獨汴梁宗人瞻文詞被服爛雅左右列放鹵樽壺丹青竹素在昔高皇剖符之日備物典策申之以訓誦分之以彝器百年有道宏長詒謀燕翼子孫多彬彬三代之風詩曰世之不顯厥猶翼翼其周宗之謂乎夫國于天地命祀山川河與崧高周之望也周之始封卽憂河圯而遷洛尋復返舊都歲有事于河至端王末載發祕記讀之曰王室將衰河決爲害王告其世子以爲大感曰後二十年必驗今王立寇難作河益南徙匠人置塾準水形以測望地平河身高出王殿檁者尺有二寸每春漲嚙隄吏民刑牲沉璧走馬傳籌報水至何所與烽燧等自汴梁受圍上以中原爲急用丁啓睿爲督師赦傅宗龍用爲秦督擢巡按高名衡代李仙風爲豫撫九月宗龍兵敗死于項城秦撫汪喬年誓師出關于襄城被殺自成乘勝圍南陽總兵猛如虎戰死十一月四日南陽陷唐王遇害于麒麟閣唐王之遇害也有湘安王尙在上令附近州縣居住又唐王裕妃張氏顛沛居襄陽俟修整府第迎養舊邸十二月自成陷禹州州徽王故封地王廢專城大康王以下七郡王多死二十四日李自成引羅汝才之衆再圍汴梁高名衡偕巡按御史任濬總兵陳永福爲城守丁啓睿在許州不能戰入汴梁避賊周王盡出庫金犒師被傷者與殺賊同賞賊衝車撞擊負戶穿穴城壞二十七處皆距躍可上坦如大達永福率吏士力鬪賊飛火發機洞胸達脇愛弟親將碎于背後終不爲動矢射自成中目手燃巨礮殺其巨帥上天龍等擐甲四十晝夜鬚眉焦灼指血滲漉生馘三十三人斬一千七百十有八級城乃克全賊以十五年正月十四日退屯朱仙鎮三月癸亥賊復進爲攻城折傷士卒遂起長圍期以

必拔。上先起孫傳庭爲秦督。至是更用俟恂。率援勦官兵救汴。左良玉壁于近境。憚賊弗敢擊。汴梁食盡。人相食。九月十五日。河流驟決。其聲如雷。水沸鬱數十丈。王露次闔閣。七日。督師侯恂率總兵卜從善。以舟師逆王。王與二妃、世子、後宮貴戚三十餘人。乘夜達堤口。止于河北柳圈坊。太康伯張皇親之第。人民枕籍。死者累鉅萬。或乘高縛筏。銜繩浮渡。以水湍悍。非柎絙屋角。卽身槁樹顛。游涌而逸者。十不得一。城中淤泥反土。信宿填滿。水由來家集分三股。一直衝破汴城。至二十二日。水將與城齊。西分二股。圍住賊巢。賊奔吹壘避水。○或云。賊由馬家口決河灌城。○河決後。改從杞縣。唐邑。亳州。以入淮河。賊竟往西南一帶。易曰。地上有水比。先王以建萬國親諸侯。禹導九河。元冥効職。魚鱉咸若。玉帛來同。迨乎三后之季。汾洮弗宣。穀洛交鬪。龍蛇起陸。百川沸騰。自古記之。周爲國之分子。奄宅土中。析圭之後。麟趾發祥。騶虞告瑞。古稱魯衛。今有周京。何意獬豸。跳宕赤縣。而支祈肆虐。河伯助殃。頓使士女化爲沙蟲。廟社淪于陷井。十王之典章物采。故家之禮樂詩書。無不昏墊洪流。堙沉息壤。可不痛哉。初。李自成非能知水亡人國。效王賁之灌大梁者也。彼恃其累勝。下睢陳。捲宛洛。苟得一都會。則攔然欲自王。及見汴沒于巨浸。乃聚其徒謀返據襄陽。或曰。楊文岳以真保之兵守汝寧。崇王尙在。若秦將吏出關。而汝蔡復倚其後。中原之勢尙未有所分也。十一月某日。自成乃下汝寧。殺文岳。取崇王及世子行。賊圍急。有通謀崇王中貴。矯王

旨議降者。文岳砍柱厲聲曰。誰爲此言。吾當手刃之。王亦誓死守。或勸之去。曰。我去如百姓何。其被執也。賊令諭降州邑之未下者。王不從。遂于泌陽遇害。并世子慈煊俱死。尙有王之弟河陽王由材。王之次子慈煊亦與難。而以兵臨襄陽。福清王以社稷之鎮公子。兵至走免。是賊再克而襄再亡也。襄不言陷。言易也。惠

尤不辰。惠王諱常潤以全郢之重。鄖與沅二撫之左右我而不能一矢加賊。奉王以次于湘潭。天子以上游形

便有司之過。俾王失守。不得已下璽書慰勞焉。十六年正月□日。張獻忠陷蘄州。荆王先薨。賊下令圍王

宮。盡掠其所見妓樂。斬人初。憂王為誨盜。果驗。左良玉畏自成之逼。過武昌。以軍事謀之。楚王王又畏良

玉之逼。而恐其弗行也。嘿不應。良玉辭而下。王乃自募承天德安之潰兵。給以餉。用長史徐學顏領之。謂

之楚新兵。獻忠破漢陽。五月二十九日。于煤炭洲。以二十艘輕軍潛渡。楚新兵開門降賊。參將崔文榮。長

史徐學顏死之。故相賀逢聖。正衣冠投于水。王為獻忠所得。遺貲尚百萬。賊縛王置所乘輦。舁而沉之江。

惠王之走湘潭也。舟遇風于陵陽磯。楚士大夫從孥于王者多漂沒。王僅以免。張獻忠陷長沙。吉王惠王

走衡州。獻忠陷衡州。吉惠桂三王走永。桂王諱常瀛。皇七子李貴妃出與惠王同母。獻忠追三王于永。湖南巡按劉熙祚遣人

護三王入西粵。以身當寇。入永州死守。城陷不屈。遂殉難。時湖南諸邸。岷以他事遇于亂。榮先薨。榮憲王

子慈照。崇禎□年封。年薨。絕。武岡常德望塵而奔。豫楚十二王皆沒。而孫傳庭以十萬之衆折于河南。李自成西入關。

西安宵潰。秦王有軹道之辱。獨劉妃慟哭。以國破家亡不如死。長史章世炯自縊。自成入據秦府。僭偽號。

榆林諸將猶苦戰。力不敵。三邊覆沒。慶肅同燼。平涼受圍。四日執韓王屠之。賊渡河陷汾州。懷慶福邸德

昌王。諱由崧。即宏光。再走免。與太妃相失。河北山東諸王避寇南下。賊攻太原取晉。晉恭王十一世孫穆王長子求桂。以萬歷四十四年紹封。

入大同取代。代簡王九世孫肅鈞。以萬歷十四年進封。自成以三月十七日至京師。向彰義門坐。其左右兩人。人有識之者。曰

此晉王代王也。夫紀侯去其國。春秋是之。蜀之盟。蔡侯許男不書。乘楚車謂之失位。所以存滅國。重舊封也。先朝以空名奉骨肉。實奪之權。故處天王伯叔之尊。勢乃制于黔首。詩曰。瑣兮尾兮。流離之子。于諸王又何尤焉。禮國君死社稷。君子于襄洛也。則著之。于秦晉也。則微之。城郭壞。宗廟隳。若是而王存焉者稀矣。自成既以犯京師。國亡而獻忠于岳陽。渡江由荆門走蜀。蜀錦綺百貨甲天下。而世盛傳蜀王能作黃金。自獻王得鴻寶之書于內府。子孫善黃白冶化。然皆積不用。王恃其都爲金城石郭。蜀士大夫以蠶叢本不通中國。此遺種處。弗復多憂。成都令吳繼善江南人。才辨闊達有謀。見賊據秦蹂楚。而北都之間不至。痛哭于蜀王之朝。以書諫曰。高皇帝衆建藩輔。基置繡錯。數年以來。陪命亡氏。失其國家。此數王者。非真有敗道失德。見絕于天也。直以擁富貴之貲。狃便安之計。爲賊所利。而不思自全。此非殿下前車之鑒乎。今楚氛日惡。秦關失守。曹闖徭黃。陸梁左右。殿下付之悠悠而不恤。夫全蜀之險。在邊不在腹。若設重戍于夔關劍閣。誠足自固。否則黃牛白帝。亦屬彝庚。黑水陽平。更多岐徑。乃欲坐守門庭。謂爲設險。不可解者一也。往者蘭會撲滅。獻賊逃遁。止以蘭兵力有虧。獻地利不習。今者荆襄撤其藩籬。秦隴寒其唇齒。揣量賊情。益無瞻忌。而欲援引前事。冀倖將來。不可解者二也。至于錦城之固。不及秦關。白水之險。寧踰湘漢。此可恃以無虞。彼何爲而失守。且城如孤注。救援先窮。時及嚴冬。長驅尤易。累卵不足喻其危。厝火不足明其急。而猶事泄泄以幸苟免。不可解者三也。爲殿下計。宜召境內各官。諮諏謀議。發帑金以贍戍。

卒散朽粟以慰饑氓。出明禁以絕廝養。蒼頭蠲積逋。以免流離溝瘠。募民兵以守隘。結夷目以資援。政教內修。聲勢旁震。則可易危爲安。轉禍爲福。苟或不然。蜀事誠莫知所終矣。竊爲殿下危之。蜀世有共德。王亦賢。見其書太切。不無動。特以祖宗之法。不典兵。不與民事。而蜀撫陳士奇迂緩不達時務。巡按御史劉之渤。稍彊執失人心。皆弗能力諍。繼善再三告以高皇帝之制。于諸王寄以討賊。委之保邦。萬一不戒。以至失守。王縱不愛身。獨不恤國家。不念祖宗何。終弗從。五月而審知國信。七月而夔門傳賊遽至。成都一日數驚。國人夜呼曰。闖至矣。明日又呼曰。獻至矣。王不知所爲。謀以其宮人遜于荒。富家亦從孥以出之。渤持不可。乃已。八月四日。獻忠傅城下。王始出其金懸之市。購戰守者莫應。賊攻圍三日。夜以巨礮穴城東北。陬而震之。城崩。遂乘以入。王遇害。劉之渤罵賊死。吳繼善閣門死者三十六人。同時成都府推官劉士斗、華陽知縣沈雲祚俱死。嗚呼。蜀竟亡矣。當獻忠初入蜀。而瑞王先以漢中瓦解。奔竄于重慶。爲賊所執。殺之。天無雲而震者三。瑞王好佛。從不近女色。丞監以下皆化之。吳民有解瑞府糧者。無導行之費。輒大獲早歸。王死于重慶也。見一道氣直冲天。王端坐其中。冉冉而上。人謂之兵。解云。瑞王在宮中。衣服禮秩降等。兄弟王善地而已。王醜地。日苦兵。秦將吏不能救。資蜀帥以援。故其急也。歸蜀而卒。死于蜀。悲夫。

綏寇紀略卷九

通城擊

萬曆三十四年丙午五月十日丁丑卯刻有星自西北流東北。大如盂。赤色有光。翼日。熒惑夜犯房宿。六月。陝西地震。七月十八日乙酉。雷震朝日壇。風拔樹。大雨雹涌水。南京妖人劉元緒謀反。詭稱闢地李王。分其徒十二天。十二星。十六佛將。以長至日。李王出世。事覺誅之。八月二十一日丁巳。李自成生于延安府。米脂縣。雙泉堡之農家。與膚施人張獻忠同歲。父李守忠也。隸行太僕爲養馬戶。守忠之父海。海之父世甫。家頗饒。守忠娶金氏而無子。旣以姪李自立爲後矣。禱于華山。夢神告之曰。以破軍星爲若子。而生自成。父母異之。呼爲黃來兒。六歲教之識字。大能記憶。踰常兒。顧跳踉不可禁。守忠曰。黃來兒後當富貴。其如頑戾何。長名鴻基。改自成。從延安人羅君彥者學刀槊。頗盡其技。守忠金氏先後死。李過者。兄子也。相與爲傲盪。盡亡其父貲。乞貸于邑之艾氏。艾著姓。有爲府同知者。邑人呼艾老舉人。以自成負其子錢也。執而扶之。自成鬪狠無賴。數犯法。米脂令晏子賓者。械而游于市。將置之死。得脫。自成妻韓氏。故倡也。縣役蓋君祿與之通。自成殺淫者。偕李過亡命甘州。投甘督梅之煥所部。參將王國爲兵。國奉調遣。過金縣兵譁。自成縛縣令索餉。并殺國。遂反。安塞人高迎祥故馬賊。逃兵李成龍糾爲亂。饑民王異應之。異一

名大梁。因自號大梁王。迎祥自號闖王。馬著門表馬賊且特起也。自成于高爲甥舅。往從之。自將七千人立一隊。號曰闖將。其在山西也。有闖場天入隊。闖將皆張姓。不知其名。自成不甚著。澠池旣渡河。迎祥乃獨雄諸部。而車箱峽已困復逸。官軍稍稍知賊帥中有李自成矣。初自成西寇鄖陽。破竹山竹谿房縣。官兵追及之。賊走紫陽入漢中。連雨四十日。馬乏芻多斃。弓矢俱脫。自成大困于車箱峽。詭乞降。總督陳奇瑜受之。自成旣過雲棧。出險入鳳翔。掠隴州。勢復振。衆至十餘萬。副將賀人龍張天禮爲所敗。歛兵守隴州。自成圍之四十餘日。洪承疇檄左光先赴援。與人龍合擊大破之。自成竄入終南山。已而糾其衆東下。鳳陽之陷也。張獻忠與自成皆在焉。獻忠得陵監所教響手小奄十二人。每飲酒令之奏樂。自成求之勿與。固以請。獻忠毀樂器而後。以其人歸。自成殺之。兩人由此相失。自成與迎祥再入秦。自成從終南出。大掠富平寧州。副將艾萬年與自成同里。有夙嫌。賊攻益急。萬年曰。我早知自成無賴。曾訴之官。今必不利于我。出砦大戰。敗而被執。罵賊死。無何。張全昌、賀人龍皆爲自成所挫衄。總兵曹文詔百戰將。于真寧陣亡。迎祥自成兵益強。出關爲祖大樂所敗。迎祥自成功滁州。盧象昇祖寬大破之。朱龍橋遂走登封密縣。復歸秦。九年二月。自成走慶陽邠寧。四月。自成犯鞏昌北境。左光先曹變蛟破自成于固原之沐家營。自成走慶陽環縣。五月。自成圍綏德州。六月。自成犯朝邑。七月。黑水峪之戰。秦撫孫傳庭生俘高迎祥。磔之都市。賊黨以自成梟雄也。共推爲闖王。然自成在關中自鬪。別爲一軍。黑水峪敗。自成不在。固非迎祥死。

起而暴領其衆也。是月也。自成犯階。徵。八月。自成匿隴州山中。九月。出汧。隴。犯鳳翔。于渭河。窺渡。十年正月。自成犯涇陽。三原。四月。據階。成。十月。自成偕過天星。由七盤關入蜀。于是陷寧羌。昭化。劍州。梓潼。江油。崇寧等州縣。十一年正月。官兵破賊于梓潼。賊分隊還秦。自成走白水。六月。官兵至陽平關。自成由陽平白水。謀再入蜀。不果。當是時。秦之白水。階。徵。官兵分汛堵扼。賊既不能轉而西北。曹變蛟渡河。邀賊去路。賊又不得由江而東。惟南遶西鄉。突出漢中。越江而北。秦撫傳庭偕左光先駐漢中。乘賊奔江。斬千餘級。賊渠祁總管等謀東奔豫楚。官兵追之。至升仙口。又嚴守朱陽關。賊不得逸。祁總管降。十月。自成食且盡。總督洪承疇。偕傳庭共擊自成于潼關原。大破之。自成盡亡其卒。以十八騎潰圍走。十八騎者。劉宗敏。田見秀。谷可成。張世傑。李彌昌。任繼榮。任繼光。王虎。劉文魁等。竄伏嶠函山中。爲小盜。不復出。尋督師入援。總理主撫。獻忠。汝才。約降。我師無偵候。獲賊諜者。或云自成死。已而穀房叛。自成喜。出招其徒。復大集。秦督鄭崇儉提兵圍之。曰。圍師必缺。不若空武關一道俾之逸。而設伏于商維。鄖均。可一鼓擒也。自成乘間走。遂入楚。依張獻忠。獻忠欲圖之。覺再遁走。關部在夔陵。聞而以檄諭之。自成出謾語屈強。時賀左二將再大捷。獻忠破膽。自成爲我師困于巴西魚復諸山。其輜重在赤甲寒山。不能進。困厄數草間。自屏養子李雙喜止之。劉宗敏者。藍田人。鍛工也。有勇力。自成嘗離其大營。偕宗敏步入道旁叢祠中。惟孩兒軍張鼎者從。後僞封侯。賊中所稱小張侯也。自成知宗敏亦有歸命意。太息曰。人言我有天下分。若盍卜之于

神吉卽從我。不則亟殺我以降。宗敏曰諾。納其刀于腰。再拜三投之。皆吉。起而殺其兩妻。曰。吾今死。生從若矣。軍中壯士亦有殺妻子願從者。自成燒屯。攜輕騎間道而奔河南。河南旱。斛穀萬錢。人心螳動。杞縣舉人李巖者。初名信。熹廟大司馬李精白子也。精白原籍性倜儻非常。嘗出家粟千石賑荒。人德之。爭稱李公子。李公子父奄黨也。士大夫羞與齒。信恆以爲憾。因亂請之督府。用扞衛鄉里。權宜竊兵柄。以報其所不平。傳云授安義杞人士仇之。緣他事文致爲通賊。中州時討紅娘子賊。紅娘子。繩伎女也。獲信強委身事之。信不得已而從。後乘間竊歸。爲杞人所執。紅娘子來救。令亦惡其市名得衆。遂執而錮之。獄民之德之者曰。李公子向活我。今有急。迺殺令破械出之。李公子之在獄也。思自成旣爲衆所擁。嘆曰。今日反決矣。遂往投自成。自成聞其名。禮重之。改名巖。僞署制將軍用事。盧氏牛金星者。亦舉人也。以磨勘被斥。與其邑醫尙綱善。綱好挾妓遊。遊晉爲賊。得賊中供奉。車優逃歸。遇牛之叔。具言金星通賊狀。舉宗唾詈之。亡何。金星私歸竊妻子。宗人執首官。以車優爲徵。坐斬。後得減死論。聞自成之出河南也。謁見于牙門。自成得之大喜。僞署宏文館學士。初自成無大志。所至屠戮百姓。保塢壁不冝從。李巖教以據中原取天下。宜拊循以收人心。唱爲迎闖王。不納糧之謠。教兒童傳歌之。相鼓動。而金星進所善卜者宋獻策。身長三尺餘。上識記曰。十八子主神器。自成大悅。過城不殺。因以所掠散饑民。民多歸之。號爲李公子仁義兵。傳聞者或卽以爲自成。不知有李巖也。自成以

十三年之十二月二十一日自南陽來破宜陽殺其令唐啓泰二十四日移軍攻永寧永寧先有邑紳羅撫張論者以川將傲守論病死其子吏部郎鼎延率家僮捍禦有功會獄徒牛可敬魏之明勾賊而守城都司馬有義潛遁賊以二十七日四鼓登城殺知縣武大烈鼎延匿智井免自成殺萬安王于永寧之西關兵大振攻偃師縣一日破之知偃師徐日泰罵賊爲賊嚮割至死不絕聲河南總兵王紹禹者貪而無厭好斷軍士縑縠以自肥賊近後載重堅請入雒陽又收福王犒士三千金入其橐兵益恨乘夜反招自成入洛陽陷福邸縋城至迎恩寺爲所得呂尙書維祺亦被執自成見之于西關周公廟曰呂尙書日請兵餉殺我曹今當何如耶呂曰吾爲兵部尙書恨無兵磔汝狗鼠今日之事惟有死耳死不愧天地不愧聖賢夫何憾賊欲跪之不屈北拜闕西拜父母伸脰就刃色不變福王跌坐于地賊逼之王閉目搖首不語已而大罵因遇害鄒妃世子得脫走河北世子繼妃李氏福王選侍孟氏蕭氏李氏皆自經內執事承奉劉顯典膳錢福門正李彰雲等三十六人外執事書堂官焦如星良醫張鳴臯杜一經等十一人皆死有司則通判白守文訓導張道脉冗官武職共九人爲賊所戕守道王允昌重傷賊退後數日死餘知府馬一俊推官衛靖忠知縣張正學俱在邑紳自呂尙書以下知縣劉芳奕韓金聲行人王明同知楊萃推官常克念舉人苟良翰等多死賊從李巖牛金星策發福邸中庫金及富人之貲以號召饑民仍以洛陽掾吏邵時昌爲僞總理生員張旋吉梅鼎盛等次第授僞官月給銀八十兩取賑施贏金付之俾募兵守

而自移其軍攻汴。豫撫李仙風慰安福世子于河北。孟縣叛將羅泰劉有義亦逃至河北。獲送京師。聞自成已去。率其將高謙入雒。取邵時昌梟縣之名曰恢復。而汴梁之急。撫軍顧不在。周王乃出帑金五萬兩犒士。巡按御史高名衡、開封推官黃澍、祥符知縣王燮同設守。賊攻西北陬最急。祥符令部分捍禦有功。矢石不避。賊穴城將入。守者投之以火。賊被爇而死。積尸與城平。七晝夜不能下。始解而去。過密縣。怒而屠之。登封望風瓦解。上初落仙風職。以張克儉代之。會克儉狗襄難。卽補以按臣高名衡。而保督楊文岳得進兵璽書。先遣其將虎大威張德昌率五千人渡河。兩將從仙風于偃師。憂衆少未敢嘗賊。已而文岳親至軍。爲鳴臯之戰。賊亦漸入山。汴洛稱休息焉。仙風之在偃師。聞土賊孟三據河陰。率高謙張德昌之兵殄滅之。欲以此爲解。上尋遣錦衣衛逮治。懼不免。一夕絕吭死。初丁啓睿之出關也。聞閣部亡。將由承天入楚。楚按汪承詔以荆襄幸息肩無所事。秦軍斂漢津公私船。啓睿徘徊五日不得濟。折向鄧州。州閉門。詔之過內鄉。內鄉令不與糴。上下詔重督師事權。所過餉不給者。乏輿論。而汪承詔止於切責。亦以舍楚入豫。從賊所急。其言良是。不足罪也。于是左良玉自襄抵南陽。賀人龍李國奇之兵亦至。丁啓睿畏自成而不能已。于入豫也。見張獻忠在光固。謀于諸將曰。此亦一豫賊也。其法當攻瑕。請移軍當之。避自成莫敢擊。上乃于五月十九日出故大司馬傅宗龍于獄。拜兵侍郎爲秦督。專辦自成。宗龍年老矣。向時部曲皆滇黔人。于西北非所習。上特以其宿負用之。俾必盡死力。識者固策其不效。無何。丁啓睿左良玉大

破張獻忠于麻城。羅汝才少與自成同里閭。羅年長，弟畜之。後以穀城之役，唇齒獻忠，獻忠好凌折等，蒸浸不合。旣敗，舍之去。投自成于鄧州，請改事爲兄。自成喜。獻忠旣敗，鄧西前茅八哨之兵無所歸。自成又邀而取之。附者日益衆。袁時中者，豫土寇，號小袁營，據蒙陰之義門，窺鳳犯泗。朱大典以劉良佐之兵大挫之于龍德寺。盧九德率禁旅于界溝逐之。時中乘風雨渡河，其衆尙二十萬，往投自成。自成黠譎，工駕馭。他寇莫及也。傅宗龍以六月入關，與秦撫汪喬年謀所以平賊。喬年清正士，上初以王裕心代丁啓睿撫秦。旣因秦按臣張爾忠言其不足任，改用喬年。喬年以四月二十日聞命，諜報自成將叩關西入。喬年急跨馬傳箭，率將士趙大允等馳至商雒，修烽堠，部署未定。而宗龍適至。宗龍欲搜秦兵，括秦餉，掃境內以出。而關中旱蝗，閭左調發殫盡，未能有以應也。卽秦兵之在豫者，李國奇、賀人龍之卒隸焉。上亦遣保督楊文岳率虎大威一軍與之會。汪撫送宗龍出關曰：公破賊，喬年身率所領爲後距，相與涕泣行。宗龍旣與文岳遇，以九月初四日至新蔡，命軍中起浮橋，期以明日過河。自成亦過河，窺汝寧。我師與之值。二督宿龍口，夜召諸將謀邀擊。遲明，飛騎報賊過且盡，所畱惟殿後一軍。我師至孟家莊，諸將解鞍休士，不爲備。賊匿精銳林莽間，日盱出鬪。賀人龍之卒先奔，李國奇初接戰，不能敵，亦奔。偕虎大威、陳監軍同往沈邱避賊。而兩督自以親軍與賊相持。傅營于西南，楊營于東北。二更，保兵北隊走。有張副將者，挾文岳馬上馳去。秦督慷慨，謂任監軍、陳副將曰：宗龍當死久矣，今日陷賊中，當與諸君并志決命，不能效他人。

走也。乃召其裨校李本實、楊從義、董朝宣、陳尙才、孔臣思，所將六千人，卽文岳所置壁處，重穿塹，結壘，誓必死。文岳是夜奔項城。次日奔陳州。賀李于初九日晡時，得宗龍小帖，取二將來救，不信。曰：「此書從賊中來，庸知非僞耶？」呼沈邱令開門，令乘堙，咤曰：「若不往救，傅督師入城，何爲者？」不許。乃同奔文岳于陳州。自成見宗龍無救，于圍外穿兩壕，困之。十一日，我師糧盡，殺馬。十五日，羸馬亦盡。十六日二更，開營突圍，遂大潰。宗龍以十九日未至項城，八里被執。賊詭稱傅家將，擁之趨城。宗龍大呼曰：「此賊也！」身是傅督帥，不幸落賊手。城上速用礮擊，毋墮狡計。賊刀斫傅右脇，傷扶兩目，削鼻。礮聲起，賊退。家人盧三負其屍入城，乃絕。項人歛之于天吉寺，哭祭之。喬年聞敗，仰天嘆曰：「傅公死，討賊爲無人矣。我自知以肉餒猛虎，然不可不出以持中原心，誓師次陝縣，聞襄城新破，惶惑未敢進也。襄城諸生李永祺率父老出迎官軍，時李自成方殘葉縣，殺副將劉國能，而圍左良玉于偃城。國能之守葉也，力戰不能支，城陷，賊殺其令張我翼，而好謂國能曰：「若我故人也，何不服國能按劍罵曰：「我初與若同反，今則王臣也，奈何從賊？遂遇害。左良玉偃城之圍，始于臨潁，臨潁爲賊守，良玉兵過，殺所置僞官，而取其牛馬財物，自成怒，盡銳與爭。良玉避入偃城，自成圍之急，聞喬年之出關也，釋偃城之圍來戰。初，喬年之撫秦也，嘗被命發自成祖父冢，自成破雒後，聲勢日益張，或獻策疑其先塚有異者，上密令喬年圖之。米脂令邊大受者，河間府靜海縣舉人，後遇執，而以自成兵敗得脫，仕至廣平太守，有紀其事。紀不死餘紀。健令也。有縣役詭孫姓，實自成族，令詞知之，執而加拷，則曰：「吾祖墓去此二百里，在萬山中，聚

而葬者十六冢。中一冢始祖也。相傳穴爲仙人所定。有鐵燈檠。燄火壙中曰。鐵燈不滅。李氏當興如其言。蹟之。山徑仄險。林木晦黑。果得李氏村。村旁纍纍十六冢。中一冢發之。有螻蟻數石。火光尙熒熒然。斲其棺。骨青黑色。毛被體而黃。腦後一穴如錢大。中盤赤蛇。長三四寸。有角。見日而飛。高丈許。以口迎日色而吞。咋者六七。反而仍伏。喬年函臚骨。并蛇腊之以聞。賊後矢著其目。舉大事無成。蓋天使之也。自成爲之。嚙指恨。旣知喬年出。厲色憤踊曰。此發我祖冢者耶。聞其多馬。速圖之。勿失。喬年背襄城而舍。交綏一軍。盡覆。斂殘卒數百人。保襄城。城壞未及修。蓋門爲五日而穿潰。喬年自刎弗殊。副將李萬慶共以死。萬慶乃射

場天與劉國能俱降人。忠于王事。故書其官。以媿不能盡節者。尋詔祀襄城。

自成劓刎襄城諸生百九十人。購永祺。匿以免屠其族。自成凡再

覆秦師。獲馬二萬匹。降秦兵數萬。十一月。乘勝遂圍南陽。用大礮攻城。守將猛如虎。破以計。殺賊精兵數十。已而他門陷。如虎持短刀巷戰。大呼殺賊。手及袍袖有血數斗。過唐府國門。北面叩頭謝上恩。自稱力竭。賊剽亦以出其背。斧麒麟閣。刺唐邸于其宮。張妃及湘安王崎。輻走入楚。豫撫名衡。按臣任濬。以汴梁危蹙。貽書督師告急。丁啓睿稱獻忠在商固山中。庶幾旦夕擒。今移之救汴。恐復脫掌握。良以左支右吾。不獲已先事。自言非失策。其宛郡干陬。出于不意。卽主上無如何。下詔曲爲解。不欲明其譴也。是月也。李自成陷鄧州。知州事劉振世死之。鎮平令鍾其碩。內鄉令龔新。舞陽令潘宏。通許令費令謀。先後殉節死。唐縣、新野、稽顙迎賊。十二月。李自成陷許州。自許以南無完邑。洧州、長葛、鄆陵、陳畱、禹州、相繼陷。二十六

日李自成再圍開封。開封者宋故都。金人所重築也。厚可十丈。次亦八九丈。賊每攻城。不用梯衝。倣古法。專取瓠甃爲首功。責一甲士取一甃。得者卽歸營解甲臥。惟後退者必斬。取甃已穿穴。穴初僅容一人。漸至十人。百人。次第傳土以出。過三五步。畱一土柱。巨絙繫之。穿畢。萬人負絙而絕之。一呼而柱折。城崩矣。巡撫高名衡。總兵陳永福。于城上鑿爲橫道。聽其下有取土聲。儲毒穢以薰灌之。遇輒焦爛。賊乃卽城壞處。環試火攻法。以藥置甃中。火震甃裂。名曰大小放迸。當其衝者。無不糜碎。十五年二月十三日。汴城之圯者二十七處。將迸火而攻之。自成下令曰。今日必拔。列精騎數千其旁。距躍鼓噪。俟城摧擁以入。賊之穴城也。土石之積于外者。邱陵然。已而火作。內土墜。外土浮。內未及穿。火反外擊。瓦土之漲者及于天。數千騎殲焉。迺駭而遁。城之未穿者。亦尋丈耳。嗚呼危矣。是役也。陳永福之功稱最。撫按以下。有詔獎其勞。雖楊文岳。亦得刷陳州之恥。惟丁啓睿不能外犄角。引其軍入城。幾爲賊所乘。城旣開。而麾下散去。且軍不戢。汴人苦之。遂獲罪焉。賊不得志于汴梁。攻陳州。副使關永傑力戰被執。知州侯君耀罵賊皆死。邑紳崔泌之。舉人王受爵。等手刃賊。嚼齒大罵。賊怒而屠之。少長無或免者。睢州。太康。寧陵。考城。西華。商水。遇輒潰。邑紳通政使李夢宸。宣大巡撫張繼世。各于其地嬰城殞。歸德者嚮爲州。後因亂。故獨無藩封。不置兵。知商邱梁以樟者。故鄖撫夢澤子也。邑舉人徐作霖。吳伯裔。伯允。相與集鄉勇爲守禦。賊攻圍七日夜。以二月二十七日攀堞入。作霖伯裔伯允死。以樟被兵。尋救甦。遁于淮南。家四十口悉以燼。儀封杞縣空。

城逃。開毫亦繼陷。魯山令楊呈秀、郟縣令李貞佐、寶豐令張人龍皆死。貞佐尤烈。賊入城。厲聲曰：「驅百姓死守，知縣耳。妄殺何爲？」賊褫衣冠，倒懸諸樹。貞佐大呼，請訴上帝。賊斷其舌磔之。母喬氏及妻皆死。三月，李自成復圍開封。其下以前力攻而挫也。懼而逃者日數千人。自成乃下令圍而勿攻，持久示必克。上先期赦孫傳庭罪，召見問曰：「卿度幾何人可破賊？」傳庭頓首曰：「陛下幸貫臣死，臣星馳入關，得精銳五千人足矣。」既西行，偵汴事者曰：「賊碁置數十營，望塵莫見其際。」傳庭乃圖上方略曰：「賊衆且數十萬，臣縱得士死力，詎可一當百。以時勢料之，非練兵二萬，餉百萬不可。」上省章大怒曰：「卿面奏云何，而前後不讐？」努力練所發兵，足餉一月，卽捲甲出關，毋得逗撓取咎也。賀人龍兵潰，再逃陣，失主帥。且家在米脂，與自成同鄉里，諸賀多在賊中。傳庭在道，故爲疏請曰：「人龍，臣舊將也，願貫其罪，猶可用。」上若不得已而後許。傳庭至西安，人龍從數十騎來謝。傳庭面責數，叱壯士收縛，卽剉之，分其兵隸諸將。或曰：賀數戰有功，與左良玉威名相軋，以及于斃賊中。酌酒相慶曰：『賀風子死，取關中如拾芥矣。』夫開縣之潰，陳州之逃，誰則爲之？謂其狂獗爲賊憚者，譌也。上旣以僂人龍檄布告行間，釋故尙書侯恂于獄。因向爲良玉舊帥。起爲督，發帑金十五萬犒左營將士，激勸之。拔中州有司蘇京、王漢、王燮三人爲御史。京監延寧、甘固兵，趣孫傳庭出關。漢監平賊鎮，及保督楚蜀兵，助侯恂保汴。燮監陽懷東晉兵，部勒諸將過河，誅賞竝行。文武迭用，中外赫然。知上意決于必戰矣。于是左良玉、虎大威、楊德政會師于朱仙鎮。良玉以賊勢方盛，宜相形勢爲緩攻。大威等議不合。旣進軍，羣帥皆潰。上傳密旨，楊德政正法，德政妄議練總，以毒害天下。又剝軍善逃，罪大應死，人人快之。○

虎大威後在汝寧以攻秦中飛轍回死于雨花菴其事在良玉傳中。汴外援既絕。敵圍日固。劉澤清以朱家寨去汴八里。提五千入南渡。依河爲砦。疏水環之。謀以次結入營。可達大堤。築甬道餽粟城中。劉本逗怯。壁壘未成。賊引衆來爭。恆擾奔迸。幾不及濟。我師多聚于河北。日夜望秦兵出關。不獲以時至。開封之樵採斷。人相食。羅汝才衆亦饑。謀他徙。自成出餘糧廩之。重爲盟。畀以東城所掠爲分地。乃畱不去。九月十五日三更。河決開封。自成前後三攻汴。士馬斃者無算。積憤誓必拔。長圍半載。師老勢屈。久懷灌城之謀。顧以子女珍寶山積。不忍委之洪波。迨秦師已東。恐汴圍一疎。陽懷東晉之兵必躡其後。將憂腹背受敵。方圖改算。會汴人有計。決河以灌賊者。時城傍羊馬城。周王募民新築者。皆堅厚爲高岸。而賊營直傅大堤。我兵以爲河決則賊可盡。而城中無恐。故嚴雲京高名衡從之。早爲自成所覺。援師方鑿朱家寨口。賊已移營高阜。多設巨筏艤。驅所掠民夫數萬。反決馬家口以灌城。天大雨。經旬不止。黃流驟漲。兩口一時竝決。聲聞百里。丁夫荷鍤者。隨堤漂沒。賊營亦沉。萬人河流。直衝汴城。自北門入。穿東南門以出。流入渦水。汴人皆溺死。開封初受圍。官以城守。閱民得百萬戶。圍後民之死于疫與饑者十之二。尙得八十萬戶。水至。周王從後山逃出。率宮眷及寧鄉、安鄉、永壽、仁和諸王。露棲西城。貫雨中。撫按以下官從之。督師侯恂遣總兵卜從善。逆以舟師。推官黃澍從王。乘夜達堤口。高名衡陳永福回城防賊。侯恂嚴雲京偕監車御史王燮。擁護王及二妃世子。止河北之柳圈坊。士民從而濟者不及二萬。河身改徙杞縣、唐邑、亳州。以入于淮。賊乃拔營。

向西南而去。先汴京有散人褚生精數術言狂易不可曉事後輒奇中前一年別所知將自沉于是役也。

評云決河灌賊不意反為賊所灌上以其孤城死守泝水天災堤決事不覆較高名衡慰勞養疾歸而黃

澍召見授御史錄守汴勞也十月孫傳庭兵至南陽李自成羅汝才西行逆之傳庭以高傑魯某為先鋒

魯甘涼世將也與李自成遇于冢頭大戰高魯大破賊追奔六十餘里為高魯後距者左勤蕭慎鼎自成

之敗也羅汝才旁來救遶出高魯之後左勤執絊不習敵望而怖曰高魯沒矣遂奔餘衆聞之皆奔遂大

潰喪材官將校七十八人高魯所部死亡顧不多傳庭歸而執慎鼎斬之左勤以光先子令入馬二千匹

贖罪當傳庭出軍天大雨糧車不進採青柿以為食士卒凍饑故遇賊至于甚敗豫人所謂柿園之役也

傳庭上書自劾詔令圖功自贖是月也李自成收裕州李好為之用汝才由魯山走南陽李好從裕走唐縣自成走息縣舞陽連營五百餘里

自成復陷南陽屠之閏十一月十三日圍汝寧保督楊文岳先以援汴不利有詔戴罪防汝賊之至也監

軍道孔貞會駐東關師先潰文岳督兵戲下副將馮某戰于南湖賊礮擊南關營柵我兵之被傷者濠水

盡赤馮將軍自刎死文岳收散卒嬰城守西關參將王某北關副將趙某猶苦戰勢不敵兩將自焚營柵

收其兵入子城殺所乘馬而自殺從死者千餘人翼日賊從西北門入執文岳不屈自成曰先生朝廷重

臣自不當屈然時勢乃爾公欲何為耶文岳曰我恨無兵以殺汝今日死耳復何言僉事王世琮者初授

河南推官與賊戰流矢貫耳而不動人號為王鐵耳既就執厲聲罵賊與文岳同遇害賊墜文岳尸立牌書衛以識之因感

其忠也。孔貞會被執去，不知所終。知府傅汝爲、投河北通判朱國寶、知汝陽文師頤，俱死。賊拔營走確山，信陽、泌陽向襄

陽，挾崇王由楨及世子行。崇王與其子三人，暨河陽王、懷安王，皆被執。王後遇害于泌陽縣。○時四川援勦總兵溫如珍，以不能援汝，被劾。左良玉自朱仙鎮南

潰，退屯襄陽，諸降賊附之，有衆二十萬。大治戰艦于樊城，自成至樊，人苦左兵淫掠，殺棗、桔、燔燒之。良玉

怒，奪巨商義扁，重裝待發，身率諸軍營于高阜。漢東之人，牛酒迎賊。十二月初四日，賊趨白馬渡，良玉移

營扼之。江水淺及馬腹，賊死數千，渡如故。良玉拔營南行，鄖撫治王永祚棄城走，襄陽陷。賊將賀一龍以

十二日破德安，襄陽屬城如棗陽、令郭裕、宜城、令陳美、穀城、令周建中、光化、令萬敬宗，皆城破不屈死。賊

再破夔陵、荆門州，沅撫陳睿謨至荆，奉惠王走湘潭。睿謨平峒賊有功，荆州非所轄，奉旨故至護藩以行。自成以十八日入荊州，湘

陰王儼、伊全家遇害。二十八日，攻獻陵，陵軍柵木爲城，從城內射賊，賊發薪燒之，木城穿，遂毀享殿。三十

日，攻承天，十六年正月初二日，陷之。總兵錢中選被創歿，楚撫宋一鶴，畱守都司沈壽崇，竝遇害。知鍾祥

事蕭漢，賊以其賢戒勿殺，幽之寺，命寺僧謹視之。漢乘間裂裳爲帛，以自經。欽天監博士楊永裕投賊，自

詔有異術，能佐自成取天下，請發獻王梓宮，俄大聲起山谷，如雷懼而止。分兵掠潛江、京山諸縣，遂破雲

夢、蹂景陵。方國安諸將退屯漢口，賊先驅逼漢陽，左良玉避之。南下黃陂，亦爲凶威所讐，置僞令焉。惟鄖

陽以降將王光恩、同鄖撫徐起元設守，自成百道攻圍，終不能下。自成初攻鄖，不下，于五月三日撤營退，回襄陽，即往豫迎敵。秦兵自成入秦後，

遣兵攻鄖者凡四，光恩築砦于隘口，賊營于砦下，伐木積與砦平，將攀援上，光恩投火焚之，礮擊砦破，光恩以泥塗板，且守且築，賊以大船載礮，光恩設水砦于漢江極汎處，而以輕舟往來截殺，舟載火藥焚其

營江水爲赤。賊二十萬水陸並進。光恩以步兵伏草莽。出沒如神。賊大潰。光恩乃搗其水營。盡獲其餘糧。賊自是不敢窺鄖。光恩乘勢復均鄖。光化穀城。進圍襄陽。餉匱。還。光恩布衣蔬食。與士卒同甘苦。故人樂爲用。賊初自稱老府奉天倡義大將軍。尋進大元帥。以羅汝才爲代天撫民德威大將軍。分其衆曰標營。領兵百隊。曰左右營。各領兵三十餘隊。曰前後營。各領兵三十餘隊。標營白幟黑纛。自成獨白鬚大纛。銀浮屠。左營幟白。右緋。前黑。後黃。纛各隨其色。五營以序直晝夜。他營次第休息。巡徼嚴密。人不得逃。逃者謂之落草。磔之。且連營百里。竟日不得越禁。行囊勿藏白金。精兵許攜妻子。戒旁漁生子棄弗育。收男子十五以上四十以下爲兵。一精兵容私從。爲之主芻掌械。司磨執爨。少者十餘人。駝驢少者十餘載。過城市不令處室廬。寢興一單布幕。製綿甲。紉綻至百層。輕厚。矢礮不能入。一兵倅馬三四。冬則掠茵褥藉其蹠。曰恐惡寒也。剖人腹爲之槽。馬以此鋸牙思噬。若虎豹。軍止卽出較騎射。曰站隊。及晡方畢。夜四鼓。蓐食以聽令。所過值崇崗絕坂。騰而直上。毋得旁踰。水惟黃河阻轡。淮泗涇渭。人皆翹足踞馬背。或抱鬣緣尾。呼風而前。馬蹠所壅。闕水爲不行。下流淺不盈尺。步兵褰裳徑涉。臨陣列馬三萬名。三堵墻。前者返顧。後卽殺之。戰久不勝。馬兵佯敗。追之。則步卒之伉健者。長鎗三萬。擊刺若飛。馬兵回合。無子遺矣。其攻城也。束手降者。不殺。不焚。守一日。殺十之三。二日。殺十之七。三日。屠。殺人束諸尸爲燎。謂之打亮。城將陷。步兵萬人周堞下。防緹城者。馬兵徼于外。承其隙。巡之。張獻忠至。殘忍。所攻城。一門陷。則一門可逃。自成若覆舟于海。無噍類。由其法嚴故也。諸營校所獲馬騾者。上賞。弓矢鉛銃者。亞賞。幣帛次之。珠玉爲下。自成不

好酒色。脫粟粗糲。與其下共之。羅汝才妻妾數十。被服紈綺。帳下有女樂數部。嗜酒烹羊豚。厚自奉。自成常嗤之曰。此老傭多嗜好。不足數也。汝才有衆數十萬。倚山西孝廉吉珪爲記室。能用其謀。自成之兵長于攻。汝才之兵強于戰。兩人相須如左右手。所陷河南五十餘城。鹵獲自成十之六。汝才十之四。其下稍爲自成部衆所侵。屢以駑駘易其善馬。滋不平。汝才雖權時推奉李兄。恃舊故常自呼曹操。呼自成老齊爾。汝之自成之下宛葉。克梁宋。兵強士附。有專制心。憂汝才不爲下。間置酒讌。語挑之曰。吾與汝起草澤。不自量至此。今當圖關中。割土以分王。汝才粗疎。時又醉。張目答曰。吾等橫行天下爲快耳。何專土爲。自成意色大忤。斬黃賊帥賀一龍。馬守應者。與賀錦。劉希堯。蘭養成。歸自成于開封。一龍等卽所稱革左五營也。賀一龍卽革裏眼。馬守應卽老獼獼。蘭養成卽左金玉。賀錦卽爭世王。劉希堯卽治世王。一龍守應惡相屬。請自爲一軍。頗與汝才善。自成疑之。其下荆襄也。令守應屯彝陵。規取澧州。一龍走德安。規取黃州。一龍至黃陂。前阻水。僅收左良玉殘兵八百人。以歸。先過汝才營。屏人耳語。自成銜之不遑發。吉珪謂汝才曰。某觀李帥非容人者。今羣雄皆俛首。所頡頏者。我與革左耳。將軍何不早自計耶。汝才始懽然。然弗爲備。有黃州陳生者。客授襄陽。遇亂以才智爲自成所識。又因吉珪以交于汝才。知其間。私自念曰。吾以口舌令二賊相圖。可并滅也。說自成曰。汝才必爲變。自成不應。過汝才曰。將軍苦人以惡馬易善馬。盍以字烙之。令識別。自爲羣耶。汝才曰。善。生其爲我行之。陳生故分前後左右烙馬字。而先烙其左爲一羣。報自成曰。羅營東通良玉馬。用左字爲號矣。

自成偵之而信。盛爲具請此二人。汝才辭以疾。一龍至。宴笑甚歡。五鼓已就縛。羅兵猶不之知。侵晨。以二十騎入汝才營。托言事徑造帳中。汝才方櫛髮未竟。卽斬首持以示其下。曰。汝才反。元帥令誅之。一營大譟。自成先用賀錦。劉希堯。以收一龍之心。膺曰。趙應元。俾慰誘其衆。汝才之將曰。楊承恩。甥曰。王龍。以其兵散去。先後皆入關。從孫督師。李汝桂。以數百騎走安廬。從左帥。其中軍。楊山。旗鼓。朱養民。他將。王可懷。郝有法。及其叔。羅戴恩。皆懼伏側目。思報亦未能以定。自成見吉珪加勞勉。後因事誅之。陳生者。其謀亦爲自成所覺。見殺。自成徐按汝才軍簿。卽舊將分隸之。參之以親信。于是兩軍之士。皆屬牛金星。教以分等威。申職守。早自異于儕偶。創爲官名爵號。大加署置。自元帥以下。次權將軍。次制將軍。次果毅將軍。次威武將軍。都尉。掌旅。部總。哨總。各以等第降殺。自成諸子。錦。自成妻之弟。高必正。皆居帳中。號親信。李巖爲中營制將軍。與其弟。牟頗。簡束其下。勿縱掠。田見秀。爲人寬厚。以權將軍提督諸營事。賊所過多。所全宥。皆見秀力也。劉宗敏。嗜殺。狡悍善戰。賊倚之。亦爲權將軍亞焉。賀錦歸。自斬黃。一見輸誠。自成以爲識所從。又甚得曹賀兩營之心。而能引之不動。拔爲制將軍。在諸將之右。帥標正。威武將軍張鼎。自成養子也。又威武將軍黨守素。副之。帥標左。威武將軍辛思忠。又果毅將軍谷可成。副之。標右。威武將軍李友標。前果毅將軍任繼榮。標後。果毅將軍吳汝義。此其中權親軍也。左營制將軍劉芳亮。左營左果毅將軍馬世耀。左營右威武將軍劉汝魁。稱電右營制將軍劉希堯。右營左果毅將軍白鳴鶴。右營右果毅將軍劉

體純。前營制將軍袁宗弟。前營左果毅將軍謝君友。前營右果毅將軍田虎。後營制將軍李過。亦自成諸子也。左目眇。年少驍敢善戰。後營左果毅將軍張能。後營右果毅將軍馬重儔。又有駱應標者。亦後營。此五營二十

二將者。凡進戰視中權所向。四營制將軍各率其偏裨以從。其次則分地以定衛帥。自成在中州。所略城

輒燒夷之。無意守。既渡漢江。長驅入荆。念天下莫予難者。謀先守荆襄。次守承天德安。漸以及于汝寧。而

增置衛帥十有三人。襄陽者。賊之腹心根本地也。設襄陽衛。左右威武將軍高一功。馮雄各領三千人。爲

久戍。又有楊彥昌守襄陽。荆州、襄之上游。設通達衛。用任光榮爲制將軍。配以六千人守荆州。彝陵、楚蜀之門戶。分

通達衛。左右威武將軍蘭養成。牛萬才。兵千四百人。佐以都尉張禮。水師六百人。共爲守。守荆門州者。都

尉葉雲林。本郟縣諸生。所將止六百人。則以荆門有彝陵爲之蔽也。馬守應于已貳。改用威武將軍王文

耀。配以荆州兵六千守澧州。承天特置楊武衛。以果毅將軍白旺守安陸。左寧南會遣惠登相攻德安。白

大敗。旺又再入城。故而獻陵我師所必爭。即左營都尉馬世泰爲分駐。又以威武將軍謝應龍守漢川。防

左帥之汭流西上也。汝寧衛威武將軍韓華美守信陽。北扼孔道。均平衛果毅將軍周鳳梧守禹鄭二州。

西備關中諸鎮。既以磐牙屯據。乃改襄陽曰襄京。修故王宮殿居之。楊永裕勸以卽真。牛金星不可而止。

自成外雖寢永裕議。而心善之。頗采其言。以設官分職。置上相。左輔右弼六政府。侍郎郎中從事等官。于

要地設防禦使。府曰府尹。州曰牧。縣曰令。易印爲信。僭改崇王。由爲襄陽伯。邵陵王。在爲棗陽伯。保寧王。

某為宣城伯。肅寧王術授。為順義伯。禹州曰均平府。承天府曰揚武州。其所授偽官。自左輔牛金星。右弼來

儀以下。吏政府侍郎石首喻上猷。戶政府侍郎江陵蕭應坤。禮政府侍郎招遠楊永裕。兵政府侍郎米脂

李振聲。刑政府侍郎江陵鄧巖忠。工政府侍郎西安姚錫允。郎中從事姓名之可考者。二十餘人。郎中則

戶政府徐邱王家柱。從事則戶政府閻泰定。郭附龍。游啓運。楊四畏。禮政府劉清夢。楊輝烈。兵政府傅朝

升。邱之陶。施鴻翽。刑政府安民興。工政府蔣芬之。陶尋改為兵政侍郎。後死于襄城。尚有宣令司張翔。紀

功司李定一。而紹興徐佳者。知書數。不受職。在外則荊州防禦使洛陽孟長庚。府尹長葛張虞機。襄陽防

禦使郟縣李之綱。府尹盧氏牛佺。佺。金星子也。南陽防禦使鍾祥吳大雍。府尹江陵劉蘇。汝寧防禦使江

陵金有章。府尹江陵鄧璉。又揚武州防禦使陳薰。信陽州防禦使江陵黃閣。均平府尹鍾祥劉懋先。其府

守有丞。荆州府丞。有理刑。襄陽朱夢庚。荊州王業昌。均天吳。周。州有判。縣有簿。州牧自荊州牧韓瓚以

下。揚武州姚欽明。信陽州王璞。鄧州徐即達。祁州萬國定。裕州吳騰芳。光州方燧。印州趙之璧。尉州申毅。

高孝隨。縣令自襄陽令楊士科以下若干人。南陽吳鄧鎮平。夏之弼。泌陽康昇。湘陰張光世。南召李延大。

仲表。上蔡熊新運。西平武顯祖。新蔡徐必達。遂平杜握瑜。羅山張丹庭。確山呂承顯。光山鄭允孝。商城梁

凝。社固始。呂相圉。恩縣張文彬。商水郁宏功。沈平田維新。均平稽錫太。康姚通方。浙川鄭際明。鄆陵薄封。

賢。扶溝陳周南。中牟梁肯建。西華姚聘臨。穎王邦醇。長葛陳濟鳴。新鄭王克寬。襄城武彥芳。密縣冷英。鄆

縣。王槐允。漢陽石作霜。葵澤某。河陽蕭象新。魯山劉爾麗。郟縣周英。宜城王克聖。南陽金汝礪。保康芮作

聖。穀城陳智均。鮑一駿。光化武湛。京山蔡國瑞。潛江趙國珍。沔陽王良佑。張來當。陽張耀國。遠安王第

魁司東王一垣。梁山汪植。華容汪一洪。安陸鄧九漸。孝感田助公。內城魏文彪。應山陳當道。

自成僞號新順王。會左輔以下官。議出兵所向。牛金星請

先取河北。直走京師。楊永裕謀順流下金陵。斷運道。則燕都自困。兵政府從事。顧君恩進曰。兩人所言皆非也。金陵勢居下流。雖濟大事。其策失之緩。直取京師。萬一不勝。退無所歸。其策失之急。不如先定關中。爲元帥桑梓之邦。秦都百二山河。已得天下三分之二。建國立業。然後旁掠三邊。資其兵力。攻取山西。後向京師。庶幾進有可攻。退有所守。方爲全策。自成從之。孫傳庭之敗於柿園也。歸關中。招邊勇。開屯田。猶恐不足。法用三家出一甲首。曰壯丁。以五十金。資之西人。築樓櫓爲守望。令以一樓養兵一人。選嚴明吏爲趨辦。又自以前出關。饋糧不至。爲賊騎所乘。仿古偏箱武剛之制。載以神機。曰火車。俾得齎衣糧。彀弓弩。戰則驅之以拒馬。止則環之以自衛。州縣工匠。皆燃脂夜作。得二萬輛。卽壯丁掌戎右。而奏用降將白廣恩爲火車總兵。於西教場講肄之。時左光先者宿將。傳庭老之勿任。任廣恩。又以高杰副之。廣恩在山海。常桀傲不奉詔。大掠臨洺關西。走上不得已。命歸隸。傳庭辦賊。或以爲反覆亂人。傳庭弗恤也。高杰尤暴戾。不可法度使。特以竊自成之妻邢氏爲所切齒。又前者戰冢頭有功。故專恃此兩人者爲軍鋒。然傳庭苦不欲速戰。常中夜呼其參軍定襄喬元柱曰。我以權宜任兩人。此豈自成敵哉。且我軍初集。若遲久閑習。以乘賊敝。庶可用。其如上意何。王龍之踵楊承恩入關也。其屬三千人皆驍卒。傳庭問之以賊事。龍曰。賊勢重不可敵。然襄陽野如赭。百萬之衆。何以供。五月後必大饑。因其饑而攻之。可不勞而定。督師厲

威嚴。以軍興法從事。州郡皆震慄。關中荒。責豪右爲捐助。有不樂者。譁於朝。曰。督師玩寇糜餉。秦人日在湯火中。累上書迎上意。催戰。且傳危語以呵喝之。曰。督師苟不出關。收者至矣。傳庭頓足歎曰。吾固知戰未必捷。然僥倖有萬一功。大丈夫豈能復對獄吏乎。乃上書出關爲師期。自成在襄陽。有傳其自內浙窺商雒者。傳庭謀以秦撫馮師孔。率甘蜀二帥駐商設防。已則兼程出關。先以總兵牛成虎秦人。大族。世將家也。副將盧光祖。提興運各營之兵三千二百人。由靈陝入雒。七月二十三日。至澠池。前驅游擊張守義。與賊游兵于下池相遇。薄有斬獲。傳庭以八月十九日。率平治十營。與白廣恩期於新安來會。當是時。賊圍李際遇於登封之玉寨。聞秦師之出也。設伏於滋澗。以邀我。二十日。我師至滋澗。見道險。命下馬搜伏賊。乃遁歸龍門。二十二日。質明。我師追至龍門。而賊營已拔。畱哨騎於伊河之西。我降將楊承祖單騎馳諭。賊哨蘇某者。以五十二人歸命。盧光祖又招賊將高紀祥降之。傳庭全軍駐龍門。催孟縣之糧。別遣兵五千追賊於汝州。賊已盡奔寶豐。玉寨之圍亦已解。豫帥則卜從善久在河北。陳永福徘徊新灘。秦所式方憂賊北渡。請督師來救。於進取未能贊萬一也。自成間。秦師之出也。盡發荆襄之賊。會于河南。步騎沿河列守。自汜水至滎澤。伐竹木結筏。人佩三葫蘆。將渡河。先驅千餘人北渡。劉洪起逐之。逡巡南岸。豫撫按飛檄趨永福還兵河北。擊之。永福稱奉督師令。不敢擅離。及河北無賊。永福又以撫按檄。避督師。此所以徘徊郭家灘也。總兵牛成虎。稟稱河北無賊。惟滎澤河口。曾有百餘賊。過渡。已被劉洪起堵回。陳永福借駐郭家灘。傳庭請加客有說傳庭者。曰。公不奉駐軍雒陽之旨乎。自賊之西也。歸德修復舊城。永城繕治新城。皆不日告就。今雒城故址餘二丈。四門未墮。公下令修築。糾各寨鄉

民匠役半月可畢土功。河北流離之民聞洛陽復完，不招自集。公於此儲糗糧，開屯田，進戰退守，經略中原，繫四海之望。此祖逖之鎮雍邱，宗澤之復東京也。公盍圖之。傳庭曰：吾據關不出，猶爲持重萬全。今秦人棄親戚墳墓以從我，奈何用版築阻士氣，且賊不旋踵前送死，致寇而不致於寇，非計之得也。九月初八日，我師進次汝州之長阜鎮，僞都尉李養純迎降。聞自成在襄陽西築汝寧，及其屬邑鄧襄葉唐郟豐七城者待戰。諜者云：賊老營在唐縣，精銳屯襄陽，撤郟縣僞將吏歸寶豐，并兵設守以爲犄角。傳庭乃別遣游擊折增修從曾山間道搗唐縣，而督師自以大軍從汝州進。初十日，我師次寶豐，賊已改爲州，其守兵多，且樓櫓亦甚固。傳庭曰：我師前爭利，而寶豐或倚其後，則腹背受敵矣。諭降不下，乃畱攻之。十一日，自成來援，白廣恩、高杰、盧興、福分兵夾擊，戰小利。賊郤。十二日，自成再以精騎來援，復爲廣恩、杰所郤。我師以是夜克寶豐，擒僞州牧陳可新、州判姜渭、僞郟縣令周英、主簿劉溥、僞將蔣山、李大存、孫月等誅之。十四日，我師次郟縣，賊萬騎迎敵。我前鋒陷陣，擒其果毅將軍謝君友，砍賊坐纛旗尾。自成幾獲，捕得汝才逃兵王定，口稱賊唐縣老營。十二日夜半，爲我師所破，輜重俱盡，妻子細口被殺，一營皆哭。督師軍聲大振。會天大雨，轉道濘數尺，糧車日行三十里，士馬多饑，或勸退舍就委輸者。傳庭曰：師已行，卽還亦饑，不知破郟縣就食，遂攻郟縣破之。郟，窮邑也，得馬羸數百頭，噉割之立盡。雨不止，傳庭頓郟縣五日不能進。十七日，後軍譟於汝州，降盜陰通賊。賊突騎復大至。

賊以輕騎出汝州，白沙抄絕餉道。

我師饑且困，有流言，傳庭不

得已分其軍爲三。以白廣恩從大路。已與高杰從小路。還師迎糧。而陳永福閉營休士。須糧至。諸營進而齊發。且戒之曰。汝按甲三日。以待我。弗動也。前屯旣移。後隊亦亂。永福雖斬之不能止。乃亦引所部殿。而賊追之。及於南陽。二十一日。我師返轡還戰。賊置陣凡五重。饑民處外。步卒次之。馬兵次之。驍騎之選者。又次之。老營家口居中。我師已破其馬兵。過三重矣。遇驍騎而死鬪。將吏之怯者。惶怖欲走。陣稍動。壯士推火車者。新調發。未習戰陳。有思歸心。見馬兵之小卻也。駭曰。師敗矣。盡脫其輓輅而奔。馬兵見之亦奔。火車傾軻塞道。馬絀于局。及衡者。不得出。賊鐵騎凌而騰之。傳庭于各州縣三丁抽一名曰壯丁。造火車。約有二三萬。皆上載火礮。中載衣糧。以白廣恩爲火車總兵。在西安教場操演。法非不善。以壯丁爲不教之民。故敗。步賊手白楛遮擊中者。首與兜鍪俱碎。遂大敗。賊空壁躡我。一日夜。踰四百里。官軍死者四萬。失亡兵器車重數十萬。傳庭之退軍也。使高傑斷後。白廣恩設伏道左。廣恩懼爲賊所乘。乘兵潛遁。賊兵追躡之。傑兵大敗。獨廣恩兵得入。初自成之出襄陽也。以兵政府侍郎邱之陶居守之。陶相國瑜次子也。宜城陷。相國父仰藥死之。陶爲所得。署兵政從事。年二十餘。有姿容器略。自成甚重之。擢其官。委之筦畱務。襄陽尹牛佺雖賊相子。倚任不及也。之陶欲以奇計誤賊。遣人間道走武關。以蠟書進曰。督師與之戰。吾當詭左兵大至。以搖賊心。彼必返顧。督師隨其後。我從中起。賊可擒也。傳庭大喜。報以手書。其書爲自成邏者所得。督師與之陶不之知。傳庭恃其有內釁。連營稍前。自成故見其羸弱。以誘之。深入其計。反爲賊困。之陶果舉火報東師之至。自成驗得其詐。呼而詰之。襄縣出孫書責其負己。支解之。之陶大罵曰。我豈從若者耶。恨不能盡殲汝。

醜類以報吾君父。言未畢於口而絕。督師取僂道過河入晉。傳庭渡垣曲走闕鄉賊兵追至孟津以轉達潼關。諸將亦將其卒而至。火車營步兵俱殲焉。兵之脫者猶數千。氣傷沮不復振。高杰曰：三軍父母妻子在西安。今戰敗思歸而強之守關。此危道也。不如棄關專守西安。憑堅城以人自爲戰。傳庭叱曰：若賊已進關。則西安糜沸。秦人尙爲我用乎。十月初七日。自成率大衆攻關。白廣恩猶苦戰。高杰以廣恩賣已於寶豐。以致敗。擁兵不顧。賊從南山遶出其背爲夾攻。力不敵。關破。傑奔延安。廣恩奔固原。陳勇奔秦州。高汝利奔漢中。賊遂破華陰。傳庭收散卒。圖還保渭南。賊追及。傳庭與參軍喬元柱躍馬大呼而沒於陣。知渭南楊暄偕訓導蔡其城守渭南。舉人王命誥潛通賊。開東門。城陷。暄死之。是日賊支軍陷華州。初九日屠商州。商維道黃世清不屈死。初十日陷臨潼。十一日逼西安。主城守者爲王根子。而孫可□□練總兵專護秦王。衆寡不敵。留川兵之歸蜀者五千人助防。兵無冬裝。勸秦王以人給一綿衣。弗應。天寒。傳餐皆結爲冰。根子射書城下。開東門納賊。城遂陷。□□雜衆中逸去。巡撫都御史馮師孔、按察使黃炯、長安知縣吳從義、指揮使崔爾達死之。秦王被執。長史章世炯自經。紳士則右都御史焦源溥、大罵賊。賊先斷其舌殺之。副使祝萬齡、從容拜孔子。僉事王徵七日不食。宣撫焦源清、參政田時震、舉人席增光、朱誼泉皆死。賊放兵大掠。三日乃下令不得妄殺一人。誤者將吏償其命。改西安府爲長安。據秦府爲宮。收姬妾數百以充實之。命所司一依李唐制度。卽秦撫故署爲吏政府。都司爲兵政府。按察司爲刑政府。西安分守道爲工政府。僞

授秦王爲權將軍。世子妃劉氏慟哭曰：國破家亡，不如一死。自成遣歸其家，分兵爲三道，以追捕諸將。李過出北道，追高杰於延安。杰東走宜川，河冰適合，遂渡河入蒲州，絕蒲津以守。賊追至，冰解不得渡，乃止。田見秀出南道，追高汝利於漢中。汝利遁入蜀，尋復降。賀珍、劉宗敏、袁宗弟黨守素出西道，追白廣恩。進次固原，廣恩亦以城降。傳檄狗下邑，知蒲城朱一統、知中部朱新鏢自盡。餘從風而靡。自成發民夫大修長安城，挑濠塹，具樓櫓，視前制倍壯麗。命楊永裕閱兵於渭橋，金鼓之聲震地，毀居民屋，以大開馳道於城中。每三日，卽親至大教場校射，身御藍布袍，張小黃蓋乘馬。百姓望見黃龍旗，皆辟易。十一月，自成大會羣賊，戎馬萬匹，旌旗百里，詣米脂祭奠。墓向爲官軍所發，焚棄其遺骸。自成乃築土封之，訪求其宗人，贈金封爵以去。改延安爲天保府，米脂爲天保縣。自成又改清澗縣爲天波府。以三百騎行鳳翔，守將誘而殲之。回師疾攻，殺知府唐時明，居人俱盡。自成初入關，自以爲故鄉，所過村鎮，慰諭父老，戒有所侵暴。未一月而軍士束丁男以爲奴，突入廬舍，剽掠婦女，又以衣冠必不附已。諸舊臣故家爲鄉里所畏服者，徵而閉之空舍，加榜掠以索其金。死者并一坎埋之。家不知其所在。責渭南南氏餉一百六十萬，禮尙書南企仲。年八十三，遇害。企仲之子進士南居業，居業從兄工尙書南居益，皆被炮烙死。秦人大失望。西安都司舍人邱從周，長不滿三尺，醉入秦府，戟手罵曰：若一小民，妄踞王府稱尊，而所爲若此，何以得長久？自成叱曰：醜鬼，趣提去。初不以介意也。秦士大夫如惠世揚，耆耆人望，匍匐受僞官，然脇于凶逆，非得已。最甚者無如

張國紳首倡僭號。覬作賊相。又爲誘文太僕之室。鄧夫人進之。鄧江南令族。知史書工詩。國紳以爲必見。幸自成顧重太僕名。怒曰。若同輩不能庇其伉儷。而行媚我。叱國紳斬之。禮鄧而歸之家。白廣恩之降也。自成挈其手與共飯。相對極歡。左光先聞之亦降。陳永福猶擁衆爲顧望。自成遣廣恩諭意。永福恐其賣已。曰。汴城之戰。永福親集其矢于王之目。今窮而歸命。懼無以全腰領。自成曰。此各盡其事。何害命。取箭折之。誓不食言。諸將梁甫馬岱輩。轉相誑惑。多解甲上謁者。惟榆林不從。榆林王氏一門八元戎。世國世臣者兄弟也。尤世祿閔閱亞王。而威重過之。李昌齡西涼勳胄。以故總兵僑居其地。賊入關。制將軍李過。狗榆林。兵使者都任。率副戎劉惠兩將軍。推世祿爲帥。而與王李三公同守。賊遣辨士延安舒君睿者說之。齎五萬金以犒城中。自成爲手書以曉。譬禍福不聽。因四面環攻。城上強弩持滿。發巨礮擊之。數開城出戰。殺賊數千人。婦女小兒皆叫呼擊賊。賊穿地道。放迸崩城。諸公巷戰。力盡。都公引佩刀自裁。劉將軍罵賊。賊磔之。惠顯被縛。過神木。仰枕至二升乃絕。二王尤李爲所執。去西安四十里。曰回軍店。四公沐浴更衣。曰。將以下見祖宗也。旣入。挺立仰視天。賊欲踞之。不屈。自成曰。吾虛上將。以屈四將軍。奈何。固執不相與共富貴。四公罵曰。我大臣也。汝草竊且滅。不久毋汙我。臨死歎曰。我四人不早殄此賊。致今日真死。有餘恨。賊舉城屠之。遂以兵臨寧夏。寧夏不支。總兵官撫民開門降。慶陽猶爲我守。攻四日。陷屠之。執韓王副使段復興。知寧州董琬。邑紳麻僖。俱死。三邊盡入於賊。賊無所顧忌。遂長驅而東。過河入晉。破平陽。

殺西河王等三百餘人。平陽總兵陳尙智降。是時秦隴皆沒。惟甘肅帶河爲固。賊移兵取蘭州。甘撫林日瑞以副將郭天吉四千騎守峽口而敗。賊進薄城下。乘夜雪坎而登。日瑞及總兵馬爌、中軍哈維新、姚世儒等皆死。郭天吉軍敗還守。與苑馬寺監牧同知藍臺、州紳羅俊傑、趙宦等及于難。殺居民四萬七千人。西寧衛尙不下。賊將辛思忠攻破之。卽令爲守。於是肅州、山丹、永昌、鎮番、莊浪皆降。進兵略青海。黨守素以一軍守蘭州。置西寧節度使。以故監軍僉事陳之龍爲節度使。而秦地悉沒矣。十七年甲申正月。李自成稱王於西安。僭國號曰順。更其名曰自晟。改元永昌。造甲申歷。拜牛金星爲天佑殿大學士。釐定六政府尙書。益置學士宏文館。文諭院。諫議。直指。從政。統會。尙契司。驗馬寺。知政使。書寫房。以乾州宋企郊爲吏政尙書。平湖陸之祺爲戶政尙書。真寧鞏煇爲禮政尙書。歸安張璘然爲兵政尙書。有渭南舉人王命誥者。亦爲自成兵政尙書。餘官從自襄陽者陞賞。賊帥給珠璣瓊寶人二升。銀千兩。權將軍制將軍封侯。果毅將軍以下封伯。封子男。如汝侯劉宗敏。澤侯田見秀。蘄侯谷英。亳侯李錦。李錦目亦眇。軍中稱小李瞎子。磁侯劉芳亮。僕侯張鼎。一曰義侯。綿侯袁宗弟。岳侯某。失其名。姓其。淮侯劉國昌。伯七十二人。光山伯劉體純。太平伯吳從義。巫山伯馬世耀。桃源伯白廣恩。鄢陵伯劉某。河南人。武陽伯李佐。文水伯陳永福。其可考者也。伯以下封子三十人。男五十五人。定軍制。有一馬儵行列者斬之。馬騰入田苗者斬之。兵死令妻妾縊以從。無別配。按冊步兵四十萬。馬兵六十萬。兵政侍郎楊王休爲都肄。出橫門以至渭橋。職志環轉不絕。金鼓動地。用怖三秦。鑄大錢直白金一兩。次當十

錢當五錢。平物價。從之。設科目試士。寧紹先充考官。用定鼎長安賦。拔扶風舉人張文熙爲第一。草僞檄。宏文學士李化麟、臺諫宋衛等頌功德。張形勢以指斥乘輿。脇汧州郡。自平陽降後。再陷河津、稷山、滎河、山西、望風送款。賊以一軍上絳州。一軍上蒲州。二月。自成率其前軍過河。牛金星、顧君恩、宋獻策、參預密謀。宋企郊、鞏煇、陸之祺、張璘然以僞尙書。喻上猷、李振聲、楊王休、黎志陞以僞侍郎。皆驂乘。攻汾州破之。狗河曲、靜樂。遂攻太原。執晉王。晉撫蔡懋德殉節死。自成兵至忻州。攻代。五臺令迎降。寧武關總兵周遇吉殊死戰。兵敗被殺。自成歎曰。使守將盡如周將軍。吾何以得至於此。犯大同。巡撫衛景瑗、總兵朱三樂死之。自成入大同。殺代藩宗室殆盡。犯宣府。白廣恩官撫民書與總兵姜瓖約降。巡撫朱之馮謀守城。軍士無應者。拔刀自刎死。自成遂犯陽和。從柳溝以入居庸。真保定大名皆不守。自成以三月十三日至昌平。十九日京師陷。駕崩。其事在國史。故不著。夫自成已破太原。踰太行。蹂真保。可以直犯京師。迺先攻寧武。雁門者。蓋以宣大天下勁兵處。懼京師急而爲之援也。是以偏師行入趙地。其正兵則從兩關出代上谷。乘瓦解之勢。以盡收宣大之兵。然後轉攻居庸以進。先斷我勤王之師。而京師坐困。彼其視內外三關之勢。可從內以出。又可從外以入。而京師孤注。遂落其掌中。嗚呼。豈非天哉。自成之敗於山海。由固關而逃也。自成敗于山海之一片石。或曰紅花淀。五月初二日。又敗於定州。定州人殺僞州牧董一陽。恨其虐政也。斬其僞果毅將軍谷可成。左光先負劍走。牛金星以自成爲不足輔。頗有快快心。而李巖者。向固勸自成以不殺者也。其在京師。劉宗敏

居田宏遇故第。李巖居嘉定伯府。宗敏日殺人而巖於士大夫無所拷掠。又常以大義脫懿安后於厄。而俾之從容自死。軍中多稱之。宋獻策極與善。密說曰：十八孩兒之讖，得毋爲公平。巖雖不敢應，然殊自喜。牛金星聞之，因側目。定州之敗，鹿邑、考城、柘城諸縣令爲丁參將所誘，執送之南都。人言河南全境皆反正。自成大驚，與其下謀之。巖曰：誠予臣以精卒二萬，馳至中州，彼郡縣必不敢動，卽動亦可得而收也。金星勸從其請，旣而自成以爲疑。金星見其疑也，進曰：河南天下形勝地，且屬李巖故鄉。若以大兵與之，是假蛟龍以雲雨，必不制矣。異日者，舉中州之豪傑以與關中爭勝負，卽主上且奈之何。自成曰：如是若何，以勸我從之。金星曰：巖蓄叛已久，臣始勸從之，以安其心耳。且巖與主上同姓，前聞宋軍師讖語在衆中，欣然有自負色。今河南反，彼不候軍令，不薦他將，而自請兵，目中已無主矣。國兵新敗，人心動搖，遂欲乘機竊柄以自王，是豈復可信乎。不如除之，無貽後患。自成曰：善。明日，金星以自成命，盛爲具與巖帳飲，伏壯士於幕後。三爵後，并其弟牟執而戮之。宋獻策聞二李之死也，扼腕憤歎。劉宗敏按劍切齒，以罵金星曰：我見金星卽手劍斬之，文武不和，軍士解體，自成遂不能復戰，而席卷歸秦矣。自成旣西，徙三晉鄉紳富戶以入關中。榆次、太谷、聞關、敗、閉城拒守，自成攻破屠之，定襄殺僞官，爲僞磁侯劉芳亮所攻屠，俘壯丁膠置太原，陳永福皆殺之，屬城無不罹禍，忻州、忻州尤慘。留其將陳永福、府尹韓文銓守太原。陳永福殺晉藩宗子殆盡。身率軍過河，駐韓城爲策應。在道，怒吏政尙書宋企郊私其親故，選補多用乾州人，鎖其頸至西安，釋之，使視事如故。三晉士大夫皆迫劫以行，得蒲州人韓霖，愛其才，以爲

參謀霖知名士。久不第。故樂爲用。以故太常卿張第元爲兵政尙書。給事中耿始然爲刑政尙書。第元之從於韓城也。自成猝問之曰。爾家在河北無恙乎。第元倉卒不識忌諱。謾應曰。人皆以其爲賊官。相屠害。自成大怒。立誅之。始然懼失自成指。於刑政所奏讞。輒當之以死。牛金星謂之曰。君爲其職。奈何無所平反。始然稍敢爭執。自成手其奏。怒不測。金星密以告。始然惶恐。夫婦皆自縊。鞏煇之爲禮政。自成命以更定威儀服式。雅不稱意。指杖之幾斃。甲申八月。自成新立其祖禰廟。將以己生日往祀。煇仿古法爲山龍袞衣進。自成被之。忽寒栗索火。左右熾炭於位。禮卒不成。怒煇曰。若移兩山於肩以厭我。將加僂。金星力救免。自成性好殺。爲衆意所矯。強詐稱仁義。以扇惑愚民。旣兵敗。見齊晉多殺僞官。以背之。輒復狠強自用。嘗住韓城二十五日。鞭撻縣官。斬斫掾吏。召里甲而刑劓之。發壯夫爲丁。多所造作。徭役繁興。米荳芻茭。責之民者萬端。韓人莫必其命。戶政侍郎李天篤初論戍。尋縊殺之。妻子財物皆賞軍。延安府尹賈我祺以賊穢死於市。直指伍中愷謫爲軍牧。守以下如知鄜州袁某。三水令李三楚。朝邑令某。并其教官某等坐受納。用銅鑕斬。胥隸不敢下鄉。民有盜人一雞者論死。惴惴莫敢犯法。自成呼其下相曰。平章尙書曰樞密。自以不知書。命其下教之作字。又令講通鑑而聽之。輒用己意論臧否。少時饑困。盜主人羝羊鞭之見血。旣得志。不修布衣之怨。遇其家如故。秦人又以此異之。初自成卽僞位。天大風霾。失色心不樂。入燕都。抽矢射承天門。意有所命不中。中其偏處。旣登殿而暈眩。不能自持。歸秦。怪風作於西安。麗譙象魏。

俱敗。乙酉正月大雨雪。二月本朝大兵至潼關攻之。僞巫山伯馬世耀以六十萬衆大敗。潼關破。世耀死。自成欲返據延安。聞唐帥從黃甫川西渡。谷英李過俱潰逃。知西安不能守。令田見秀開府庫。任軍士分持去。倉廩則燒之。自成於十三日出東門至藍田。由商州龍駒寨走武關。以入襄陽。婦女細弱凍死於七盤坡者數萬。田見秀之焚積聚也。自成欲并以燕宮室市里。會其已去。見秀殿曰。秦人饑。留此米活百姓。止燒東城一樓。追及自成於商州。曰已焚矣。宋企郊等皆於道亡。牛金星亦留。而從其子於襄陽。自成至武昌。左良玉時已率衆南下。武昌虛無人。自成偕其妻高氏、李錦、李過、高必正、皆肺腑戚。諸將田見秀、袁宗弟、劉體純、劉芳亮、張鼎、吳從義、牛萬才等猶從之。其衆尙數十萬。分爲四十八部。居武昌五十日。改江夏爲瑞符縣。設僞令。運銅炭鑄永昌錢。謀奪舟南下。取宣歙。曰西北雖不定。東南詎再失之。將發而陰霾四塞。暴雨烈風。旗鎗盡折。迺以四月二十四日。改由金牛保安走延寧蒲圻。沿道恣殺掠。過迪城。命其下四十八部先發。自成令嚴。兵行無敢返顧者。通城有九宮山。山有元帝廟。山民賽會。以盟謀捍衛閭井。自成止以二十騎殿。又呵其二十騎止於山下。而自以單騎登山。入廟見帝像。伏謁若有物擊之者。不能起。村人疑以爲刦盜。取所荷鍤碎其首。旣斃而腰下見金印。且有非常衣服。大駭。從山後逃去。二十騎訝久不出。蹟而求之。則已血肉瓣分矣。彼其弑君后。毒生靈。上天震怒之日久矣。數窮氣索。猶思披猖自恣。山神社鬼。咸思剪其凶慝。卒假手野夫以斃之云。

外史氏曰。賊之所以敗者有三。曰詐而難久也。驕而難制也。散而難收也。自成天性兇殘。身所屠滅者。不知幾億萬。晚乃倡言不殺。詭以收天下之心。吾民父子兄弟。皆死於賊手。不得已姑從其令。以紓一時之急。賊又不加拊循。而僞官之虐政隨其後。愚民失望。謀起而拒之。彼自成者。初勉強於一夫之說。矯情易意。以圖就大事。既知其無成。則將恣睢哮闕。大逞其兇毒。是以初用李巖。既而殺之。蓋怒河南之叛已也。使通城不死。自成竄湖湘。闕吳越。其惡且不下於獻忠矣。安在其不殺哉。所謂詐而難久者此也。自成初盜福邸之貲。以號召宛雒。附從始衆。逮乎京師陷。其下爭走金帛財物之府以分之。此其爲利同也。始何以合。今何以散。若是其懸焉者。則以前之所招饑民。而後之所御驕兵也。兵貪則驕。驕則惰。惰則不戰而潰矣。赤眉之入長安也。侯景之破臺城也。皆不旋踵而敗。彼饑寒乞活之人。一旦見宮室帷帳。珍怪重寶。以千數。志滿意得。飲酒高會。有富貴歸故鄉之心。胠篋擔囊。惟恐在後。何暇同心膽。共功名哉。所謂驕而難制者此也。爾朱榮之料其子兆也。曰。彼止可統三千騎爲將耳。過此則亂矣。今以獻忠用寡。而自成本衆。然詎可以將百萬乎。彼於羅汝材賀一龍。殺其帥而并其衆。皆怨軍也。諸將惟陳永福。以一矢之故。反爲效死。白廣恩則性工反覆。左光先官撫民。則事急來歸。皆強服也。李巖見舉動之非宜。宋獻策恨吾謀之不用。劉宗敏以下。見自成本爲帝王而已。貴不益。又其等夷故人也。彼非側目思報。觀望鞅鞅。則懷布衣兄弟之心。詎肯俛眉叉手而爲之下。祇以狃於一勝。貪財帛子女。以形勢相從。苟有所挫。卽渙然奔離耳。

所謂散而難收者此也。當京師未破之前，彗孛直掃，黃河倒流，四方訛言，人心蠱動，逆賊如鬼蜮之蠱惑士民，如豺虎之震怖遐邇，未幾天柱傾，地維折，而猘獠饕餮之氣，亦澌然其泯滅，嗟乎！自成一盜，羊逋逃之人耳，當其盛，萬金之賞莫能購，十道之師莫能征，及其衰也，二三羗夫牧豎，奮耰鋤，擲瓦礫，而賊之血，管肢體，固已藉草棘而啖烏鳶矣。昔聞成祖築太和於蓼嶺，見者彷彿帝容，楚諸山各有特廟，詩曰：明明在下，赫赫在上，此必文皇在天之靈，痛子孫而擊其賊也。彼夫枕戈泣血之士，未能手劔以馘仇人之頭，徒使之貫瀆鬼神而降之罰，千載而下，讀其事者，恫乎有餘恨焉。

附紀

崇禎十六年，有人運佛九座進武當山，來京師，挂號，其佛高六七尺，下有車輪，正陽門外布列三座，觀者沸市，後因事洩，始知藏炮於佛腹中，欲安置九門，爲賊內應，下錦衣衛，刑部勘問，伏誅。

賊抵彰義門，宋獻策初云：此行觀兵城下，十五年始可破賊，城樓上忽墮一天啓大錢，一當五用，獻策云：此破城兆，可急攻，發一大炮，樓角遂崩。

賊將白旺之守德安也，兵甚強，且有紀律，能得其下心，當自成之敗，其軍初棄婦女，繼棄金寶，至德安已大疲，惟旺一軍完且整，兼各寨俱服，而德安城堅，旺謀守之，不肯去，自成固強之始行，追急，自成掠江州，至道士汛，又登岸入興國，與柯陳二姓交戰，互有殺傷，有王體中者，奇士，在旺軍中，自成死，旺軍

亂體中乘便刺殺旺。挾其衆以降。與金聲桓同定江西。金兵弱。王兵強。後以不肯剃頭。金用計結其左右。王得仁誘體中至都察院殺之。此乙酉七月二十九日事也。時王兵大譟。與金兵戰於城中。南昌西北民居盡燬。次日得仁撫之乃定。其後與聲桓同反者。恃其強以得白旺之衆也。

自成之敗也。李錦在榆林。唐通從黃甫川過河。以自成遇其家之酷也。故別爲一軍以抄其後。錦頗善戰。賊中號小李。與通鬪殊有勝負。其時惟榆林一隊能相持。旣而聞自成已去長安。其下大潰。故亦走。自成入秦。凡秦人之爲賊者。無不訪宗族。修墳墓。田見秀獨不然。人問之。見秀笑曰。如今天下在那裏。我要去認親。故舊有至者。密遺以金帛促之去。及敗後。劉宗敏宗族誅。墳墓發。見秀獨不知其爲何邑人。故免。

牛金星嘗在華州考諸生。其題爲所過者化。所存者神。上下與天地同流。文體改八股爲議。中格者爲縣令。

自成之待其下。惟劉宗敏、田見秀、谷英、張鼐、袁宗弟、劉芳亮、李錦、七侯者功最大。禮遇爲獨隆。其初封也。每侯賞珠一大斗。金銀一車。幣千端。士卒從北都歸。腰皆有黃金瓊寶。飲村人酒。擲金與之。或手給珠一握。無所吝。內庫錦段如布價。皆洪武時造。然服之易毀云。白廣恩家珊瑚樹高累尺。皆禁中物也。自成去長安。居民爭入其所居。搜取金銀。中夜失火。秦府被燒幾盡。惟徇民有膽力得最多。故大富者

衆關中人遇雨後。於布政司泥土中拾得珍珠。至今不絕。

歸德宋公權撫遵化之三日。而自成陷京師。分設僞將軍道府州縣官於京東。而分捕諸舊官甚急。公方出外巡徼。母丁太夫人及百口猶在遵化。遑遽欲歸。僕王楷曰。事急矣。同死孤城無益也。楷與楊俊及部下士孫之麒等數人擁護公。一日夜走白羊峪。宣府舊鎮唐珏者。爲自成執至京。加拷掠脫身亡。道遇公。遂與之俱至白羊。喘息未及定。而太平路僞將黃定以五十騎跡公。五十人皆舊卒。心不忍。公與珏及裨將殷壯猶等呼問之。中一人語稍異。珏卽躍起斬人。以其首誓衆曰。急取太平路可也。僞帥黃定方掠民間女。飾衣服鼓吹講合。忽聞公至。殊不意。忘取所佩刀。入傳舍。向上長揖。公命左右縛且砍之。定故秦人。腰間尙有小刺子。亟取以刺縛者。盡卸其衣裸而走。王楷持刀逐之。未至中門。見故吏陸魁春者帶刀入。楷急呼曰。殺賊。魁春浙人。力素弱。刀又不利。雙手持刀向定。定奔急。適與之值。正搃其胸。遂仆。衆因攢矛殺之。其黨箭從外射入者如雨。久之乃定。尙有喜峯松棚僞將馬應湖。畢三才。三屯僞將劉衷。擁衆各數千。公曰。太平已定。誰可分往殺賊者。守備米富玉者銳甚。而公有死友曰姜承印。請同行。且曰。不須兵。吾二人足矣。公壯之。飲以酒。兩人上馬。攜一大囊抵喜峯。語門者曰。宋公有密語。遣我白將軍。賊見其人少。不疑。命之進。賊方坐堂上。富玉作拜跪狀。承印西向侍。賊欣然下扶玉。玉奮力抱賊。承印以刀砍之。誤中玉左臂幾斷。玉終不釋。承印遂殺賊。環而呼曰。官兵數千且至。汝

率不得動。動卽誅矣。衆咸讐服。遂以首投囊中歸報。顧視玉衣袖重。類有物。解之血淋淋下。而玉不知。知乃昏暈絕。急以藥傅之始甦。而松棚諸處亦殺僞將以獻。蓋先後凡二日云。自成敗於關門。三屯賊劉衷不之知。公令舊總鎮孔希貴子國治潛入三屯爲內應。而自以數騎抵其壁。衷卽擁衆去。遵化城中僞道潘躍龍。僞同知張耀然。僞知縣李廷瑗亦不敢害公家。公至城下。密約舊將楊遇明張德裕等以計誅之。共得僞印七。僞官十餘人。而三協大定。於是唐珏單騎往關門乞師。公母丁太夫人泣語珏曰。吾知公百口在京師。然舉大事者不顧家。公勉之。萬一不測。吾孫卽若子也。自成恨公之殺其將。遣鐵騎數千來攻。公乘城守。出兵與之戰。賊奔潰。遵化以全。唐公至關。得遇王師。數日。王師抵京師。自成敗歸秦。公疏請歸田。不許。詔撫遵化如故。

綏寇紀略卷十

鹽亭誅

張獻忠不知其所自起。延帥杜文煥。以庚午春二月。督延綏固原兵三千。便宜剿撫。既定黃甫清水木瓜三堡。而米脂賊張獻忠所據十八寨。聞兵至。詭乞降。延撫洪承疇亦常以辛未冬十二月。撫賊張獻忠羅汝才等千九百人於黨家坪。已而復叛。相傳獻忠膚施人。隸延安衛籍。固將家子。少時從軍犯法。得總兵陳洪範救免。刻梅檀爲洪範像事之。其爲賊也。與汝才同起。河北之謠曰。鄴臺復鄴臺。曹操再出來。汝才偷取孟德以爲軍號。蹟其且降且叛。本兩人起兵時故智。不待穀房變而後知其詐也。獻忠之畏良玉。始於南陽之役。十一年春間事嘗僞爲官兵。駐南陽之東關。以詐取宛城。門未啓而良玉適至。先驅呵問爲何家兵。獻忠倉皇走。左同副將羅岱追及。射之。矢著其額。又射貫其左手中指於弓檠上。兩馬相及。良玉抽刀揚削。先拂獻忠之面。創未深。比再下而馬已逸矣。獻忠在穀城。嘗指其癥語人曰。此左將軍南陽時創我也。獻忠長身而瘦。面微黃。僿勁果俠。軍中號爲黃虎。所將三千人皆精卒。分四營。每營一將主之。其一將偏盲。有計謀。薛姓。忘其名。韓城人。首輔薛國觀之子姪行也。日夜說獻忠以約降取富貴。獻忠念有文燦主於外。國觀主於內。吾之就撫也。可以萬全。其據穀城以請也。舉人王秉真。諸生徐以顯。爲之具牒於理院。

以百口保獻忠歸命無他心。文燦受其牒，賈賂黃金蹠裹，千珠琲盈斗。他壞貨累萬萬，所謂韓城人薛某者，走一騎至京師，出入相公邸中，且以遍見諸權貴人。權貴人惟大司馬楊嗣昌卻其幣，自國觀以下，多私受之，不復知獻忠之爲賊矣。獻忠初攜新野丁氏以入，既又聘穀城敖生員之女弟爲妻，改其距城十里之王家河，故納降所駐兵處爲太平鎮。曰：吾欲與穀人同之也。自以未能放兵，不肯入襄陽，具囊韉迎臺使者林銘球於交境之舟中，拜跪有禮節。銘球亦敬勞之而去。穀士民以爲獻忠誠降，相賀於道。熊文燦則以閩海撫賊得重賄，襲故事行之穀城，不能用恩信威略相駕馭，而區區日責其寶賂。獻忠則笑謂其下曰：此欲芝龍我也。文燦既得所欲，爲之請官請餉，請關防，應之惟恐不滿。獻忠故爲要求，以逞其恣睢哮闕。文燦輒依違其間，既又聞朝議異同，不免二三其德。獻忠則怒謂其下曰：此欲劉香我也。日夜與潘獨鰲徐以顯謀爲變。潘獨鰲者，故應城諸生，與邑紳爭田不平，殺縣令以反，遂投賊。徐以顯素險譎，謁獻忠一見如舊。軍機進止，兩人實與其謀。王秉真雖以畏死從獻忠，借公車北行，規自脫，已出城矣。而追還後卒爲所脅，與於亂以死。惟明經敖某者，以廷對請獻忠老之，縱使出。既再追，而敖易服他道遁。後娶敖氏其族女，明經不之知也。方岳宗者，太守岳貢之兄，而戶部岳朝之從弟也。獻忠初以其家不貧，拘之營中索賄。既知其無錢，而方爲人任俠使氣，善飲酒，好談論，獻忠館於其家。久之頗合，嘗共飲使之嚼，方曰：無多酌我。我好酒狂。獻忠笑曰：此何害，直當痛飲爲樂耳。方以此嘗醉拳毆獻忠背，持其衣毀裂之。獻

忠壯其氣。不爲忤。其反也。坐城頭。驅百姓。犂雉堞。平之。方遙呼曰。張敬軒將軍救我。敬軒者。獻忠招安時。所以自號也。獻忠揮之以手曰。爾尙未出城耶。命急開西門。放方氏大小畢出。且曰。少遲卽不及矣。因以。免獻忠至狼戾。然以居穀城久。其叛日亦不甚殘殺。畱書於壁以告楚人。白己之叛。總理使然。具條上官。姓氏。而列所取賕之月日多寡於其下。且曰。襄陽道王瑞旃。不受獻忠錢者。此一人耳。聞者愧焉。當戊寅。之冬。穀人親見李自成以兵敗。從數十騎過穀城。獻忠與之飲。酒半。獻忠笑而拊其背曰。李兄盍亦從我。降。而僕僕奔走乎。時獻忠已有異志。自成仰而嘻曰。不可。獻忠乃資其衣馬以去。穀人皆以之。尤文燦曰。若果調度得宜。彼且縛闖自効。取小利而失大賊。文燦之肉其足食乎。瑪瑙山之戰。獻忠妻敖氏高氏被。獲。而高氏手提一嬰兒。諸將盛爲之飾。欲以居奇。能得獻忠要領。閣部楊嗣昌處之。襄陽獄中。其潘獨鰲。則又秦將鄭嘉棟大坪溪搜林所得。詭姓名黃岡劉若愚。願見督師言事。旣至。雅步稱難生。有治平天下。之略。不幸陷賊。今自歸。嗣昌詰之曰。爾之才學。爲張獻忠用盡。尙有遺餘。爲朝廷用耶。且獻忠不識字。爾。草飛檄以逆天罵國。死有餘罪。始俛首隨行。書吏尹曰。鳳謂宜早殺之。不可。乃并前所執敖氏之兄。及養。子惠二者。同繫襄陽獄。襄陽太守王承曾。年少多佻易。每晚囚簿呼名。悅敖氏高氏之豔。托以問賊中事。笑語頗洽。獄吏多與賊通者。潘獨鰲等得以脫桎梏。飼酒肉。往來不復禁。防禦頗疎。嗣昌以獻忠飄忽。嘗。移文爲戒。承曾笑曰。是詎能飛至耶。獻忠之敗官軍於開縣也。卽東走。自雲陽過淨壁。至夔州宿於乾溪。

一日夜行三四百里。攻巫山不克。出蜀。從房竹走遠安。當陽。鄖撫袁繼成邀之不能止。賊留汝才於鄖。而白率輕騎下宜城。殺督師軍使於道。取其符驗。夜叩襄陽城門。襄道臣張克儉納之。處其人於承天寺。夜半。承天寺起火。文選臺。襄王府。端禮門亦火。潘獨鰲毀狴戶。偕敖氏高氏出。獻忠至而殺襄王。因全隊未至。懼良王之議其後也。張伯鯨餉銀數十萬在城中不及問。居兩日。即去而破樊城。返而破當陽。郟縣。招汝才之兵東下。三月二十一日。用飛梯登光州北城。明日又入南城。汝寧以南。商羅息。信殘破幾盡。既聞楚撫及禁旅之在蘄州也。乃燒固始西關。分其軍爲二。一上茶山。一走應城。將以躡德安。窺陵寢。德安守將出戰。賊斃於砲矢甚衆。攻應城。應山皆不下。知隨州徐世淳。間使三走郢告急。楚撫發偏師來援。巡道趙某勒之守郢。弗遣。四月二十五日。賊墮北城以入。世淳勒馬巷戰。陷胸穴。股以死。其子肇梁亦死。兩妾及臧獲死者二十人。五月。左良玉次南陽。躡賊於西山。賊敗走。獻忠汝才合兵攻南陽。知府顏日愉。指揮王汝章禦卻之。日愉力瘁卒。獻忠破信陽。獲左兵旗幟。命其下假之以趨泌陽。初六日夜大雨。獻忠乘以入。知泌陽王士昌不屈死。明日。左良玉始至。賊已遁。良玉不戢士。泌人脫於賊者。遇官軍無噍類。賊圍唐縣。已而再攻應山。應山之民工射獵。毒弓矢。傅人肉沸爛。故賊再攻不克。七月。獻忠圍鄖陽。鄖陽有降將王光恩設守。出兵禦之多殺傷。獻忠遁走。會總兵黃得功。戲下叛兵投之。賊大振。良玉率馬進忠。吳學禮。杜應金等追之。既至南陽。疲敝未能進。獻忠又佚而之鄖西。鄖西守將兵變。障弛。賊因以入。獻忠既拔。

鄖西羣盜蟻附以萬計。方東掠地至信陽。屢勝而驕。且謂良玉爲不足畏。先是瑪瑙山之戰。良玉於獻忠實縱之。既諸將併帑於襄。襄陷而獻忠盡戕其妻息。故其下致怨。距躍思鬪。八月。良玉乃從南陽進兵。及之於信陽。大戰。斬其頭領沙某。奪馬萬餘匹。降其衆數萬。獻忠射中股。負重傷。乘夜返而東奔。郢撫邀其前。馬進忠躡其後。過龍岡、蘇家坂、兔兒溝、五股泉。四遇盛斬獲。獻忠負創不能馳。保其婦女小子。日行數十里。良玉自鄖北發追之。賊已入掌握。會轉饋在興安。由興達信百二十里。大雨五日夜。江水暴長。谿道斷絕。文武將吏首尾離置者數十處。賊已從南陽挺逸。丁啓睿檄楚撫扼蘄黃。豫撫扼光固。馬進忠趨隨。牽賊之東。猛如虎趨。皖防賊之西。督師左兵分行急躡。掃除殘醜。羅汝才有不慊於獻忠。先在内鄉徙營。走別道往詣自成。獻忠前驅八哨。又爲自成所邀取。謀者云。獻忠在上津連三坂。矢貫脛。誼誨已斃。既而訶之。在商固山中。先是革左五營竄英霍。谿峪深阻。監軍道楊卓然以說降受侮。賊且伏且叛。依林樾避炎熇。火作而入。秋高而出。歲爲常。山城長吏挈其章視事於瀕江洲渚。邑居聚落荒梗無行人。獨桐城吏民修完繕固。皖將李自春廖應登汪正國等貳於賊。托援桐爲名。沿途鈔暴。賊是以愈逞。剗含剪巢。麟潛山而殺其令。間鼓行於羅田光山之間。越險隘謀合獻忠。楚兵力遮之於刀山、燈草坪、茶溝。不能過。刀山山七十里。羅田百五十里。我兵生擒百人。繼又追之。金山鋪斬一千八百七十七級。又追之於燈草坪、邵家墳、懸中崖、茶溝。追殺五十餘里。斬一千一百八十八級。獻忠亦以奔敗而思與之通也。九月。出商城之牛市畝。取道向英山。我商固之師厚集其陣於東界嶺待之。已而監軍孔貞訓副將

王允成大破之於望雲寨。獻忠衆道散且盡。乃因汝才以奔自成。當襄陽之陷。獻忠自詡威名遠出。自成右及軍敗往歸。所從不過數十騎。自成欲以部曲遇之。不肯屈。自成將殺之。汝才力止曰。留之擾漢東。以分官軍之勢。可乎。資以五百騎。麾曰。亟引而東。合革左。此地非若所當留也。獻忠乃東奔。於道糾合一斗穀。瓦礫子諸賊。佯以推奉自成。自成兵益強。項城之潰。傅宗龍歿。丁啓睿左良玉以兵救汴。獻忠得以其間走英霍。就革左約。則大喜。十五年三月。合而進圍舒城。舒城缺令。參將孔庭訓。邑紳編修胡守恆。同飭備。庭訓兵淫掠。舒人逐之。庭訓怒而降賊。教以衝棚穴城穿數處。守恆督守堙者塞之。賊射札約降。守恆燔諸堞。四月初三日。城陷。賊縱守恆腹。以矛數十創而死。未幾。六安州亦不戒於守。州有川將覃世勛。乙邦才。王憲設守。獻忠約豫寇袁時中屯於板山。世勛拳毆知州朱謀赤于廷。爲州人所逐。遂通賊。城陷。獻忠取其郊保蓮花寨之民以益其軍。五月。獻忠陷廬州。大守鄭履祥死之。獻忠屯舒城之七里河汪家灘。令土人刈麥。候騎至白露寺。去廬八十里。廬道臣蔡如蘅贖貨而虐。衆不附。賊謀者滿城中。盲弗知。學使者徐之垣以試士至。賊僞挾書囊筆。襲儒衣冠以入。漏三下。卷甲而趨之。城上舉火應之。垣如蘅及合肥令湯登貴縋城遁。廖應登時守陴。賊已登。猶勒兵巷戰。殺十數人而走。太守及于兵遇害。獻忠尋陷無爲州。六月。獻忠陷廬江。還屯舒城之白馬金牛洞。習水師於巢湖。合老哨三十二營。小哨二十四營。會皖口。七月。復陷六安。獲男婦悉殊其臂。盧九德以黃得功劉良佐之兵救之。營於夾山。再戰敗績。江南大震。初

漕撫朱大典專辦五營。無功落其職。改用高斗光爲鳳督。半載而失事者五城。爲給事時敏所糾。與皖撫鄭二陽俱逮治。而起馬士英於謫籍以代之。兵侍郎馮元飈言於上曰。巢湖環八百里。經兩濡口達大江。孫吳所置塢屯兵。爭衡曹魏。今舍之以資寇盜。俾收舡艘。窺天塹。南都危矣。九月二十四日。總兵黃得功。劉良佐等。大破獻忠於潛山。斬首六千餘級。獻忠之在巢湖也。焚樅陽。奪商舟百餘艘。募擢船卒謀南下。聞得功兵至。走而營於古城長嶺。潛山之險阨處也。得功等以夜半至。緣山背譟而升。賊大擾。越崖澗奔。我師追之。自古山。天井湖。老鶴頭。黃泥港六十里。橫尸無算。奪畜產數萬。救回難民數萬人。賊腹心謀士。婦豎皆盡。於是散而西。便道攻桐城不下。遂走蘄水。官軍以鳳皖急謀東備。去而擊袁時中於潁。十一月。獻忠乘虛出自天堂山。拔營至三祖寺。以三百騎襲破太湖。十二月。遂攻桐城不下。當是時。左良玉避李自成於襄陽。從武昌東下。盡撤楚兵以從。蘄黃諸城。集土團之不能勝甲者以守。獻忠聞之。舍潛太而攻黃梅。知縣事張聯芳遁。民之逃於太白湖者僅以。免。獻忠疆鶩而猜。往時與汝才攜阻。革左亦以此不附。楚士大夫僕隸之盛甲天下。麻城尤甲於全楚。梅劉田李強宗右姓。家僮不下三四千人。雄張里閭。其泰已甚。寇旣作。思齊以尺伍爲捍蔽。聽其下糾率同黨。坎牲爲盟。曰里仁會。諸家競飾衣甲以誇耀之。其人遂炮烙衣冠。推刃其故主而投賊。獻忠名曰新營。倚爲導。蘄黃凶黠少年多歸之。故中寇禍。此十數城尤烈。十六年癸未正月。破廣濟。尋破蘄州。三月。蘄再屠且盡。蘄先期有飛雀萬餘。投南城濠樹杪。發火火器。

不熱自震。鬼白晝墻上騎而擲揄人。守道許文岐初設守。有楊毛二將爭言不平。鎮軍兵內間應賊。文岐被執。至望華山不屈死。荆王先一年薨。桂妃及世子遁至九江。幸弗及。黃州南城門哭。五日三月。破蘄水。黃人聞盡逃。惟女子不及行。二十四日。賊入。擇其姣麗者驅以犇城。緩者斬指墮腕。血滲漉淋壁間。三日城平。乃殺而投之以填塹。黃有惡子張以澤。先期集亡命迎賊。生員李時榮拜馬首降。四月。獻忠連破麻城里仁會之首曰湯志。殺諸生六十人。而推其中之與已合者曰周文江以應賊。賊改麻城爲州。以文江知州事。故金吾劉僑獻二妾數萬金於賊。以免。於是張以澤李時榮等獻策渡江。招星辰湖漁人具舟待。濟賊犯漢陽甚急。武昌賀相逢聖。因長史徐學顏入見楚王計事。王命中人出高皇帝分封時金裹交椅。一曰。此可佐軍。他無有。逢聖哭而出。武昌參將崔文榮者。壯烈士也。歎曰。事迫矣。潛師渡江。襲賊。斬六百級。衆不敵。乃還。漢陽陷。楚省士民宗室初匿保通城崇陽山中者。爲土人所苦。挈孥以歸。謀撤江上兵嬰城守。文榮曰。守城不如守江。團風煤炭鴨蛋諸洲淺。不及馬腹。縱之飛渡而嬰城坐困。非策也。五月五日。賊從團風渡襲武昌縣。入之。縣去會城百里。邑中虛無人。賊出其軍駐樊口。文榮乃營於郊。扼之於洪山寺。旣而斂兵入城。以副將胡某守洪山。是時賊大營尙在江北。會楚府募兵官張其在者罪被笞。往投之。盡以軍情輸賊。而李時榮之族居省城約內應。二十三日。賊全軍從鴨蛋洲畢渡。營於葛店。二十五日。先驅至華容鎮。踰日抵洪山。時胡副將退入城。而賀逢聖崔文榮壁武勝門。賊以二十九日傅于堞。文榮盡

力拒守。賊大掠金沙洲。攻轉急。道臣王揚基傳箭開門。詭言有事漢陽。同推官傅上瑞棄城遁。楚府新兵開保安文昌二門納賊。文榮方出鬪。回兵闔城扉不及。躍馬鳳凰山。持矛大呼。殺三人。賊攢槊刺之。洞脅墮。徐學顏左臂殊。右手持刀不仆。被支解。游擊朱士鼎。賊斫其左右手棄之。士鼎縛筆於臂。作書乃殫。逢聖衣冠北向再拜。賊揮之去曰。此賀佛也。賀曰。我大臣不可苟活。又北拜哭。自投滋陽湖。王會橋下。屍沈百有七十日而不壞。有土地見夢於滋陽湖濱之人曰。我等守賀老爺甚苦。汝等收去。明日浮出。武昌通判李毓英全家自經。邑紳馮雲路熊雯罵賊死。明生員者驅妻子入井中而已從之。人號爲明井云。楚王被俘而沉之江。妃自殺。獻忠見其庫中金。歎曰。有如此而不設守。朱鬍子真庸兒也。賊宣言宗室送降名者弗殺。楚宗多投牒願從。或有平人攙其中冀以免。旣而白刃交下。欲自辨頭已落。先是有異人呼於途曰。一羣猪屠伯至矣。果驗。男子十五以上二十以下。錄爲兵。餘連項就戮。賊持刀者腕爲脫。乃佯開漢陽門縱之去。門偪水。人驚呼蹈籍。鐵騎圍而蹙之。江中自鸚鵡洲達於道士泖。浮齒蟻動。水幾不流。踰月。人脂厚累寸。魚鱉不可食。婦女別而纍有殊色者。入婆子營。亦置隊長。監以賊目。而收其值給軍用。獻忠據楚王第鑄西王之寶。改武昌爲天授府。江夏爲上江縣。以周文江爲兵部尙書。張其在爲總兵前軍都督。以李時榮爲巡撫。謝鳳洲爲守道。蕭彥爲巡道。陳馭六爲學道。給有僞敕印。以周綜文知天授府。沈會霖知漢陽。黃元凱知黃州。開科試士。取七十八人。補二十一州縣官。并佐貳。各賞銀有差。遣人招興國州柯

陳二姓兵降之。以湯志爲僞遊擊。守麻城。防鳳皖。以張以澤爲僞總督。鎮蘄黃。李時榮死。用謝鳳洲代之。漢口人周五周五卽周洪鄉者。首其地富人多亡匿。出兵搜牢。獲千餘舟。士女赴水溺者無算。是時李自成兵至漢陽。聞獻忠先期得。怒貽書恫喝之。而左良玉以其軍西上。遣總兵方國安、副將徐懋德、馬士秀、破賊於蘄州黃石港。楚諸生程天一集鄉兵二萬。夜擊賊於大冶。擒僞知縣奚鼎鉉殺之。沈會霖聞風遁。官兵次黃州。白雲寨長易道三執僞知府黃元凱。遂復黃州。初獻忠踞武昌有大志。故於屬城不甚殘殺。嘗題詩黃鶴樓。令其下屬和。詐收人心。發金以賑武昌漢陽難民。已聞楚師漸集。乃畱張其在謝鳳洲等守城。以養子名四虎者駐金沙洲。而已率大營爲浮橋於金口。悉衆西渡。分軍爲三。一軍白羅山。一軍白石磯。一軍蒿洲。屯舟師於湖中。息馬山谷間。將以窺岳州長沙。未發。於是左營諸將毛顯文、常國安、郎啓貴、于自成、段鳳翔、秦天祿等連營而前。次於陽邏堡。蘄黃四十八寨民兵皆應。常國安以舟師先進。賊騎百餘夾江而射。國安轉戰。自白雲閣至金沙洲。四虎先期遁。我師奪其舟百艘。賊騎反走。是夕官軍退屯漢口。翌日進攻各門。賊開漢陽門出戰。我師逆擊於鱖魚套。敗之。遂乘以入。張其在焚黃鶴樓及宗人府第俱盡。率諸賊開保安門西走。斷王會橋以防追者。謝鳳洲自殺。僞知縣漢陽燕某、蒲圻涂良極、黃岡王爾忠等悉被擒。鳳督馬士英屯壽州。遣六安諸生黃鼎潛行入麻城。諸寨謀之。劉僑田、生蘭、周從極等說周文江以反正。斬賊將方子雄於鱖魚套中。擒湯志數其四罪磔之。傳首壽州。我師別將狗興國、大冶監軍道王

瑣屯武昌。沔陽知州章曠曠之初從沔入漢口也。江上無一舟一人敢行者。曠獨從一廚。駐漢陽黃安黃陂皆自殺其僞令。上流三郡悉定。獻忠已率衆西行。左兵鐵騎營追賊。及之於金口。擒其殿後僞總兵鄧雲程殺之。獻忠時已陷咸寧蒲圻。岳州大震。沅撫李乾德總兵孔希貴監軍道許璟率兵二萬守陳陵磯。乾德思以計破賊。許其民將妻女出自匿壯士健馬。詭稱父老約降。賊入盡殲其前部。別四人耳以歸之。賊憤而致死於我。乃蔽林植旆爲疑兵。埋大砲積薪翳之。賊誤舉燭則迸裂。銃卒燔五十騎。再置巨艦中流。計矢石可及卻不進。賊連弩注射度且盡。卽突擊我師三戰三克。賊更番迭休。驅其衆二十萬百道仰攻。不能支。乾德璟走。希貴退屯湘陰。已而亦走。獻忠旣得岳。謀過湖。卜於洞庭神者三不吉。投琰大詢。斂千艘於湘潭。將渡風作。覆其百艘。獻忠怒而還岳。連峩艚載婦女積薪灌油投以炬。延燒四十里。夜中水光如晝。遂溯而逼長沙。長沙故吉邸封處也。惠王之去荆州走湖南。舟覆陳陵磯。宮眷溺。王僅以身免。其入長沙兩王相見日憂賊。顧不知修備。去長沙六十里有烏道可柵而守。推官蔡道憲力請之。王自堞其宮垣。擊檄徼巡。不能有以應也。巡按御史劉熙祚檄長沙總兵尹先民副將何一德以萬人守羅塘河。孔道貴屯三稍磯。而道憲釀官錢爲柵斷陸道。柵不盡成。賊入之。先民一德降。楚撫王聚奎時在城中。事急。又以其下返走江夏。李乾德氣沮索。偕熙祚道貴奉吉惠二王走衡州。賊傅城下。呼道憲趨之降曰。吾軍中知爾名。毋自苦。道憲手注弩射之。三日城陷。嚼齒大罵賊。遂遇害。健卒林國俊等九人追侍道憲不去。

賊初勸道憲降。國俊曰：如吾主可降，亦去矣。不至今日，賊云：爾不降，亦不得生。國俊曰：如我輩願生，亦去矣。不至今日，賊并殺之。內四卒奮曰：願葬我主骸而後就死。賊義而許之。四卒解衣裹道憲骨，葬之南郭。乃自剄。獻忠封先民一德爲僞伯，以蒲圻令李鳳起知岳州府，通守任維弼爲長岳道，邑紳史可鏡者降賊，僞授長辰常巡撫。賊去，爲官軍所縛。李乾德加拷訊，械至南都伏法。可鏡固省垣有聲者也。其末節如此。獻忠尋破衡州，桂王走永。獻忠拆桂邸殿材，至長沙造僞殿，令尹先民守衡州，而追三王於永。劉熙祚親督水師禦賊，遣中軍護三王南入西粵而已。入永州死守，奸人內間，城陷被執，題詩永陽驛，被殺於寧鄉孔廟中。是時死難者：湘陽令楊開，衡陽令張鵬翼，東安令陳道壽，而開以闔門殉云。獻忠破寶慶，于常德被兵尤酷。常德故督師楊嗣昌所居地也。初督師修築新城甚整，名爲衛榮邸，實自固。比獻忠入湖南，榮王薨，世子幼，王弟仁和王奉王太妃姚妃走辰溪，吏民多隨之。獻忠修舊邸于故相已去常德，復還發其祖父冢，殊體焚骨，葬有年矣。乃見血焉。獻忠圖辰州，自桃源以上大山峻嶺，石灘險不可上。土司兵守辰龍關乃已。江西袁州于湘陰交境，賊將張其在蹂躪出入。左兵已收，而復陷吉安，僅能自守屬城。永新安福皆破，再陷建昌撫州南豐等邑。廣東南韶府屬城俱逃。道臣王孫蘭請救不應，憤而自經。潯桂賀全之間，蔑有固志矣。岳州亦已復再失。左兵駐武昌者咸震動。或有獻計東下取吳越者。獻忠終忌良玉在，乃決計入蜀。蜀撫陳士奇者，閩之能文家，性傲率無他籌略。緣劾免候代，軍不放糧，無與分遮十三隘口。

賊至巫山梅子坡而饑。以無兵故入之。甲申正月夔門陷。士奇出兵扼重慶。巡按御史劉之勃守成都。二月賊在萬縣。湖灘水漲不得上。畱屯者三閱月。民皆逃避。賊誘以降者不殺。既出。悉驅之入水。賊徒健鬪者十餘萬。負載者倍之。置橫陣四十里。兩岸步騎夾舟進。安行以入涪州。涪守將會英亦閩人。向以偏裨著功於夔門。涪守道劉鱗長特器重之。士奇之在重慶也。命其將趙榮貴扼梁山陸道。而英與鱗長守涪。以扼江。賊至。榮貴望風走。英與戰而敗。退至五里望州關。賊追砍其頰傷。英手殺數人。跳而免。與鱗長遁之川南。重慶下流四十里曰銅鑼峽。賊之由涪上也。江路所必經。士奇宿重兵以守。獻忠以六月八日入涪。分舟師泝流犯峽。而已則登山疾馳一百五十里。破江津縣。掠其船順流下。不三日而奪佛圖關。重慶山壁立而水環之。惟南錦門佛圖關通一綫。賊既得關。則銅鑼峽反出其下。兵驚擾不能支。賊發民墓。凶具負之以穴城。而置大砲爲火攻。二十日。城遂陷。瑞王遇害。撫臣陳士奇。太守王行儉。巴縣令王錫被殺。錫罵賊尤烈云。王之奔自漢中也。關南道陳羽白與之俱。隴西士大夫多挈妻子從。故衣冠死者甚衆。王在執。天無雲而雷震。賊祝曰。若再雷者釋之。既而王竟不免。成都之聞賊急也。蜀王謀遷於滇。劉之勃持不可。內江王力與之爭。王既以六月十三日成行。守門卒洶洶亂。輜重婦女有被掠者。事遂已。是日大雨雹。雷震王寢殿。城中人奔恐。七月。新撫龍文光。總兵劉佳允。率官軍三千從川北來。謀設守。諸王大姓逸去者半。八月之五日。賊騎兵從資陽。水兵從洪雅。新津薄城下。佳允出禦敵。既接戰。大敗。賊四面縱火。文

光急遣人往灌縣決堰水。注錦江以益城濠。初九日。大雷電雨如注。守陴者不能立。賊火攻一如取重慶法。西北陬錦江樓遂崩。不踰時而灌縣之水始至。則城已陷矣。蜀王率宮眷沒於井。文光佳允投浣花溪中。之勃被執。強以官不屈。賊縛於端禮門外。攢矢射之。至死罵不絕聲。推官劉士斗兩令成都吳繼善華陽沈雲祚皆先後死。士民爭門走。阻於城闔不得出。裸袒塗炭。驅之至中園。中園者。先主練兵處也。獻忠愛將自平東將軍某以下。撫南曰劉文秀。安西曰李定國。定北軼其名。尙有艾能奇。張能第。化龍及馬元利。共十人皆養子也。是役也。獻忠將盡屠蜀人。平東流涕諫曰。王轉戰三十年。所過屠滅無尺寸之地。以守。非將士相從意也。今出萬死爭斯土。庶幾爲王成霸業耳。若又屠其衆。某等何用生爲。請王手中劍。刎頸先百姓死矣。獻忠乃止。列其兵爲甬道。閱民而過之。壯男子少婦皆入其營中。民父子夫婦失散。巷市搜牢一空。獻忠以十一月十六日卽僞位。稱西王。國號大西。改元大順。以成都爲西京。用汪兆麟爲左丞相。嚴錫命爲右丞相。設六部尙書。於殿前賜袍服。以蜀府門外屋爲朝房。僞相以下朝罷議事。首議開科取士。以漢川樊某爲狀元。賊自爲一文。歷評古帝王。以楚霸王爲最。謂之御製萬言策。頒布學宮。自爲聖諭六言刻諸石。嚴錫命作註解發明之。論曰。天以萬物與人。人無一物與天。鬼神明明。自思自量。以兵脅蜀士大夫。有不至者。抵以法。沒入其妻子。敘州尹仲被執。賊重其名。欲官之。仲奮罵不屈。被殺。給事中吳宇英亦以不屈死。他污僞命者。亦終不免云。平東有事於漢中而還也。僞臣連名狀迓之於郊。平東不敢隱。獻忠怒其沿故朝陋習。按

名棒殺二百人。或有以戮朝士太甚爲言者。獻忠笑曰：文官兒怕沒有人做耶。創爲生剝人法。若皮未去而先絕者。刑者抵死。嘗用南充江鼎鎮爲禮部尙書。彭縣龔完敬爲兵部尙書。鼎鎮以郊天祝版不敬。杖之百。闔門自經。完敬以道不治。用前法。剝實以藁衣冠。以狗於市。僞祭酒某以生辰受諸生禮。僅值十錢。其誅法亦如完敬。召諸生集而觀之。聘井研陳氏爲僞后。封其兄爲國戚。不十日。陳賜死。兄及兩尙書皆極刑。僞官朝會拜伏。呼癸數十下殿。癸所鯁者。引出斬之。名曰天殺。人莫得而測也。分其兵一百二十營。虎威豹韜龍韜鷹揚爲宿衛。設都督總督領之。城外立大營十。小營十二。諸門各設一兵部二都督。以譏訶出入爲保甲法。甚嚴。民出城者。先期報某甲姓名。以某事出。約某日歸。合符驗而人或踰數。歸或失期者。十家梟斬。禁其下勿得觸諱。凡郡邑人物犯必改。石碑亦鑿其字。否者立死。左右有訶事小兒數千。夜則周行街巷聽人語。犯者白堊識其門。黎明而收者至。俚語曰：張家長。李家短。有犯者亦在收中。獻忠笑曰：此我家勝自成之讖也。釋之。禁民畜馬。嘗考武生而無馬。命牽已馬之獮劣者數百匹。驅之使騎。旣上。發巨砲。又合營大喊以應之。馬驚人墮。蹂爲肉。斃賊撫掌大笑。蜀太醫院有舊製銅人。賊以楮幕其關竅。召諸醫考其針砭。有一穴差者立死。大慈寺僧千人。因藏一宗室。闔寺盡誅。初以蜀人易制。惟黎雅間土司難驟服。用降人爲招誘。鑄金印齎之以易其章。黎州馬金者。故馬岱後。得印擲之地。誓其衆不服。黎州有山曰斗門。三面懸絕。僅通一縷。馬金年甫十六。賊以金印誘之不從。故黎州得全。馬金好酒色。後一年竟卒。雅州有高克禮。楊之銘者。兩家互仇殺。楊有弟之喬。乘亂弑兄。請兵攻高氏。獻忠喜。聲言邊郡新附。免其三年租賦。雅州知州王國臣。西安人。初與馬熿

通繼又歸獻忠先與下川南道胡寅不睦將執之以狗成都寅逃入土司高克禮家蠻人貪賊財物往往高楊世仇乘亂相攻之喬又因以殺兄降賊復執胡寅家口數十人送獻忠殺之

弭首羈縻全川惟遵義一郡不下獻忠侈然有帝蜀之心矣當是時曾英李占春于大海起合州王祥起遵義楊展起犍爲曹助起黎州大學士王應熊縞素誓師達州僉事馬乾行撫臣事傳檄討賊占春涇陽人大海項城人曾英腹心舊將以勇聞獻忠之去重慶本不置兵故英一鼓而巴渝復爲國守王祥亦出軍綦河相犄角展家在嘉定州以偏校與助同守成都被執得脫展以武進士守成都被縛展進斷其歸而賊已改嘉定爲府乃潛入犍爲殺僞令以起事州人開門納之與助以聲勢相應和應熊還自京師即遵義開幕府祥才用不及英而委任過之乾雲南乙科初蜀人議請之以代士奇既朝命用龍文光而北都道斷其攝撫則猶以初意也他若遂寧司馬呂大器西充巡撫李乾德宜賓總督樊一蘅內江戶部范文光印州舉人劉道貞或奉詔或承制以出師大器乾德尙未至兵部侍郎喻思恂提學道王芝瑞奉應熊令權宜措處兵食涪州道劉麟長往來主游說久之喻病死芝瑞麟長間道歸諸蠡起之魁或稱四家或稱十三家袁韜武大定後反正次有天生城之譚文譚詣譚宏巫山之劉體純豐城之胡明道金城之姚玉麟施州衛之王光興皆甚著其王有進呼九思景果勒張顯劉惟靈白蛟龍楊炳英李世傑等莫可稽考總所謂夔東十三家者也我討賊官軍惟曾英以李于左右提挈復重慶爲首功兵差強邑紳刁

土人助英共結陣塗山下水陸連進四十里楊展取獻忠所沉於河者金億萬又嘉陵完實委輸足以給軍稱爲富獻忠聞兵

起。顧劉文秀曰。楊展不足忌。重慶要害地不可失。文秀往而李占春逆之多功。城于大海併力夾擊。文秀

大敗。賊初謀順流東下。東南得其別將攻嘉定者。亦爲兩人所挫。劫賊大沮。南門營中大營兵懼。誅開門

大儀縣三千餘人悉坑之。賊初謀自蜀入秦平東。先破馬壩於漢中。自謂秦隴可唾手得。李自成迺以賀珍易馬壩。而

趣之進兵平東。與戰而敗。獻忠自往救之。疾馳至廣元。過梓潼之七曲山。見文昌廟。仰視其題曰。此張姓。

吾祖也。追上尊號曰始祖高皇帝。獻忠不知書。其從官進諛。比於李唐之追王混元。誑耀百姓。自謂文昌

子孫。宜霸巴蜀。獻忠嘗題詩於廟。自嚴錫命以下。皆有恭和御製詩。刻石紀焉。嘗欲屠保寧一城。有僧破

山爲請。命持犬豕肉以進。曰。君噉此者。從汝破山。曰。老僧爲百萬生靈。忍惜如來一戒乎。遂嘗數嚙。因以

免。其兇殘不識道理如此。賊天性特與人殊。恆醉柔而醒暴。一日不流血盈前。卽悒悒不樂。厭苦朝會。擲

所御冠。舉足蹈其中。索大帽著之。迺快。嘗過綿州。見嚴錫命第宅壯麗。卽斬之。漸以出兵數敗。士衆反覆。

攘袂瞋目。有咀嚼蜀人之心。會朝天關。獲成都諸生顏天漢等。通表自成。怒以爲闔境俱反。詭稱開科。用

軍禮發遣。諸生不至者。拏戮盡殺之。西門外青羊宮。凡二萬二千三百人。棄筆墨如邱冢。作一大橋。命兵

馬於城上出入。百姓十人一縛。驅之至中園坑之。用法移錦江而涸其流。穿數仞。實以黃金瑤寶。累億萬。

殺人。夫下土石以填之。然後決隄放流。名曰錮金。後至者不得發。賊得蜀府金鑄銀餅置舟中。以東下。會

江。殿楚矣。碎其砌。屋毀矣。堙其井。城平矣。刈其人。室盡矣。則又搜牛與狗鼠而磔之。其一念之動於惡。不

過曰蜀自我得之自我滅之不畱毫末貽他人爾詐其衆曰有天書夜墜庭中上帝命剿絕蜀人違者譴不細與汪兆麟謀遣張能奇馬元利等分剽郡邑并長吏而誅之搜巖洞發窟室登高處以望突烟兵所過而炊火或存者將吏必斬其偏裨或不忍行屠乃至自經于道樹不知法嚴何以至此也有一縣先期聞令向賣酒家索醉聽死酒家一日累千金初大喜既而思之則又大慟皆叉手委股以就刳割無或免者自七月至十二月成都屬邑之人俱盡賊非徒屠民又虐用其兵嘗以婦女財物足以累軍士心不肯致死移營之日有金銀必棄有婦女必殺其畱屯久者或已若夫婦有子女故軍行發令輒大慟其在成都也毀中園一浮屠穴其下置礮崩之兵之壓而死者近萬又伐木造船數千由山路曳入水或數十里或百里稍怠而休者立死有闔營犯法裝大艦溺之江中其下畏威不能忍其酷雖左右親信於心終不甚附獻忠之仇視川人也先屠儒繼屠民并欲屠川民之爲兵者在諸將中多用川民爲兵無如都督劉進忠將執之而坑其衆計未成漏言於闈者一軍聞之俱逃會本朝大兵至漢中進忠因而歸命王問以獻忠所在進忠曰在順慶之金山鋪爲西充鹽亭之交境去此千四百里疾馳五晝夜可及獻忠以進忠守朝天關殊不意有大兵前驅至而未信進忠已入營中與善射者俱而指示之曰此獻忠也發一矢中額訝曰果然逃伏積薪之下執近侍詢之而得乃曳出斬之嗚呼逆賊稔惡滔天王師弔民伐罪自用兵以來未有快於此舉者然彼屠膾生靈而身僅盡於一矢千載而下讀蜀事者當爲之扼腕流涕豈浩劫

所至。卽上帝亦無如之何哉。當李占春卻敵於多功城。曾英遂爲遠近所附。衆至二十餘萬。獻忠不得志於漢中。謀東下吳楚。而不果者。有曾英以爲之沮也。然獻忠死。而平東以下四將之兵。潰入滇黔。致憤毒於英。而出其不意。曾殪於矢而顛。以沒於渝河。占春大海收殘卒。不及二千。以入涪。袁韜亦以不安於夔東。過涪以圖他走也。李于避之東下。韜逡巡入山。由武彭以趨於黔之婺川。是時全川早盡入版圖。諸擁兵者。率瓦解。迺以占春部將董子金。有萬縣湖灘之戰。韜亦返鬪。入佛圖關。規重慶爲已功。長至大會。自以位高踞李上。而占春不平。於是二將猜難。端構矣。先是王應熊死於永寧之畢節衛。而呂大器李乾德初入川。乾德少得異人天書。善占驗。好奇計。視諸將。以袁武雖草竊。其勇可用。力說之。欲與就功。韜輒傾心服。佛圖關之戰。乾德實贊成之。占春之惡韜也。并怒乾德。乾德夜坐船屋。仰視星氣。覺有異。咄咄謂此夕。主急兵。徒步走匿崖谷間。頃之。占春襲袁不克。搜乾德船。無所得。取其孥以爲質。韜聞。恐乾德之亡也。大哭泣。旣迎致。卽大喜。占春亦不害其孥。卒歸之。於時袁武駐重慶。而李占春營涪州之西平壩。四面阻水。結萬將營。賓客多歸之。于大海營忠州之花陵河。爲唇齒。王祥惡李于之盛。而又欲爲好于袁也。詐請占春議事。伏兵執之。軍中守者懈。占春踰垣出。殺追者。一日夜歸其壩上營。祥尋與韜相責望。以此三將皆不睦。袁武之駐重慶也。士卒饑。李乾德遣人說楊展。與合兵。因其餉。展喜藉袁武之強。以自固之。納之。呂大器欲遍觀川中諸將。以察其能否。入遵義。王祥具囊韉迎甚恭。呂知其無能。爲太息。謂乾德及監軍。

道陳計長曰。楊展志大而疎。袁武忍而好殺。祥尤庸懦不足仗。蜀事尙可爲乎。一日于石碛司夜遁走。入黔之獨山川鬱鬱。疽發背卒。楊展旣納袁武。約爲兄弟。而頻與占春相通。問嘗以銀萬兩米萬石資之。袁武在肘腋。所求顧不甚遂。又遇乾德頗簡傲。心銜之。後袁徙屯犍爲。于徙屯青神。展以袁生辰來爲壽。卽席上取展首。起而襲奪其貲與衆。宜賓樊一蘅投書責乾德曰。嘉陵峨眉間。二三遺民不與獻忠之難者。楊將軍力也。且背施忘好。而取人杯酒之間。天下其謂我何。乾德笑以爲救時大計。詎豎儒所能知。然蜀人多非之者。占春率其兵親挑戰。欲爲楊展報仇。卒不勝。曹勛與展刎頸交。亦默然而沮。一時袁武號最強。終無成。由殺楊故也。袁韜嘗欲取遵義。攻王祥破之。已而祥招烏合六七萬。分爲三十六鎮。勢復張。識者固知其不足用。平東之再自滇以出也。遵義其首難。祥一戰於烏江河而大潰。尋被殺。劉文秀遂移軍取嘉定。韜大定與之六戰六勝。有輕文秀心。一戰大敗。悉被擒。遂降。乾德以其父死於獻忠也。曰吾不可以再辱。驅其家人與弟升德赴河死。文秀所遣別將盧名臣下涪州者。李占春逆戰於羣猪寺口而敗。于大海在忠州。知不支。相與放舟出夔巫入楚。文秀遂據蜀。又累年而後平。蜀亂久。城中雜樹皆成拱。狗食人肉。多鋸牙若猛獸。聚爲寨。利刃不能攻。虎豹形如魍魎。饕餮然。穿屋顛。踰重樓而下。搜其人必重傷。且斃。卽棄去。又不盡食也。荒城遺民幾百家。日必報爲虎所暴。有經數十日。而一縣之民俱食盡者。其災如此。叙州人逃入深山。草衣木食。久與麋鹿無異。見官軍。以爲獻忠復至也。驚走上山。步如飛。追者莫及。

其身皆有毛云。初獻忠未敗，李自成之衆先已潰出關。袁宗弟賀珍之徒，偕郝搖旗、李本榮、黨守素、李永亨等約結十三家，出入巴渠巫施間。此所謂西山寇也。非獻忠之所以起滅，故不載。

附記

獻忠得楚府碧玉簫，長尺有九寸，希世寶也。獻曰：此何用？卽碎之。

荊州破，民家有漢昭烈借富民金充軍餉票，諸葛孔明押字，紙墨觸手如新。

獻忠惡婦人，云天下事皆婦人所壞，得輒殺之。其在黃州也，汰婦人醜者去之，專用姣麗而弓彎者，驅以拆城，指血滲漉，城至平地，而又殺於其下。

龐士元諸葛孔明合廟，名曰龍鳳祠。獻忠之趨廣元也，道經其祠，拜而求之，得中籤者三。嚴錫命解之曰：關中、秦中、漢中，三中者必取秦之兆也。獻忠大喜，乃大修殿宇，塑姜維像增其內，蓋以自擬云。

獻忠駐重慶十二日，拔全營以去。過故總兵鄧玘墓，下馬長揖，謂曰：好漢子，使此人在，吾安能至此。獻忠住寧羌州一月，毀其城，抵沔縣。漢壽亭侯顯威爽見城上，見甲士乃退。

獻忠屯曲山文昌祠，詩曰：一線羊腸路，此地更無憂。人是人神是，同國與天休。嚴錫命以下和詩皆刻石，石極高，故久而未壞。廣元之敗，非獻忠本旨，以愛將不誅，命嚴錫命爲書，責其擅進兵，而口授之。錫命請詔書宜稍文，獻忠以武官只須直話，乃上書奉天承運，爲詔書常格，其文則委巷撩衣露醜語也。

蜀人以爲笑焉。

獻忠自稱老子。過新都。官吏偶失迎。至漢州。百姓匍伏道左。人賞一元寶。及回新都。人先期迎。怒曰。汝要想老子元寶耶。折道旁樹枝。打之盡死。

獻忠多殺戮。所居人鬼相觸。然不以爲意。一日坐某殿。聞後殿有歌吹聲。自往視之。調絲品竹。擊鼓鳴鐘者數十。皆無頭之人。驚絕仆地。乃出居北門城樓。不敢入宮。

蜀人曰。陳士奇爲督學也。而講武。爲巡撫也。而講文。初邵捷春得罪。蜀人欲以馬乾代之。蔣相以其乙榜持不可。後卒用士奇。蓋以捷春士奇皆閩人。故用之以救前事之敗。蜀人以爲全蜀糜爛。皆士奇誤之也。蜀人曰。曾英兵三十萬。守重慶之南。并瀘州夔州下川東。皆其屯聚處也。賊在重慶北岸。與英相持。因攻城之敗。委之以去。又曰。賊發兵南收叙州府。叙有瀘河。河之南。楊展嚴兵爲備。故不得過。又曰。賊北守保寧。保寧與漢中接壤。李自成將馬科交境相拒。乙酉春。科率七千人攻入綿州。分其三千人野掠。而以四千人城守。獻忠來爭。初與三千人戰。旣屢敗矣。獻忠斬其退者。身率先死鬪。遂大勝。科遁去。獻忠并得守者之四千人。以分散諸營。改綿州爲得勝州云。

綏寇紀略卷十一

九江哀

左良玉字崑山。臨清人。少失父。爲其叔所養。其貴也。不知其母姓。年十八。從軍剽掠行旅。坐法當斬。有邱磊者與同犯。請以身獨任罪。而良玉得免死。去而事昌平督治侍郎侯恂。給侍左右。嘗命以行酒。冬至。讌上陵朝官。良玉大醉。失四金卮。旦日惶恐請罪。侍郎曰。此非若所當給事。向者吾誤若。非若罪也。有詔調昌平兵邊郡赴援。榆林人尤世威時爲總兵。以護陵不得行。侍郎與之謀。今欲遣將誰可者。世威曰。獨左良玉可耳。願其人方走卒。奈諸將何。侍郎曰。果爾。吾獨不能重良玉乎。卽夜遣世威諭意。且曰。吾將自往請之。良玉聞世威至。疑其捕已也。繞床走。曰。得非邱磊事發耶。匿床下。世威排闥呼曰。左將軍富貴至矣。速命酒飲我。引出告以故。良玉失色立。移時乃定。跪世威前。世威且跪且掖起之。而侍郎至。面與期。詰旦會轅門。大集諸將。以三千金送良玉行。賜之卮酒三。令箭一。曰。三卮酒者。以三軍屬將軍也。令箭如吾自行。諸將士其聽左將軍命。左將軍今已爲副將軍。位諸將上矣。良玉出而以首觸轅門。誓必有以報。已而有功。遂爲總兵官。良玉自起謫校。至元戎。首尾僅歲餘。年三十二。長身頰面。驍勇善左右射。目不知書。惟通曉解文義。有喻布衣者。爲掌記。性方嚴。良玉以父事之。賊至。自立陣前說降曰。汝等良人家子弟。失計

陷叛逆至此。左兵不可犯。盍早降。賊不聽。而後兵隨之。既勝。勸勿太掩殺。曰。其中保無威脅不得已者。良玉每出軍勝。先遣人報喻。知喻草屨迎三十里。左下馬歡甚。以其輿輿歸。喻飭中廚備飯爲笑樂。或敗。喻南面坐。見左不爲起。左長揖不敢就席。喻呼其名責數之曰。良玉。朝廷待汝厚。今折損官家士馬。又曰。糜其餉金。何以爲顏乎。左封寧南時。喻已前死。每飯。酌酒于地。呼喻大兄。其待士識道理如此。左初用兵。山西戰疾。力矢報效。無他心。在懷慶。與督撫議不合。始圖緩追。養寇收其降者。以自重。所部既多。餉不給。軍行採掠不禁。緣此屢被詰責。然終以得衆名爲強。同時諸將如曹文詔以忠死。鄧玘以亂死。祖寬以誅死。良玉老將持重。勝不務深入。雖敗。常以中軍自全。故不爲患。聽其下以所得而已。不私。士皆樂其寬易爲之用。故不致亂。威名爲闔外所伏。隱然若一敵國。故不受誅。軍行進止得失成敗之算。爲前後督府所莫及。以此益自尊。不受節制。在諸公有以致之。非盡良玉過也。張獻忠之在穀城。良玉請擊。熊文燦曰。彼雖懷貳。釁未成也。君雖敢鬪。衆未集也。驟而擊之。他寇必動。脫不能勝。所失實多。不如徐之。良玉曰。不然。逆賊利野戰。不利城守。今以吾衆出不意。彼士有駭心。糧無後繼。諸部觀望。必不能前。賊怠我奮。賊寡我衆。攻之必拔。襲之必擒。若失此機。悔無及矣。文燦苦禁之而止。獻忠既焚穀。躡房。竄入鄖竹山中。文燦請追之。良玉不可。文燦曰。將軍逗撓耶。賊已絕地窮竄。急追毋失。良玉曰。向云疾擊。懼其逸也。今非不擊。避其銳也。箐薄深阻。前逃後伏。我失其便。非絕地也。二叛往矣。九營從之。同惡氣盛。非窮竄也。負米入山。顛頓。

山谷十日糧盡。馬斃士饑。果行也。我師必敗。已而羅狹喪績。良玉具條前後與理臣爭者。以聞于朝。大司馬楊嗣昌諱言文燦失策。而又知過不在左也。故于其督師。特表左爲平賊將軍。俾刷孟明曹沫之恥。左雅知其意。不爲用。當嗣昌誓師襄陽。諸大帥惴惴奉指麾。恐後左獨守便宜。不甚受所下方略。楊亦寬假。銜轡以優容之。官兵之追獻忠于蜀也。良玉受命先驅。其機宜往復。所不同于制府者有二。于取道也。嗣昌曰。興平。良玉曰。大竹。于遣兵也。嗣昌曰。偏師。良玉曰。全軍。于料敵也。嗣昌曰。吾恐其折回平利。良玉曰。賊不敢復瞰鄖房。嗣昌曰。八賊將必旁竄歸巫。良玉曰。逆獻必不遠投曹過。監軍道萬元吉以其不相承稟。深以爲言。嗣昌能降心曲從。故瑪瑙山賴以取勝。夫合楚蜀之事觀之。羅狹山。左良玉以爲不可戰者也。文燦違之。以致敗。瑪瑙山。左良玉以爲不可不戰者也。嗣昌從之。以奏功。彼其老于行間。審敵制勝。智略誠有大過人者。若又能加之以恭慎。將之以忠誠。不伐其勞。不矜其智。雖古名將。何以加焉。乃自以一籌之得。笑文臣爲不知兵。而嗣昌以使相之尊。賜劍之重。九調而九不至。馴至窮寇生其羽毛。羣帥離其心膂。兵燔于開縣。地覆于襄陽。此可僅諉之賀人龍。而于良玉不之責乎。及夫督師縊。藩王亡。賊于是乎伐蔡。侵隨。漢東大擾。然良玉當新敗之餘。下當陽。出宛葉。一再戰于麻城。洵陽之間。賊遂以破。獻忠漏刃破膽。奉頭奔竄。之不遑。其前之亡羊。則緩追也。其後之脫兔。則逸獲也。江漢巴蜀之民。當肝腦塗地于此。賊之手。故使良玉不成其功。嗚呼。此孰非天爲之哉。左軍之強。由于破獻忠。而有其士馬者。大半分所部。

爲三十六營。營一副將領之。有馬數萬餘匹。計其軍食于度支者。不及什之一。餘皆剽掠以爲資。百姓畏之甚于賊。然較士伍。論強弱。略與李自成相埒。自成起草竊。得行已意。驅其衆可赴蹈湯火。良玉憑藉威靈。而不能免于觀望。貪功避罪。前瞻後卻。弗克盡其所長。以此勢常不敵。郟城被圍而莫支。汪喬年覆沒而不救。論者頗以此訾警良玉。幾與賀人龍同類而言之矣。上旣恨開縣項城之再逃。斬人龍以肅軍政。其意未嘗不在左。而恐其有疑朝廷之心也。乃發帑金五萬。大司農再撥十萬。錦綺綵物千端。空頭告身數百道。使者齎至軍前。頒賞出故尙書侯恂于獄。以兵侍郎代丁啓睿爲督師。拔河內知縣王漢爲御史。命監平鎮軍。而趣良玉救汴。恂與漢未至軍。而良玉已敗于朱仙鎮矣。良玉之在朱仙鎮也。賊營于西。官軍營于北。良玉謀作甬道屬之城。通于河北。以便饋餉。汴人疑左之擾已也。閉門填之以石。弗與通天大雨數日。良玉夜召諸將計事。辨色猶未散。隱隱見營南有山若雲者。衆愕視不知云何。良玉舉刀擊地曰。唉。此必瞎賊築土山立礮臺打我矣。立遣騎覘之。果然。凡築土爲山者三。山立一臺。臺下各宿精兵一萬。切深溝。官軍至。賊伏其下。兵去而轟雷震裂。左命軍中亦立臺應之。賊更番迭休不能支。乃拔營去。自成見左營之移也。曰。左健將。此來必死戰。慎無與爭。惟待其過而從背擊之。蔑不濟矣。左步在前。騎在後。賊于步則聽之行。于騎則鬪而不應。鋒纔交卽退。左兵喜于得逸。疾馳八十里。賊早于其前穿巨塹深二尋。廣如其深之數。環而繞之者百里。自成率百萬之衆。遮于後追之。左陣已亂無鬪志。相率下馬渡溝。負輜

重攜刀槩。僵仆谿谷中。後人趾乘前人之顛以過。自成從而蹂之。左大敗。棄馬騾萬匹。器械無算。自此走之襄陽。初侯恂之在請室也。七年矣。左用兵于豫。嘗三過之。令其下曰。侯公家在此。敢擾及草木者斬。入城謁恂。父太常卿侯執蒲拜伏如家人。不敢自居于客將。上知其故。特湔祓恂。且用之。已而聞敗。恂請疾馳良玉于軍。上曰。朕所以用恂者。以其致良玉而奔汴之急也。今赴良玉軍。則一襄陽之客。而驕鎮之故人耳。于援汴之謂何。乃命拒河圖賊。而令良玉以兵來會。良玉新敗。畏自成。無意行。不得已于舊帥。遣其將金聲桓。以五千人從。而詭云身率三十萬衆。會恂于河北。恂懼餉無所出。且逆探其情。好謂之曰。將軍之士。大半不餽於縣官。今遠來就我。固善。第散其衆。則不可。若悉以來。而自謀食。咫尺畿輔。將安求之。久之。良玉竟不至。汴遂以亡。上怒恂。罷其官。尋致之罪。而李自成之破汴也。遽引而西。謀拔襄陽爲根本。時良玉壁于樊城。大造戰艦。驅襄陽一郡人以實軍。賊帥惠登相、常國安、馬進忠、馬士秀、杜應金、吳學禮。皆附之。士馬滋益衆。然親軍愛將死而降。人不奉約束。左亦氣漸衰。多病。不能復與自成戰矣。自成乘勝來攻。良玉退兵南岸。結水寨。舉礮相擊。賊臨江。蹀馬而濟。水沒其鬣。與腹猶不止。有一洲差淺。向獻忠所渡處。良玉以萬人守之。自成用十萬人來爭。良玉大駭。宵遁。引其舟師。左步右騎而下武昌。入見楚王。予我二十萬人餉。爲王保境。固城。楚可無恙也。王噤不能應。良玉縱兵大掠。火光照江中。士民宗室奔走通山。崇陽間。多爲土著所害。驛傳道王揚基。廩其資。先期奪門出。舟未發。盡爲左所掠。子女皆入左軍中。良玉

以十二月二十四日至正月十六日啓行。艤艫蔽江而下。五晝夜九門堅壁。居人登蛇山以望師。皆呼叫幸更生。曰左兵過矣。自漢陽以下。降將叛兵。所在蜂屯。假竊左軍號。以剽掠。蘄州守將王允成者。實亂首。良玉中軍尙未達小孤。允成收賊白貴等爲先驅。已破建德。劫池陽。去蕪湖四十里。舟師泊于三山荻港。漕艘鹽舶。盡奪以載兵。聲言諸將寄帑南京。請以親信三千人俱入。文武操江。陳師江上爲守禦。士民一夕數徙。商旅中斷。南大司馬熊明遇。錯愕不知計所出。都御史江右李邦華。故南樞臣也。卽家被召命。道出湖口。聞變。有勸令東行。由淞江取京口入北邦。華叱曰。是何言耶。身爲大臣。忍坐視東南決裂。袖手而去乎。乃倚舟草檄。正告良玉曰。本部院四朝老臣。遭時多難。投身爲國。仰望貴鎮。與我同仇。頃傳麾下全軍南潰。所過殺掠。陵京震驚。何輕易舉動如此。以列聖英靈。主上神武。羣醜游魂。稍稽膏斧。不遠貴鎮。不以此時枕戈礪劍。與疾討賊。乃甘自菲薄。貽悞身名。本部院所不解也。舊京文武。足高喙長。倘不諒心跡。飛章上告。其將何辭以對。海內豪傑。人各有心。各鎮及麾下將領。保無從中觀變者。舉事一不當。辱身家而污青史。爲千古笑談。智者所不出也。貴鎮宜卽日嚴戢兵丁。疏通江路。捩柁回船。刻期還鎮。缺餉事情。候本部院到皖。設法措處。勿過安慶一步。以實流言。良玉得檄心折。又用其客李猶龍。胡以寧輩。開示禍福。主上拊髀。頗牧入見。當力爲保全功名。釋中山箱篋之疑。得元侯弓矢之賜。良玉大喜過望。邦華飛騎貽書皖撫。發九江庫銀十五萬。補六月糧。軍心大定。南都始解嚴翼。日具威儀入其營。良玉紅袂首韓袴。

握刀插矢。俯立鵠首。邦華辭。乃用師弟子禮見。良玉請坐樓船。大閱士馬。邦華慰勞諸將。詢問部曲姓名。宣諭軍中。矢忠義殺賊。良玉令于軍。斬淫殺者四人。以狗釋被掠男婦四千餘人。還漕鹽船五百餘號。臨別。誓以餘生效頂踵。邦華退。謂人曰。東南有事。此一軍必能自效。良玉不負我矣。然邦華行後。良玉息肩于皖。守將杜宏域。文煥子也。杜應金。文煥族子也。以賊帥降左。左之東下。應金爲前驅。先以書抵弘域。言情。故皖及宏域得無恙。左軍士有逸入杜麾下者。杜斬之。因其客以謝。奉管鑰。執鞭弭而後。左卽安之。張獻忠初襲廬。陷舒。治舟巢湖。聞左之下皖。遂去而棄疾于楚。傳國都而沉其王于江。左時已溯流九江。熟視其君若民之糜爛焉。而弗救。卽上亦不能詰責也。邦華之見上也。曰。良玉潰兵之罪。請以王允成除。上亦因以歸獄。允成而獎良玉。以誅叛定變。允成出入左帳中自如。卒不死。十六年八月。良玉奏誅叛事。賜賊自贖。獻忠以七月二日。大焚武昌。從咸寧蒲圻以上岳州。良玉于十六日。提其兵出湖口。湖口令謝所舉者。湘潭人。僞儻士。居人聞左兵至。亡失魂魄。或勸令亦走。令笑曰。無恐。我去將安之。先期戒牛酒芻糗。兵至。擊小舟突入其圍中。長跪涕泣。左怪而問之曰。公有所請乎。對曰。無有。惟就公乞一旱字耳。左笑曰。解人也。遂去。獻忠之初去武昌也。有自寶慶下者曰。劉兵。自沅縣下者曰。張兵。自夔門下者曰。郭兵。借官軍恢復爲名。擒捕僞官。搜牢富人。割剝良善。楚人不聊生。左先驅馬進忠。至而小戢。良玉以八月入武昌。城中四十八公署及民居皆燼。故禮侍郎郭正域第獨存。乃卽之以立軍府。遣其人以旗幟招百姓。出軍船。

所掠下江貨物。賤其價以通市。商賈聞之頗來。郡邑太守以下官。亡城失印。或竊伏塢壁。或徒步還家。聞兵至。自出者咸復其所。巡按御史黃澍有權略。與左議頗合。黃州守周大啓。修築獻忠所夷故城。知沔陽章曠。率州人倡義旅。郡邑有聞而應者。楚下流稍稍復完。張獻忠已盡陷湖南諸郡。遣其僞都督張其在。趨江西。楚新撫王揚基聞獻忠之駐長沙。而餘黨入江西也。以兵復岳州。江西巡撫郭都賢提兵拒境上。賊已從醴陵犯萍鄉之插嶺。官軍扼黃花橋。賊從別道濟萍鄉。令走。賊入之。張其在自瀏陽萬載分道趨袁州。袁人開門納賊。良玉先在九江。命副將吳學禮援袁。學禮至而賊將邱仰拒守。我師高山先登斬仰。學禮放兵大掠。袁臨吉之民郊保者。洶洶仇殺。都賢檄學禮歸。而自募土人置戍。賊聞左兵之撤也。張其在從長沙突犯吉安。陷之。吉水、永新、安福、泰和諸令同日遁。賊復入袁州。而我水軍方國安之在楚也。別將王世泰、楊文富遇獻忠所遣賊將自長沙返而顧岳者。既合戰。賊佯敗。我師奪輜重。舟不前。賊乘之。殺溺無算。岳州復陷。江夏亦震恐。會良玉遣馬進忠以步騎進。嘗國安杜應金等繼發。圍袁州。賊突門走。斬首二千。而馬士秀、郎啓貴率水師再合世泰、文富以敗賊于臨湘。追之及于岳州城下。賊大敗。遂并收袁岳。而江右湖南略定。時李自成跨有荆襄承德。漢黃以上與應隨接壤者。塢壁之人多與賊通。而輸之糧。良玉初以許州之陷。妻女爲自成所得。常置軍中。厚奉養之。賊將王四者。自成配以良玉女。遣之。至武昌。道其家無恙。欲以致左。左不應。然多金帛以復使之歸。竟亦不能殺也。先是上用兵侍郎呂大器。總督江

楚應皖軍務。以代侯恂。恂解任。中道逮下獄。良玉知因已故。致舊督再得罪。有鞅鞅心。與呂輒齟齬。呂所仗惟李輔明。馬科二將。馬已改調關寧。輔明不足用。建議招募。柯陳二姓與皖營私鬪。南昌關箱被焚。呂高坐江省。漫以恢復吉安爲解。乃賊盡陷建昌。撫州南豐。大器不能救。爲左車所擲。揄而賊將先驅艾四者。屯嘉魚。銳甚。馬進忠與之戰于三十六灣而敗。再戰于蒲圻。又敗。左軍勢亦不振。會獻忠從荆河入蜀。良玉遣兵追之。距荊州七十里。偵荆襄之爲賊守者。聞自成西入關亦盡懈。左乃遣副將盧光祖上隨棗。承德。而惠登相自均房。劉洪起自南陽。犄賊後。收其空虛之地。以恢復自爲功。十七年正月。上旣封良玉爲寧南伯。畀其子以年賊將軍印。俾功成後。世守武昌。仍下特詔。責其與江督大器見駐何所。作何進軍。而鳳督主合殲。黔粵各督分救援。楚皖江沅各撫任犄角。卽科臣之前受命察核者。左懋第以便道催戰。良玉乃條日月進兵狀。爲疏以聞。曰。臣以十六年八月復武昌。聞江西有警。遣副將吳學禮。于十月十三日復袁州。糧絕兵回。賊乘間再據。臣乃定計水師徐發。先遣副將馬進忠。率騎兵由陸。十一月二十七日。再復袁州。十三日復萍鄉。十二月初二日復萬載。過此卽入楚境。初五日復醴陵。二十六等日復長沙。湘潭。湘陰諸處。擒僞守道以下尹先民等官。次遣副將馬士秀等。率步兵由水趨湖南。十六年十一月二十四日。復岳州臨湘。十七年正月十六日。復監和。二十二日復石首。二月十一日復公安。臣先已密調副將惠登相。率所部由均州東下。十七年正月二十四日。登相協同副將毛顯文復惠安。二十六日。復隨州。計

期三月。復府州縣一十有四。臣與監軍職方司主事李猶龍。先後馳報疏在御前。可按也。并言江督呂大器不發兵。及舊撫臣王聚奎狼狽回省狀。時道路梗塞。騎置稽緩。疏入未奉旨。而京師陷賊之信至矣。良玉審知登遐凶問。三軍縞素。率諸將旦夕臨翼日。諸將前請曰。天下事皆當關我公。今南中立君。挾天子以坐詔我輩。宜乘其未定。引兵東下可也。良玉拊膺而號曰。不可。世守武昌。此非先帝之旨乎。先帝甫棄天下而我背之。是幸國家之變以自利也。封疆之臣。應守封疆。南中立君。我自以西藩爲效。有過此一步者。良玉誓之以死。盡出所藏金銀綵物。凡二三萬。散之諸將曰。此皆先帝賜也。受國厚恩。禍變至此。良玉何心獨有之乎。于是良玉哭。諸將噉然皆哭。副將馬士秀奮曰。有不奉公令。復言東下者。吾擊之。以巨艦置礮斷江。衆乃定。當良玉出所藏。其子夢庚有吝色。良玉曰。爾以此爲若物耶。向者吾散之。乃所以爲若也。大息曰。左氏不得世有此軍矣。大學士史可法。馬士英定策。奉福藩世子。改元宏光。奏以寧南伯左良玉。靖南伯黃得功。並進爵爲侯。蔭一子錦衣衛正千戶。封高杰爲興平伯。劉澤清爲東平伯。劉良佐爲廣昌伯。與得功開藩淮陽爲四鎮。而上流之任。專以委左。詔書到楚。而良玉賀表亦至。時李自成敗于關門。楚西境稍可乘。良玉得以其間復荊州德安承天。承天獻皇帝弓劍地。詔以收復陵園爲左功。責所司速補給。十六年楚餉缺額四十萬。而何騰蛟爲楚撫。袁繼咸爲江督。騰蛟共良玉收拾武昌。爲同心固守。繼咸係李邦華所推。許邦華死北都難。其客李猶龍輩又在左幕中。繼咸用忠義相勉。故兩人交頗合。左兵

無慮八十萬。號百萬。前五營爲親軍。後五營爲降軍。每春秋肄兵。結隊武昌諸山。以一山幟志爲一色。左建大將旗鼓于射堂。周麾一呼。旆而立者。山谷爲滿。其閱軍法。用兩人夾馬而馳。名曰過對。馬足動地。殷如雷聲。聞數十餘里。南中所恃者四鎮。東平廣昌弱。黃靖南獨以其身敢戰。高傑士馬十倍三鎮。視左軍皆遠莫及。故當時推寧南爲強。然朱仙鎮之戰。左精銳已盡。其後歸者多烏合。斷役扈養之人。故大半稍黠有力者。牟什一以自揀。樓船偶泊。卽有質庫屠宰百商。爲軍市法令。總不相懾。識者知其不足用。左家室盡于許州。在武昌。諸營娼優歌舞達旦。元帥獨塊然一榻。無姬人侍側者。旣老而被病。南中楊生者善醫。柳生者善談笑。左大歡樂之。奏陽爲武昌同知攝守事。而柳生不願官。以客將出入臥內。最親信。嘗月夜飲僚佐李猶龍等。召某將官營妓十餘人。行酒杯罍縱橫。履舄交錯。少焉左顧而歎。命以次引出。賓客肅然。左右莫敢仰視。其將百萬軍。正已率衆。爲下所服。皆此類也。懷寧阮光祿大鍼者。負縱橫才。以閹黨故廢。歸德侯方域。嘗偕其友移書罵之。方域侍郎恂次子也。當左兵南潰。方域僑寓陪都。大鍼頌言良玉爲賊。而目侯以同反。左具知其情。恨之。比大鍼附馬士英起用。舉朝力爭。時四鎮參預國是。左無一言。阮旣柄用。謾語因其客爲修好。實陰鷲而猜。思李邦華侯恂故東林黨魁。而良玉其所薦。異時必有借左以難已者。陰結黃靖南爲樁柱。左武人初不知所爲。朋黨旣見板礮築城爲西防。嘆曰。西今復何所防。直防我耳。不免有沿流之計矣。會朝事日愆錯。而楚餉不至。御史黃澍請入朝觀之。澍面奏觸柄臣。旣返而金

吾逮治。謝數士英十罪。且言得張獻忠僞官周文江銀八千兩。題授參將罪可斬。志孔助謝言甚力。韓贊周叱之始退。左畱謝不遣。隙遂開。諸將日以清君側爲請。左自念所將皆亂人降卒。幸天子在下流。假其聲號。相糜繫。若縱之東下。且擇利散走。是屬寧復可制乎。嘿勿應。無何王之明事起。中外皆謹譁。楚西陲之報日急。左亦心動。黃澍乃召三十六營大將與之盟。方登樓密畫。左沉吟未有所定。中一將拂衣竟起曰。疑事無成。若主帥必不動者。某等請自行。不能鬱鬱久居此矣。左不得已從之。左初畫楚疆爲各鎮。自惠登相駐漢陽外。諸將咸有分地。楚人多苦之。王之綱者在武昌縣。尤殘忍。好以人爲糧。裸而懸之于柢。灌沸湯以蕩盡其腸腑。而後烹之。之綱別號槓子。百姓聞其名。皆奪魂魄。楚紳士之不能去者。出子女財帛。所以奉鎮將者。百端冀得免。瀕行乃悉取而棚考于營中。或夾以兩門。俾健兒行其上。以索賄。賄未盡入。其人已折脅拉髀。祝世英樊維城諸君。于其地皆死。舊江撫劉宗祥與之綱約爲兄弟。軍旣發。掠其貲十餘萬。殺之。不能得其屍云。左以乙酉三月廿六日。傳檄討馬士英。空國行。自漢口達蘄州。火光接天者二百餘里。至九江。袁繼咸過相見于舟中。坐未定。俄見岸上火起。報云。城已破。左右曰。袁兵燒營自破其城。左罵曰。此是我兵耳。大悔恨。椎胸浩歎曰。我負臨侯。臨侯者。袁字也。嘔血數升。病遂革。召諸將謂曰。吾不能報效朝廷。諸軍又不甚用吾法制。故憤懣以至于此。自念二十來年辛苦戮力。成就此軍。吾歿之後。出死力以捍封疆上也。守一地以自效次也。若散而各走。不惟負國。且羞吾軍。良玉死不瞑目矣。諸將皆哭。請刑牲誓。後營總兵惠登相當軟拔佩刀橫膝上曰。

我公百年後。有不服副元帥號令者。齒此劍。諸將皆曰諾。副元帥謂夢庚也。登相固降寇。所謂過天星者。感左再造力。有忠實心。左歿後七日。軍東下。惠率其黑旗軍殿。舟行不近岸。有紀略。而前鋒中軍大亂。自彭澤以下皆陷。夢庚不能制。兵至池州。東風急。黃得功遏其鋒。諸將飽擄掠。獨遣池州不破。貽書登相曰。留此以待後軍。登相得書大詬曰。若此則不如我前日爲流賊。其如先帥末命何。撤其軍返。夢庚見黑旗船。往往西上。疑之。問而得其故。索輕舸往追之。登相相見大慟。以夢庚不足事。引其兵絕江而去。初邱磊者。坐斬繫刑部獄十三年。良玉捐萬金救之。得不死。侯恂之再爲督師也。奏以爲山東總兵。與劉澤清不相得。構以罪。馬阮殺之于淮南。或以爲良玉東下。蓋亦因磊死故云。外史氏曰。予觀懷陵末造。天下之勢。在于良玉。中原糜潰。朝廷之法。令不可復行。唯自成能號召饑民。以爲難于我。唯良玉能招誘降寇。以致死于賊。爲國家計者。宜舉河南以委之。而無責其速戰。斂天下之兵以守河。守江漢。守關。餽良玉以屯種之粟。俾且畊且鬪。而與之持久。彼視自成。力均勢敵。又竊天子之寵靈。而繼之餽餉。以收李際遇劉洪起沈萬程之徒。其勢宜日強。自成草竊烏合。羅汝才袁時中不能相下。羣心必攜。不出二年。其衆將折而歸于左矣。功成之後。分一州爲節使。彼能北向而爭天下乎。今計不出此。而區區于救汴之一戰。以至于敗。此謀國者不知駕馭之過也。若夫兵敗之後。退于襄陽。潰于湖口。歸于武昌。向之猛氣實力。漸滅殆盡。身已落于降兵叛卒之手。而談者謂其專制上流。憂必爲變。嗟乎。良玉兵非昔日之兵。將非昔日之將。天子

用爵賞以羈縻我而我卽用以羈縻其軍。彼豈不知清君側制國柄足以得行其志勢不可耳。唐末藩鎮皆父子兄弟之兵。故用以專制一方。長戈指闕。彼將百萬之衆。出門一步。渙然崩散。此豈可與作賊者哉。跡其生平。識機變。饒方略。可以謂之智將。顧用其私意。揣摩上指。翕集軍心。張形勢以便身圖。而逃國法。主亡身病。而下亦叛之。九江舟中。自審不濟。而後發負恩之嘆。晚矣。曹文詔黃得功。忠而能勇。苦不長于謀。良玉能謀矣。而無忘身殉國之心。坐長禍亂。以視兩公。真有餘愧。然若以劉澤清之侵權牟利者比類。同觀。則寧南固一時之傑。未可槩而棄之也。

附記

豫撫陳益吾與同年許霞城書云。豫事之壞。由于吏部人擇地。不爲地擇人。巧者鑽營。閩粵浙直美缺。以去。一種闕茸無能之人。不諳趨避者。則坐名填缺。以功令驅之。到官久之。列城皆然。一片暮氣。地方全無料理。寇來避之山寨。寇去依舊入城。甚至有如鄆陵舞陽之開門迎賊者。中原重地。拱手付賊。職此之故。至于督撫身臨賊場。偏裨佐貳宜聽其隨才選用。勢成臂指。年來該部攬權營私。卽守巡標下中軍無一不從部授。何況督撫一切部內。走差偵探。久慣積猾。乞恩進奉。題授管事。名曰酬勞。此輩非中官廝養。卽市井遊食。旣乏智勇之能。又熟躲閃之技。見賊輒遁。事敗彌縫。恃有部主平日情面。少加呵譴。卽布流言。至于領兵大將。官非功授。氣以勢盈。牆壁旣牢。去來由已。如往歲左良玉移催數十次。

始爲一行。甫望賊而掉臂去之者。弟所以有調兵如請客。馭將如驕子之疏。又如李重鎮一賊不殺。而舊樞焚其重賄。屢疏代爲鋪張。左良玉譌報躲賊。略加抨彈。便爲瞋目。攘臂朝堂之上曰。如何難爲我將官。弟所以有將官不殺賊。則罪巡撫。巡撫參將官之不肯殺賊。則又罪巡撫之疏。諸如此類。未易悉數。朱仙鎮之敗。良玉以七千之衆。率先倡逃。致十八萬人馬。一齊潰散。而中原之事。遂不可復問。嗚呼。誰爲之哉。憶弟入豫。卽過舊鎮。臣劉超見其不堪棄去。又物色舊鎮臣許定國。見其尤不堪棄去。而其後樞部俱用之。封疆今許逮劉叛矣。甚者舊司農本非將才。而舉爲保督。曰能駕馭左良玉。驅策劉超也。及檄良玉。而良玉付之一哂。超且顯然爲難。至于保督揚兵河北。秦督駐兵潼關。兩軍自爲表裏。以一爲正。以一爲奇。迺保兵未渡河一步。而秦兵先撩虎鬚。甫出函谷。一敗塗地。用兵之效。竟何如哉。南都之詔至武昌也。楚撫何騰蛟以劍自隨。曰社稷之安危在此。若不開讀。此身有付三尺劍耳。會良玉腹心盧鼎者。力勸其拜詔。事乃定。及良玉從黃澍之謀東下也。以騰蛟不從。謀刼取其印。騰蛟急解付家人。令速出城。毋爲所得。良玉令四將守之。逼與偕行。騰蛟至漢陽門。乘間投江。順流十里許。至竹牌門。遇一漁舟救之。起登岸視之。則關帝廟。而懷印出走之僕亦在。相視大喜。亟覓漁舟。不知所之。說者以爲神救也。

綏寇紀略卷十二

虞淵沉

傳曰。天道不僭。視人主之修德與否。而降之禍福。此自然之符也。今以十七年已事觀之。成湯之責六事。箕子之陳五行。未顯有失德。或致厥罰。況於三風十愆之必戒。可得而知也。齊莊中正。以禋祀鬼神。恐懼修省。以禳塞災咎。雖董仲舒劉向之徒。執經義推陰陽。無得而譏焉。然則彗孛凌犯。何自而生。水旱札瘥。曷爲而作。豈上帝之監觀。或爽而政事感召。其理不可信歟。夫天道遠。人事邇。以武宗之戲渝馳驅。保有。大業。乃先皇憂勤恭儉。不免于亡者。前人之餘殃。處其極敝。臣下之衆。罔集于厥躬。豈不然歟。彼曲學小儒。因成敗傅會其說。此目睫之見。何足道哉。何足道哉。於戲。遭時亂亡。靈臺太史之所紀。蓋闕如也。姑掇拾遺聞著於篇。

熒惑。太白。彗。

崇禎三年。熒惑入東井。退舍復羸居數月。

案萬曆九年二月辛酉。火星順行。犯井宿北第一星。十年八月戊申。月入井宿。與火星相犯。二十五年十月戊寅。火星逆行入井。井者秦分。兵將起于秦也。秦地在嘉靖以前。西陲多警。朝廷以三邊爲重。調

兵食。修政治。故秦可無憂。萬歷中。專意封賞。秦兵缺額餉。每鎮以數十萬。又以調援怨咨。挺爲亡命。秦督撫虐用其民。匿寇盜。不以上聞。熒惑者火也。火必蘊隆而後發。萬歷九年。順行犯井。二十五年。逆行入井。火繇微以至著也。崇禎三年。退舍復羸。居數月。火燎于原。不可嚮邇矣。雲中。定襄。雁門。代郡。太原。皆入東井躔度。故秦寇而晉受之。從神木過河。三晉名城。蹂躪殆遍。其驗也。

宗禎三年庚午二月。熒惑入鬼宿。犯積屍氣。楊鶴劉廣生主撫。

四年四月。太白晝見。熒惑再入鬼宿。犯積屍氣。楊鶴受神一魁降。

萬歷中。熒惑四十二凌犯。二年二月。十七年七月。三十四年五月。犯房。二年五月。十七年二月。二十年十一月。三十七年十一月。犯氏。十二年十二月。十三年二月。犯張。十三年二月。自張歷柳。四十二年十月。犯柳。十五年二月。四月。四十四年十二月。四十七年二月。三月。丙戌。甲午。庚子。犯翼。十七年四月。歷亢入角。三十二年二月。犯角。十七年九月。十九年七月。犯南斗。十九年四月。六月。犯箕。二十一年七月。九月。犯室。三十六年六月。八月。犯女。三十八年八月。犯婁。四十七年正月。二月。犯軫。二十五年七月。三十四年十一月。犯歲。十三年正月。犯軒轅。餘犯太微者四。犯井二事。見前。其犯輿鬼。在二十八年二月。與崇禎三四兩年之變相合。自東井十六度。過鬼入柳爲鶉首。秦之分野。輿鬼主斬殺。明秦寇宜殺而不殺。將反爲所害。張爲周。翼軫爲楚。先是熒惑犯張。自張歷柳。犯翼。犯軫。豫楚亦將有寇災。又萬歷

中太白晝見者五。其二十一年八月見井度。二十四年四月犯井宿。占專主於秦。十一年六月。獨書太白犯熒惑。火與金並見。與是年相類。

兵法五火止於燔爇。礮則因機發石以投人者也。自永樂中得西洋大小火礮之法。而弓矢戈矛之技廢不講。將吏狃于不復見敵。一不中棄之以走。反委諸羣盜之手。故其初用之威天下。而後以亡國。天事恆象。熒惑之數十見者。殆爲是乎。三代車戰。其法可勝而不至于大敗。秦獻公十八年。櫟陽雨金。始盡改古法。尙首功。而楚趙之戰。伏尸百萬。二世時。太白再經天。勝廣起秦以瓦解。使車戰法在。則千乘萬乘。纓鋤棘矜。何自而勝之哉。此金失其性者也。自秦以下。民之蹈白刃者。不可勝算。然火器未入中國。尙有堅城可守。今獻闔縱橫。名都隳突者。皆以寇得我火器。雖孟賁之勇。墨翟之智。無所復施。生民之劫數彌深。五行之害氣畢究。糜爛其民。比諸鋒刃。千百過之。故熒惑犯積屍。而寇禍燎原。暴骨如莽。此火失其性者也。況金火合曰燦。其爲兵喪。尙忍言哉。

八年乙亥九月。熒惑犯太微。

占在次輔。時何吾騶、文震孟、爲相溫所劾免。

九年十二月。熒惑如炬。在太微東南。

十年五月。熒惑晝見。

十一年四月十六日巳酉夜。熒惑逆行尾八度。爲月所掩。

五月初五日丁卯。退至尾初度。漸至心。

十二年十月。熒惑逆行太微。犯上相。

十六年正月。熒惑逆行失其處。

十七年二月。熒惑怒角。

次年五六月。熒惑犯房心。

熒惑自犯鬼宿後。其凌犯失度者凡有八。莫甚于十一年。從尾度漸至于心。心太子之象。郗萌曰。犯太子太子憂。犯庶子庶子憂。按萬曆三十四年四月丙午。熒惑入心。其年二月。皇太子第一子生。是時鄭貴妃在上旁。太子將有動搖之議。其後光廟雖立。祚不長。熹廟國統再絕。先皇十年。太子加元服。出閣講學。其明年。熒惑入心。太子二王。後以國變遇害。占曰。王者絕嗣。是其應也。楊嗣昌時爲兵尙書。奏爲占主中宮后妃。今熹廟成妃發引。所謂白衣之會也。又歷舉漢光武、明帝、唐憲宗、宋太宗時。皆月食火星不爲災。其論明帝永平。則云是年立皇后馬氏。德冠後宮。嗣昌主獻諛以寬上意。此語尤援引不倫。科臣何楷駁之曰。臣不知嗣昌何所指斥。且心爲明堂。前後星皆太子之屬。恐奸人踵邪說以危東宮。宜以爲戒。是時田貴妃擅寵幸。其父宏遇數犯法。交結朝臣。謀傾中宮。漸有萌芽。巫咸所占妃妾有

謀后者。天道信可畏。何楷精於內學。恐嗣昌險詐。將結椒親以固權。免禍。故先事折之。嗣昌尋入相。舉朝爭之。按萬歷五年九月晦。張居正聞父喪。十月朔彗星見。吳中行、趙用賢、艾穆、沈思孝、鄒元標以爭奪情。廷杖詔獄。其後黨錮異同。糾結不可解者數十年。以至亡國。楊嗣昌父母兩喪。從兵尙書入閣。適會熒惑入心。范景文、黃道周、成勇、劉同升、趙士春、何楷亦以爭奪情免官。道周廷杖詔獄。勇遣戍。黨錮之事。居正起之。嗣昌終之。皆楚人入相。皆以奪情遇星變。天道信不誣也。

十年春。太白晝見。

六月。太白經天。

十月。太白晝見。怒赤。

是年。李自成等分五隊以踞關中。老獬占鄖襄。合曹操闖場。天諸賊以直窺江淮。陪京大震。楊嗣昌措兵十二萬。餉二百八十萬。薦熊文燦爲總理。寇禍遂至不收。太白經天。此其應也。

十二年十月初一日。彗星見。上于初四日。修省免刑罰。

彗星在萬歷中十有二見。二十一年七月乙卯。見于井。至乙亥。逆行紫微垣。犯華蓋。微垣者。帝庭也。三十五年八月辛酉。彗見井度。長二尺。漸往西北。壬午。遂歷于心。心者。太子宮。子孫危亡之象。先是三十四年。李自成張獻忠生于秦。而自成以八月生。彗之犯秦分也。在其周月。春秋傳曰。美惡之復必周。昔

梁簡文之生。其年與侯景相近。僧寶誌預知之。先皇以三十八年。誕於宮中。爲天地神人之主。豈知飛廉惡來出于米脂。膚施間者。已三四年哉。彗星自萬曆五年起。訖于四十六年。中間凌犯。惟此兩年最大。五年見西南。長數丈。而四十六年。先以九月甲寅。長星見東南。形如疋布。廣尺長二丈。九日而滅。所謂蚩尤旗也。十月乙丑。彗再出于氏。自東南轉指西北。掃太陽守星。入于亢。又漸往西北。掃北斗。天璇。天璣。文昌。五車。逼紫微垣。次月十九日而滅。天意初以譴告人主而不悟。其未載蚩尤旗竟天。斗極微垣。天子之宮庭。而皆掃滅。以見禍患已成。消復亦不可爲也已。其至崇禎十二年十月。復見者。楊嗣昌以是年八月晦。受命督師。十月朔至襄陽。大誓三軍。而彗星卽于其時見。又上以十月。命王紹禹爲河南總兵。後紹禹兵叛。失陷雒陽。嗣昌開縣喪師。襄陽繼破。兩藩遇害。京師之禍。實基于此。天意若曰。彗之掃北斗紫微。今害徵至矣。於戲。可不畏哉。

紫微。帝座。軒轅。前星。太階。文昌。

十七年正月。司天奏帝座下移。

是年十月。紫微無光。

十七年五月。軒轅絕續不常。大小失次。至九十月間乃復。

十七年十月。前星下移四五度。至次年八月乃復。

十三年六月。泰階坼。

十七年。文昌坼。

按帝座有五。北樞、紫微、太微、天市、大角。心中央。皆王者所居之處。當八年九月。熒惑犯太微。占者以太微天子之宮庭。流寇以八年春。犯鳳陽祖陵。燒享殿。天垂象以陵寢不守。賊將入天子之宮庭。及乎帝座下移。則其兆已成。不可爲矣。軒轅者。后妃之舍。主內政。以弼太微。萬歷四十四年十一月。四十七年九月。月再犯軒轅。其時王皇后崩。當至尊。偕周后同殉社稷。而軒轅絕續不常者。上天亦爲之慘動也。太子撫軍監國。不離其位。下移者。爲主器已亡。藩王入繼之象。太階坼。大臣多戮死者。文昌主國之上將。十三年後。武陵、韓城、宜興、三相皆不以令終。寧南、興平、靖南、三將先後死。國家之禍。君后及將相竝受之。天道洵可畏哉。

歲星。填星。彗孛。參。井。亢。

九年。歲星犯南斗。

十一年四月。歲星晝見。

十五年夏。歲星逆行。

十二年十月。填星暈。

十七年二月填失光道。

十二年五月觜宿下移。

十三年十月參足突出玉井。

乙酉四月月入井暈。

是年亢宿坼。

占曰君令逆則歲星逆行。邠萌曰歲星逆行社稷亡。天下兵起。民去其鄉。又歲星主齊魯東吳之國。故梁武天監四年歲星晝見。其後致侯景之禍。先帝時李青山亂。山東吳大饑。海寇大作。是其應也。填星主豫州梁宋。失次者進則失地。退則爲喪。又占曰歲大風。五穀不實。有火災。中原糜爛。天象應之。梁宋實受其咎。參伐七星爲虎尾。觜爲首。共爲虎白。主西方。考古法二十八舍。觜宿列在參前。但觜止半度。形小而近參。易于縮入參度。崇禎中。西人湯若望仰觀推測。適會其時。觜宿入參。故以觜居參後。非謬也。若下移。則又其未縮之時。從參左肩以移之于右。其占爲虎狼食人。又參足突出玉井。其占亦曰虎狼暴害。參觜旣主西方。闖獻恣睢秦蜀。其爲羆貙豺虎。肉視斯民之應乎。月犯井。兵起。人主憂。又曰大臣誅。有破軍殺將。亢主宗廟。其星變。主王者絕嗣。將致宗廟不守。斯非其最驗者歟。

五車。河鼓。天津。搖光。

十三年九月。五車中隱三柱不見。

十七年二月。河鼓坼。

次年天津坼。

十七年。搖光坼。芒角黑青。

五車。天子之兵車舍也。三柱動。則車騎發。崇禎中。朝士勸上修車戰之法。而孫傳庭郟縣之敗。竟以火車致潰。其三柱不見之效歟。巫咸曰。河鼓。金官也。主金鼓。河鼓坼。則金鼓不震。天津。主河梁。石氏曰。天津覆。洪水滔天。自汴梁沒後。河再決于山東。搖光者。北斗之第七星。其名爲應。主兵。又曰。應星色黑。有水。青有徙民。考之皆驗。

狼。天弧。王良。駟房。

十七年十月。狼怒躍。至次年四月。

次年。天弧引滿。

是年策置王良前駟。房動徙。

荊州占曰。狼爲盜賊。巫咸曰。狼星易處。天下大饑。兵滿野。又曰。天弧引滿。天下兵。石氏曰。王良策馬。則天下大亂。兵大起。

營頭。天狗。枉矢。流星。

十七年三月。營頭晝隕。聲如雷。

五月。天狗下尾。長白竟天。

乙酉正月。枉矢東流。衝太陰。

九年六月丙子。夜有星大如斗。色赤。芒耀數十丈。自西南流東。聲如雷。

十四年。高郵湖隕星大如屋。

十五年夏。星流如織。

十七年二月。星隕如雨。

六月後。四川日月無光。赤如血。人仰視北斗不復見。有大星出西方。芒燄閃爍。搖漾不定。是時獻忠屠蜀。賊滅後。其星乃隱。

營頭所墜。有破軍殺將。流血三千里。

天狗下。則四方相射。其君失地。兵大起。

枉矢所觸。天下所伐。滅亡之象。

流星在萬曆中。凡五見。其三十四年五月丁丑。有星自西北流東北。大如盂。赤色有光。是爲李自成生。

于米脂之歲。自西北流東北者。繇秦以入于燕齊之象也。上九年以前。賊中以高迎祥爲闖王。自成特其部曲將。盧象昇祖寬白沙朱龍橋之戰。賊勢已衰。會祖寬兵譁東歸。象昇召入京。功垂成而中廢。未幾迎祥死。餘衆推自成爲主。乘總理無人。橫行無忌。徇約青赤者兵起。此其應也。
天赤如血。

崇禎元年三月二十五日五鼓。全陝天赤如血。巳時漸黃。日始出。

占曰。此赤眚也。主大早有急兵。

是年。白水賊王二反。

日變。

崇禎十年丁丑春正月辛丑朔。日食。免朝賀。

是年春。白虹赤氣貫日。

十一年二月朔。日光摩盪竟日。

是年十一月五日。日中黑子黑氣或青白氣。日入。光摩盪如兩日。

十二年元旦。日白無光。

三日。日光摩盪。若鏡袋噴花。自旦及暮。

五日。日旁青黑氣若戟。東南有白虹。

是年二月十二日。寧遠日變。辰時日兩旁各一白丸。俄日上有白氣。申時有黑氣掩日。忽侵日中。忽從日內墜出。摩盪數次。巡撫方一藻以聞。

十三年九月望。兩日出沒。

十六年十二月朔。日無光。星晝見。

日食不爲災。唯正月朔爲三朝之會。漢惠帝七年正月辛丑朔日食。哀帝元壽元年正月辛丑朔日食。至崇禎十年正月。爲三辛丑朔日食矣。惠帝失政。祿產亂朝。哀帝夭折。王氏篡竊。在明季則有樊並蘇。令奮臂之禍。昔漢臣有封事曰。小民正月朔日。尙畏毀器物。而況天子日月之眚乎。若白虹貫日。日中黑子。兩日竝出。皆亡徵也。

天鼓鳴。

崇禎十年三月。陝西天鼓鳴。

十二年二月。四川保寧府天鼓鳴。

同時二月十七日。易州白石口南城。天聲自北起至南。次日。從東北起至西南。皆晴日無雲。風亦甚緩。其響如雷。又似桴鼓聲。

十四年二月。山西偏頭關天鼓鳴。

萬歷中。天鼓鳴凡五十一見。在京師者一。南京者三。鳳陽祖陵者二。它郡國者四十有四。畿輔則景州、高邑、遵化、易州、紫荊關、遼左則松山、蓋州、寧遠。山東則費縣、登州、館陶、青城。山西則代州、宣大、陽和、左雲衛、臨汾、猗氏、蒲州。陝西則平涼、涼州、固原、甘肅、西寧、金州、西安、洮州。南直則揚州、泰州、鎮江。四川則華陽、豫則河南府。江西則袁州。內西寧見者三。甘肅見者三。易州、遵化、館陶、臨汾、寧夏、皆見者二。京房占人主憂。神祖多歷年所。海內無事。左氏曰。以樂怡憂。其是之謂乎。

崇禎十一年。賊入蜀。破州縣三十有八。今十二年。保寧天鼓鳴。明寇將再入蜀。蜀人屠滅之徵也。易州畿輔要地。偏頭關燕晉阨塞。十四年後。賊由晉入于畿輔。偏頭、寧武。正其所從入之處。故天鼓鳴以譴告之也。

大雨雹。本冰。

崇禎四年五月。大同雨雹。襄垣縣雨雹。大如伏牛。如丈石。小如拳。殺人畜甚衆。

八年四月初八日。漂陽福賢等鄉。雷雨冰雹竝作。晝晦。飛石揚沙。平地盈尺。植物與屋瓦俱盡。

十一年六月二十三日。宣府乾石河山場驟雨。怪風大雹。打死馬騾四十八疋。

九月。順撫陳祖苞奏。境內冰雹爲災。

十二年五月初九日未刻。撫寧縣自靈溝起。東至沙河長不老口。西至榆關。大雨雹。田禾盡。八月白水。同官。雒南。隴西。大雨雹。秦撫丁啓睿以聞。

十四年八月。宣府冰雹爲災。

是年六月。湖廣大風雹。巡按汪承詔以聞。

十六年十月十五日。汝寧光州雨綿如絮。飛田野者殆遍。乾州冰雹大如斛。毀民屋。人。

元年十一月。陝西木冰。壓樹枝盡折。其後大河以北。歲有此異。

萬歷中。京師雹災凡八見。它郡國二十。崇禎時。雨雹止此乎。殺人畜田禾甚者。書之。舉重也。劉向日。雹者。陰脅陽也。君子以小人爲陰。外臣以內官爲陰。四年。溫體仁方用事。正類排斥殆盡。張彝憲以奄宦總三部。晏然受朝覲。諸臣之庭謁。十二年。楊嗣昌在內閣。黃道周成勇被譴呵。熊文燦諂事禁旅。太監劉元斌等。其下大縱掠。陰脅陽者。此其應也。

劉歆曰。上陽施不下通。下陰施不上達。故雨而木爲之冰。天啓中。朱童蒙。喬應甲。皆以貪邪撫秦。元年。秦撫爲胡廷晏。憤眊不治事。故陰陽上下不能通達。以兆木冰。爲甲兵之象也。

風霾。霧。晝晦。

崇禎四年六月。臨潁縣雷風大霾。傾樓拔木。磚瓦磁器墜地無恙。銅鐵者碎。

六年癸酉春正月朔。大風霾。日出兩珥。

九年七月二十日。沔陽州長夏門外居民劉勅甫。白日黑風揭一屋去。柱壁囊橐未動。四隣如故。

十年三月十四日。真定晝晦。大風霾。發屋拔木。巡按李模以聞。

十三年二月二十一日。大名府濬縣等處。東北見有黑黃雲氣一道。忽分往西南二方。傾刻四塞。狂風晝晦。黃埃中有青白氣及赤光。隱隱時開時暗。巡按韓文銓以聞。

是年冬。河南府大風。新安縣都御史呂孔學墓上石碣。吹入雲中。去四五里方墮。

十四年辛巳春正月壬寅。黃霧四塞。日皆無光。

十二月。福建巡撫蕭奕輔奏異風。

十五年七月。保撫揚文岳奏怪風。

十六年正月二日。大風晝晦。五鳳樓前門拴。風斷三截。又風吹建極殿。廡簷椽桷俱折。殿瓦皆碎。

三月二十四日。風霾晝晦。大學士周延儒請急圖防彌。

十七年甲申正月朔。大雨霧。有占風從乾起。主暴兵破城。城未破之前十餘日。風霾大作。自辰至未。止拔去關帝廟前旗杆。琉璃廠大樹。

案萬曆中。京師風霾二十二見。最甚者。四十六年三月庚午。空中有聲如波濤。黃塵蔽天。日色晦冥。將

昏。東方電流如火。赤光照地。少頃西亦如之。又雨濛濛如霧霰。土氣襲人。人主五事皆失。不得其中。則不能立萬事。失在旤悖。故恆風陰以應之。洪範傳曰。厥咎凶短折。厥極弱。時則有下人伐上。光熹二廟。皆短祚。凶短折也。極弱者。貴而無位。高而無民。有南面之尊。而無一人之助。宰相如宜興。井研。皆不爲國盡力。大將如左寧南。跋扈不用命。是極弱也。下人伐上。則寇入京師之徵也。

雷震。

崇禎九年丙子春正月。孝陵雷火。

十二年七月。天雷擊破城鋪樓牆。七丈有餘。木砲擊碎密雲。巡撫趙光抃以聞。

十三年秋七月。雷震襄府門樹。樹有鹽數斗。

三月初十日夜三更。去孝陵寶城十里。長頭楓香樹松樹各一。被雷火霹燒。南兵尙書汪慶百以聞。

十四年閏四月初八日。雷火起薊州城西北。燒至趙家谷。延二十餘里。

六月初二日。雷震宣府西門城樓。火藥沖發。樓遂糜碎。

十五年壬午五月。雷震孝陵樹。

十六年仲夏。大雨沾衣如血。雷霆通夕不止。次日。見太廟神主。或橫或倒。諸銅器爲雷火所擊。融而成灰。六月廿三夜。雷震奉先殿。廟脊鴟吻碎。中有劒削拔去。不知落在何所。廟門玲瓏雕刻處皆損壞。有龍爪。

痕。太監蘇允寧換鴟吻。比前減小。上不悅。降允寧級。

萬歷中。雷擊建極殿、端門、承天門、郊壇、齋宮、祖陵、西華門、太廟槐樹、長陵、明樓、園丘朝日壇、正陽門、社稷壇門。凡十三見。自二十年後。郊社宗廟。以公侯伯代行禮。故天數出變異。以告誡之。先皇親郊者。再宗廟之禮。必虔。常以孝陵地脈侵毀。使成國公朱純臣。禮尙書林欲楫。行視山陵。然則孝陵曷爲乎震。司禮監王體乾。內殿藏主。陳設一不敬。大受譴罰。上自以少失父母。大具儀仗。集百官。迎孝純皇太后。御容入奉內殿。事死如事生。孝之至也。然則奉先殿曷爲乎震。曰前此矣。前此則此何以書。曰天變已成。雖甚盛德。不足以除禍患。故震之也。

地震。

崇禎七年三月初二日。黃州晝晦。明日地震。聲如雷。九月。應天地震。

九年五月。江西臨江府南門城牆陷地二十餘丈。

十年閏四月初四日。雅州地震。

十四日。新鎮地震者二。十六日。又震者二。

同時十六日。馬湖四土司地震者二。又敘州府震。建武所震。瀘州震。越雋衛震。皆同日。是月二十九日。榮縣黃時太家地鳴。聲聞半里。

十二月。太監陳奏地震。

十一年正月。薊鎮總兵王奏地震。

九月。遼東地震。巡撫方一藻以聞。

冬。雒陽地震。

十二年六月。宣府地震。總督陳新甲以聞。

九月。福建地震。巡撫蕭奕輔以聞。

粵西地震。巡按御史左永圖以聞。

十三年二月初十日。鉅鹿縣地震。十二日又震。

六月二十四日。渾源地震。八月初九日復震。

十二月。宣府地震。總督張福臻以聞。

是年。汝寧上蔡地裂。

十四年正月。湖廣地震。巡撫宋一鶴以聞。

二月。福建地震。巡撫蕭奕輔以聞。

四月。天津地震。巡撫李繼貞以聞。

七月二十六日。大同地震者三。

八月。陝西地震。茶馬御史陳羽白以聞。

九月。四川巡按陳奏龍安府地震。

是月。應天巡撫黃希憲奏地震。

十五年四月十五日。山西巡撫蔡懋德奏地震。七月。復奏地震。

七月十六日。萊州府地震。

十五、六、七年。鳳陽地震。連歲不止。其初寶頂中有聲如雷。東西動盪者數十晝夜。而震乃發。鳳陽巡撫田仰以聞。

秦州兩大山。因地震合爲一。其民居兩山間者。數百萬家。皆被壓掩沒不見。

案萬曆四十八年中。京師及郡國地震者二百五十有九。自元年至十年四月相當之。地臣道也。京房曰。臣事雖正。專必震。荊州。居正所居地也。元年荊州連震。七日方止。惡其專且戒以不終也。十一年後。上主之京師十一震。鳳陽二。祖陵二。舉其重則餘可推也。是時鄭妃謀奪嫡。內臣則礦使稅使爲厲。于民。先皇之御相也。常山。華亭。謫戍韓城。宜興賜死。雖以蒲州之定逆案。一取決于御前紅本。而高陽當關。武陵視師。咸奉詔書進止。則無所謂專也。後宮無戚姬如意之嫌。外家無博陸重合之勢。近臣無宏

恭石顯之寵。然卽位之後。反者如蠅起。如黔蜀土司。河南北土寇。閩廣江南海寇。廣東九連山山寇。山東蓮教。曹南武城王沙諸寨。江右密教之屬。無慮數十反。而國從之。周之亡也。山川震。伯陽甫以爲國必依山川。山崩川竭。亡之徵也。十三、四年。黃河水竭。國家本起于淮泗。今祖陵震而河淮幾于涸流。不亡何待。

旱蝗。人相食。

崇禎元年。陝西自四月不雨。至于七月八月。霖雨不止。歲大饑。

七年。河南大旱。

山西自六年八月。至七年四月不雨。永寧民蘇倚哥食父母。

南陽郭廷玉妻霍氏。以母而食女。山西聞喜廣盈里楊雷。以父而食男。又張河圖等十三名。殺人母子而并食。史亡其地云。

九年。山西饑。人相食。

十二年。北京、山東、河南、山西大饑。民掘坑塹。然火以驅蝗。須臾填滿。

四月十八日。會寧縣降旱霜。自春徂夏不雨。

十三年。兩京、山東、河南、山西、陝浙旱蝗。河南北數千里。白骨縱橫。民父子相食。

京房易傳曰。上下皆蔽。茲謂隔。其旱天赤。先皇有治天下之心。相如烏程韓城。壅閉阻遏。俾賢才摧抑。德澤不能下流。此所謂隔也。它占。雨少陰之氣。金也。金爲兵爲刑。刑不辜。兵不戢。金氣毀則不雨。先皇持法太深。秦豫楚山城小邑。被寇失守。爲法受誅者。其不辜爲多。易曰。亢龍有悔。先皇憤中外之失職。盜賊未平。嘗內結于心。心者火也。火勝則外彊中乾。水不潤下。故旱。

京房易傳曰。臣安祿。茲謂貪。厥災蠱。易飛候曰。食祿不益聖化。天視以蟲。蟲無益于人。而食萬物。劉向曰。魯哀公十二年。春用田賦。冬而蠱。虐取于民之效也。崇禎中。如楊嗣昌議增練餉者六百萬。是以田賦虐取于民也。史莖。薛國觀。吳昌時。先後以賄敗。謝秉謙按秦。秦寇已急。而秉謙大以賄聞。是皆無益于人而食物。故蟲災應之。

水災。

崇禎八年冬至。上以寇禍再郊天。費十萬金。威儀視初郊尤肅。先一日。駕幸齋宮。而後端冕入祀。乃內璫之熾炭于地室者太甚。火延及于茵褥。御座爲文皇帝盤龍椅。皆焚。從官有憂色。曰。天不享矣。

十年正月。太監孫奏石塊生火。延燒倉場等屋。

十一年四月。新局火藥災。石板平起空中。民家醬甌移至屋極。醬不動。乘驢過者。人驢飛至半空。驢腸腹潰。而人墮地無損。

六月初二日安民廠災。貼廠太監王甫局官張之秀俱斃。八月又災。

十二年九月二十日京師草場失火。

案萬曆火災凡三十五見。最大者如慈寧宮災。無逸殿災。乾清坤寧宮災。三殿災。孝陵災。御苑龍舟災。

大光明東配殿災。朝日壇房災。正陽門樓災。隆德殿災。易傳曰。上不儉。下不節。孽火燒其室。東漢中平

二年。南宮靈臺災。未幾黃巾亂。流寇之作。卽三殿兩宮火災之應也。安民廠者。以天啓六年王恭廠災

而改焉者也。逆璫施炮烙以鍛鍊楊左諸君子。天啓六年五月朔。人見都城隍廟唱名。後宰門火神廟。紅毯滾出。次前門城樓角。有數千螢火。忽併合如車輪。

至初六日巳時。王恭廠災。震初作。乾清宮御案皆碎。建極殿飛瓦殺人。御史何廷樞潘雲翌被震死。全家墮入土中。自順城門大街北至刑部街盡爲齏粉。有女人衣飾盡而身存。有同伴頭去。比肩無恙。有

從空墜人頭及鬚髮耳鼻。大木遠落密雲。石獅擲出城。若先皇則何爲乎。災曰內操之未罷也。緝事衙

外衣服掛于西山樹杪。銀錢器皿飄至昌平。闕武場中。門如董琨等。則猶許顯純之餘燄也。故火之也。且安民廠所以修守備。其後寇逼京師。砲不置鉛丸。賊

不傷而城已陷。天意若曰。火不炎上。徒以自斃也。

火異

崇禎元年五月。西安有火。大如礮。如斗。色青。光燄尺許。數十礮入人家。用羊豕禳之。嘗畱數日乃去。不分

晝夜。亦不爲民害。至七月中而止。占曰。秦爲德水。水火牡也。火出而妖火入秦。鶉首先災。害及烏帑。豫楚

亦將有咎。

九年。泰山神廟中青龍神口吐火。

是年。丹徒田野火光燭天。

十五年。蘄州樹杪火發。焚其木殆盡。

十六年。正月初五日。大內諸殿眷及各門樓烟起。閣臣皆出。疑有火災。視之冉冉若炊烟而微淡。久而乃息。

齊武帝永明十一年。先是魏地謠言。赤火南流。喪南國。是歲有沙門從北齋。此火至。火赤于常火而微。以療疾多驗。都下名曰聖火。此與今之煙草相類。烹廟時童謠曰。天下兵起。遍地皆煙。未幾閩人有此種。名曰煙酒。云可以已寒療疾。此亦火異也。

刀稍旗竿上火。

崇禎十年。太湖縣楓香店官兵營。刀鎗上火。光閃鑠。砲空鳴。鬼夜哭。時討寇鄭潘陸諸將。全軍覆沒。

十一年。孫傳庭奏西安風霾大作。黑氣冲天。兵刃火燄出現。聽之有聲。

十三年八月。西門旗竿上出火。大如斗。飛落城河。

十四年三月初二日。天津遊擊張國安巡河至趙家場。刀鎗上火星灼灼有光。黑夜列戟如星。巡撫李繼貞以聞。

晉成都王穎與長沙王相攻。隨堯君素守蒲州。唐劉武周據并州反。其兵器皆夜有火光。萬歷中。各邊臺竿有火。凡十五見。其牆子路有火。時風雷大作。綏靜邊堡軍執棍撲之。棍亦生火。孤山堡亦如之。山東撫治令箭及刀鎗頭皆出火。魏書曰。輕民命。好攻戰。則金失其性而爲變。神祖非好戰之主。而先皇用兵。亦有所不得已也。然則火何爲乎作哉。

水災。

十年。河南汝水變味甚惡。飲者多病。

十三年。華陰縣渭水赤。

十五年。四川達州城濠水變爲血。城中井鳴。

十年。蜀劍州大水。先未水一日。沿灘巨石數百。皆反而覆。水至。民登州堂以避者免。餘皆漂沒。黃腸凶具架在民屋。櫛者累累。

水災莫甚于汴梁。以其詳在寇誌。故不書。

鼓妖。

天啓七年丁卯八月。上卽皇帝位。南面正位。將就寶座。而大聲發于殿之西。若天崩地塌然。仗馬皆驚。百僚震恐。上亦爲之悚動。識者曰。西方其有事乎。此鼓妖也。

崇禎七年七月。絃州母猪龍洞銅鼓聲聞。一日夜。是年。蕭縣北山鳴。明年。又鳴者再。十一年十一月。山又鳴。十二年十二月十三日夜。西山復鳴。如雷如風如濤。連日夜不止。

九年十二月。鎮江金鷄嶺土山崩。聞有神言。

十年。鍾山鳴。似虎哮吼。

三月。會稽山石言。聲如鐘。

十二年巳卯二月初一日。蘄州州署有石銃。十一門自震。堂瓦崩頽。署州事李色鮮將火藥傾出。移出堂前空地。復于三月初一日自震。煙火冲天。堂柱亦自起火。

十三年。杭州城門夜鳴。

三月十五日。蘄州城隍廟古鐘。不擊自鳴。

十五年。鐵礮自鳴。

十六年冬。建極殿。鴟吻中有聲。似鶉鳩。曰苦苦。其聲漸大。後作犬吠聲。三日夜不止。

十七年二月。大學士魏藻德。夜聞刀兵之聲入其寢。三月初。舉家聞哭泣。

晉文公殯于曲沃。柩有聲如牛。劉向以爲怒象也。將有急怒之謀。以生兵革之禍。漢相朱博受策。有聲如鐘。楊雄以爲聽失之象也。李尋以爲人君不聽。爲衆所惑。空名得進。有聲無形。不知所從生。先皇性

疆毅多權謀。數有亟疾之怒。卽位之後。宰相周延儒楊嗣昌等以空名得進。後皆不終。此鼓妖之應也。春秋傳曰。怨讟勤于民。則有非言之物言。山鳴近石言也。宋災。先有叫于太廟者曰。嘻嘻出出。今殿檁龍尾間。如鳥鳴苦苦。上位不安。宮室將空之象。京房易傳曰。令不修本下不安。金母故自動。若有音。天寶十年。大同殿鐘自鳴。占曰。庶雄爲亂。先皇發號施令。未循其本。下有怨叛之心。起而爲亂。此物自鳴之應也。

言妖。

萬歷末年。有道士歌于市曰。委鬼當頭坐。茄花遍地生。北人讀客爲楷。茄又轉音。魏客之兆也。

崇禎元年。五鳳樓前。獲一黃袱。內襲小函一卷。題云。天啓七。崇禎十七。還有福王一。清晨內侍得之。奏御。上命巡視皇城各官推究。科臣奏。以此必奸人所爲。一加推究。必有造訛立異。簧鼓聖聽者。上可其奏。立命火之。

十年。上過宮中一祕殿。老閣以此先朝所封。戒勿動。上命啓之。得古畫數幅。有一人帶進賢冠者。七。曰。官多法亂。有數十人隔河對泣。曰。軍民號泣。妄男子得傳聞。形之章奏。上亦弗詰。人乃以爲信。

上好察邇言。有人詣通政司投疏。謂年號宜用古字作密。蓋以山壓宗故不安。從古文則宗廟安于太山也。人以爲妖言。

十七年正月。沅州銅仁連界處。掘出一古碑。上有字二行云。東也流。西也流。流到天南有盡頭。張也敗。李也敗。敗出一個好世界。

成都東門外。沿江十里有鎖江橋。橋畔有迴瀾塔。萬歷中。布政余一龍所修。張獻忠破蜀後。登塔見成都城池宮殿曰。此不利于城。命毀之。修築將臺。穿地取磚。至四五丈。得一古碑。上有篆書云。修塔余一龍。拆塔張獻忠。歲逢甲乙丙。此地血流紅。妖連終川北。毒氣播川東。吹簫不用竹。一箭貫當胸。漢炎興元年。丞相諸葛孔明記。後獻忠以一箭死。迺知簫不用竹。乃肅字也。

明初有十八子之讖。成化中有李龍子者。結一中官。入宮中謀不軌。事發伏誅。讖者以宋太祖取淳風舊本。亂其次第。李繼朱者。乃李亞子繼朱梁之讖也。流言訛僞。宋獻策李巖以此鼓惑。中原復倡爲開城門。迎闖王。迎仔闖王不納糧。令軍中傳歌之。故河北逐其長吏以迎賊。

河北之謠曰。鄴臺復鄴臺。曹操再出來。賊羅汝材自號曹操。而天下大亂。

武昌未破前一月。有異人呼于市曰。一羣豬。屠伯至矣。楚宗最橫。遇亂亦最酷。

萬歷末年。民間好葉子戲。圖趙宋時山東羣盜姓名于牌而鬪之。至崇禎時大盛。其法以百貫滅活爲勝負。有曰闖。有曰獻。曰大順。初不知所自起。後皆驗。

傳曰。言之不從。厥咎僭。時則有詩妖訛言。自陳啓新以淮安武生。驟用口舌得官。而張漢儒、陸文聲、希

相溫微旨告密。以起黨人之獄。易曰。以訟受服。相溫有焉。書曰。讒說震驚朕師。漢儒文聲有焉。詩曰。如蜩如螗。如沸如羹。公卿臺諫無通經術持大體者。故妖書起之于前。閣訟繼之于後。四方奸人亡命。爭上書闕下。而言之僭差。夫亦甚矣。此言妖所自起也。

草妖。

崇禎四五年。河南草生戰鬪狀。有人馬形。皆若被甲持矛。馳驅糾結。亂乃大作。

七年。河南孟縣民孫光顯祖墓。在河陽驛之東。有葡萄草。夏抽新條。條列萬狀。有美人者。達官者。爲龍鳳。爲龜麟。爲雀魚蛇鼠。爲蟬。爲孔雀鸚鵡。道臣曹應秋取得三美人。一鳳一鸚鵡。美人黃衣白裳。面施粉黛。鳳苞羽。五采鸚鵡。栖干架。架上有蓋。蓋中有粒。點染生動。善畫不及也。其連陌王氏黨氏塋所產皆同。有一草而枝蔓出二塋外者。卽與凡草無異。蓋妖徵云。

十六年。有商人自山東載花豆渡淮。及出賣。如人首然。耳目口鼻咸具。

十七年。太倉邑紳知臨川張采家。李生黃瓜。采嘆曰。古語云。李生黃瓜。民皆無家。亂其至矣。旣而采亦幾及于難。

占曰。王德將衰。下人將起。則有木生爲人狀。草亦木類也。漢安帝中平元年夏。東郡陳畱濟陽長垣濟陰冤句縣界。有草莖壘腫如手指。爲雄雀龍蛇鳥獸之形。五色各如其狀。毛羽頭目足翅皆具。是歲黃

巾賊始起。夫草民象也。盜賊則惡草之宜除。今以去惡之弗盡。枝蔓爲妖。其驗爲李自成之僞署置百官。猶草之面目衣裳如人狀也。僞號改年。猶草之龜麟龍鳳自以爲祥也。天意若曰。彼雖覲然人面哉。何草不黃。將失其潰茂。以無煩尋斧。此狂花妖木之不若者也。神祖好用商人採辦。每進黃封御廂內。有八寶嵌成蝦蟇蚱蟻等物。廂開則藏機發。跳躑滿地。上大笑。賞賚不貲。此蟲妖也。閩帥好以寶樹餉督撫。按諸臣以金爲枝幹。花葉用異寶緝成。五色備具。視之如真。一株以數萬計。熊文燦得之。以貽京師。權要此木妖也。

服妖。

崇禎中。朝臣好以紗縠竹籜爲帶。取其便易。詩曰。匪伊垂之。帶則有餘。傳曰。帶其褊矣。金銀貴而重。紗籜賤而輕。改而從之。賤將乘貴。重者爲輕。帶其褊而將盡之象也。

上餞李建泰于正陽門。建泰頓首拜謝。印綬花怒張如斗。同官謬賀。此取金印如斗象也。識者以爲不祥。百官冬朝戴貂煖耳。陳啓新詭示其貧。以布作裙。君子曰。煖耳中下者無甚價。且禮亦可以弗着。啓新近臣。虧班聯之體。以羞朝望。且近于詐。非禮也。北方小民製幘低側。其簷自掩眉目。名曰不認親。其後寇亂。民散。途遇親戚。有飲泣而不敢認。有掉臂而不欲認。一以畏人避罪。一以自爲寡恩。先見之于首服焉。京師婦女宴會出遊。好賃蟒服于質庫。乘車去。弗不避呵殿。視其衣交龍燦然。亂上下之序。溷肴無別。臺

諫以爲言。然終莫能禁。

松江士大夫好着縑巾。屋其上而廣之。前後施幅。武垂于肩。雜以組紉而紕其旁。緣其下。此武士巾也。其有期功之喪。別綴白條于其上。有兵喪之象。常熟婦女。裳下齊殺。爲襜積者百而絳之。與衰服無異。人皆以爲凶徵。無錫一孝廉。嘗衣短衣不蔽膝。巾紫色而朱帶雙垂。自首以屬于要。金壇一公子跛而陋。好施粉黛。弓其足爲婦人裝。晝必寢。其見客也。常以夜。後此兩人皆以凶終。

曹風之詩曰。蜉蝣之羽。衣裳楚楚。百年以來。世室豪家。侈汰已甚。飲酒則載號載呶。歌舞則獲雜子女。其風始于江漢宛雒。而被于吳越。上屢下詔。以寇盜災荒。士大夫狃承平餘俗。欲身率天下以儉。而終不改於戲。有葛屨履霜之心。而不能變羔裘逍遙之習。詩人刺共公之好奢。而謂不稱其服者。其咎在上也。春秋戒子臧之身災。而謂服之不衷者。其咎在下也。

濫音。附見。

兵未起時。中州諸王府中樂府造絃索。漸流江南。其音繁促悽緊。聽之哀蕩。士大夫雅尙之。又江南人多唱掛枝兒。而大河以北所謂夸調者。其言尤鄙。大抵男女相愁離別之音。糜細難辨。自此以後。政事日蹙。情態纖迫。兵滿天下。夫婦仳離者。不可勝計也。

物異。

上嘗御乾清宮。空中墜一鶴。頸穿一箭。至地猶飛鳴。俄而鶴死。

上乾清宮後廡有青霞居。遊藝齋。皆陳設寶玉重器于御几。物竟自移彼此。互易其處。或顛倒雜亂。失而復得。守者懼得罪。伺之。見御榻重茵中有溺而旋者。狐毛零落。其氣尚溫。迺知向者狐怪也。

崇禎六年二月。建昌民家生豕。一首二身。八蹄二尾。

十五年七月。聊城縣民馬中杰家生豕。一首二尾七蹄。五行傳曰。聽之不聰。時則有豕禍。萬曆中。豕禍七。天啓秦楚皆豕妖。有長喙人足而一目者。是年悞用陳奇瑜爲總督。因撫失賊。聽不聰之效也。

六年冬十月。莎鷄數萬集于襄城。山西河北賊南渡河。澠池陷。十五年冬。團風鴨蛋洲有飛雀萬餘。投蘄州南城濠。後張獻忠破武昌。從鴨蛋洲渡。此比之鸚鵡來巢。爲羽蟲之孽。近黑眚也。黑色義主急。有飛鳥之象焉。

六年十月。汝寧有鳥。鳩身猴足。晝飛有聲。時流寇渡河犯汝。至十年。此鳥復見于上蔡。案本草。此鳥名曰寇雉。出主兵亂。

六七兩年。鳳陽出惡鳥數萬。兔頭鷄身鼠足。人取供饌甚肥。但犯其骨立死。

七年。大同牛疫。號噉以數千。十三年。襄陽春山鄉獲牛犢。兩頭二目。京房易傳曰。牛生子二首一身。天下將分之象。又曰。牛少者穀不成。萬曆中牛禍五。皆二首。或作人狀。天啓間。沅陵牛犢二首一目三尾。竝亂徵也。上是年。李自成從車箱峽佚去。寇禍以不解。山西河南大饑。

七年寧夏鼠害稼銜尾食苗者十餘萬。十二年黃州鼠食禾渡江五六日不絕。傳曰鼠盜竊小蟲晝伏夜匿害稼者貪邪小人竊祿位而寇盜以滋生也。萬歷四十四年後應天鼠渡江者三皆銜尾萬餘。天啓陝西鼠怪狀若狸長廣尺餘無足兩肉翅足在翅中剖之腹有升黍妖在秦者秦將有鼠盜寧夏延綏鼠害稼者皆秦分也。渡江而以黃州者張獻忠破武昌之應也。又上內殿奏章房多鼠盜食與人相觸而不畏。十七年元旦後鼠忽屏跡寇入奏章盡焚。易飛侯曰鼠羣居不穴君死國亡。它占曰鼠無故夜去邑有鼠近黃祥也。

秦州關山中老鼠化爲鷓鴣者以數千計。

九年十月朔淮安新城東門民家牝鷄振羽啼躍而化爲雄。

十年京師宣武門外斜街民家白鷄羽毛鮮好喙距純赤重四十觔慈谿孝廉應廷吉見之愀然曰此鷄也所見之處國亡萬歷三十六年靖邊營軍人家鷄雌化爲雄五行傳曰不鳴不將無距者事不成今鷄則鳴將有距矣。上是年寇患已大成故鷄禍也。

十年三四月錢塘江木柿化爲魚漁人網獲中有首尾未變者木如故。

十三年德安府天雨魚。

十四年楚府貓犬流淚有哭泣聲。

十四年。太倉衛指揮姜周輔家鷄伏子。兩頭四翼八足。揮使亦勳舊也。衛將廢。厥災見于其家。
十五年二月。羣鼠渡江。晝夜不絕。

十五年。金縣田鼠殘食夏秋禾苗。巡按李悅心奏。又隴西縣田鼠灰黃白色。咬傷麥穗。
十五年八月。延綏定邊堡。妖鼠產于蝦蟆腹中。一產數十。遍二三百里。食禾稼皆盡。

門牡自開

崇禎七年。太康縣門牡自開者三。知縣事許某。集邑紳議其事。屋梁墜。知縣死。

妖辭曰。關動牡飛。辟爲無道。臣爲非。厥咎亂臣謀篡。漢成帝元延元年。門牡飛。谷永以爲郡國傷災。黎庶窮困。而有司奏請加賦。城關守國之固。固將去焉。故牡爲之飛。今太康。古夏陽也。爲楚漢相距地。鞏維汝潁之通衢。是年寇旣渡河。郡國日亟。軍興而災害竝至。牡飛邑屋自壞。明汴維皆失其固。而棟折榱崩。民將壓焉之應。

疫

崇禎十六年春。京營巡捕軍。夜宿碁盤街之西。更初定。一老人囑曰。夜半子分。有婦人縞素涕泣。自西至東。勿令過。過者厄不淺。鷄鳴則免矣。吾乃土神。故以告也。夜半婦果至。軍如所戒。不聽前。五鼓偶熟睡。婦折而東旋。返蹴邏者醒之曰。我喪門神也。上帝命我行罰此方。若何聽老人言。阻我災。首及汝。言畢不見。

邏者懼奔歸告家人言未終仆地死。大疫乃作。七月二十九日從駙馬鞏永固請發御前銀一千兩合藥施病者再發二萬兩令五城掩埋。十六年舉場左右人鬼錯雜薄暮人屏不行一時貿易多得紙錢乃置水投水有聲則錢無聲則紙大疫定後乃已。

江南自京口起江陰無錫止民曉起或以黑圈記其門或釜底畫一梅一夜殆遍。

先是河北傳一小兒見人白而毛逐之入廢棺中發財白毛飛空幾滿俄而疫大作名曰羊毛瘟江南漸傳染民相戒曰無食茄食者必病既而驗之以手折茄中分之輒有一羊毛斷之以刀則無有此白膏也。公羊傳曰大災者何大瘡也何休曰邪亂之氣所生先王設疾醫掌萬民之疾病又索鬼神而祭禱之以其時埋醜掩幣無弗蓋藏故民得考終厥命今兩河暴骨弗收惡氣蘊崇而爲疫羊金也金氣傷故羊禍轉入于疾病此其徵也其時又有書籩籩三字于門者相傳亦係釜底朱書故民爭效之是書也道藏中固以解疫生民短折人主不能救而天救之非其彰彰者乎。

人鬼之異

崇禎二年己巳淞江莫翁無子有一女嫁于李氏夫婦初相得後其夫漸不內御有隣女學刺繡于莫氏而同寢俄有孕詰問得其情訟之太守案驗果有之乃命莫氏歸而娶此女爲妻守斷詞曰莫翁無子而有子此女無夫而有夫郡人無不見之有欲上聞者莫固舊族恐以妖妄及禍固請乃已。

十五年冬。山東婦人生一物。雙貓首。首有角。角之顛有目。身如人。手垂過膝。巡撫陳以聞于朝。嘉定有一男子無家室。忽腹大面黃。人以爲蠱。其隣夜聞呼喚聲。生一男。將執以聞之官。其人抱遯去。不知所之。

十二年。蘄州各街道。每夜鬼哭咆哮。聞之有聲。逐之有影。

十五年。蘄州有鬼。白日成陣。牆上及屋脊行走。擲揄居人。城遂陷。

十六年。上將祭廟。鹵簿已設。忽見黑氣自空而墜。如有婦人白衣者疾飛入宮。軍人皆見之。是年人見太廟中。鬼皆嘯呼而出。

赤眚。黑眚。

崇禎七年甲戌二月。海豐雨血。

七年。黃梅縣天雨。黑子如栗。

八年八月。宣城池中出血。

十年丁丑八月。黃州天雨蟲。色黑大如菽。蠕蠕動。食苗俱盡。

是年春。北地紅雨。

八月。山東雨血。

十一年。新鄉雨黑水。

十二年。黃州城南門流血五日。又太倉岳王市地湧血。

十五年。青浦東門外河內一石。又灘上一石。又諸生楊家柱礎。皆湧血。不出三月之內。

蜀劍州民家。有滴血污其門。城中數萬戶皆同。

十一年。都市黑眚似飛霾。民大擾。

十六年。京師黑眚見。宮中常見如豕如犬者。黑色行作鬼聲。

癸未年。松江繡野橋雨血。

梓慎有言曰。赤黑之祲喪氛也。京房曰。臨獄不解。茲謂進非。厥咎天罰。故天雨血。傳曰。蟲從天而墜。其

國兵災竝起。劉向曰。刑罰暴虐。貪饕無厭。則天雨蟲。

天雨麥。雨毛。地粉。

崇禎丙子年。松江繡野橋雨毛。

十三年。雨麥于吳郡。

關中渭南縣。天雨蕎麥。

十四年。江南池河守備高策銓報于廣武衛之龍山。英武衛之小橫。土中變成紅綠白三色米粉。軍民取

以充饑。取者日數千人。名曰觀音糧。

穀梁傳曰。著于上。見于下。謂之雨。夫十三四年。大無麥苗。以無雨也。無雨而雨麥。則何以爲雨說哉。變而爲粉。其異也滋甚矣。

陵哭。城愁。神像有淚。

鳳陵未災前。有遙見陵中二人。一衣朱。一衣青。歐擊甚苦。尋聞號泣聲。乃集數十人持杖入。惟二犬踉蹌走。無何寇至。

崇禎十五年後。鳳陽祖陵。悲號震動。三年不止。

十七年。南京孝陵夜哭。

十四年。嘉興城聲震如裂。時稱城愁。

十六年癸未。□州城南門哭五日止。

六年。曲阜縣孔子廟聖像兩目流淚。如汗。三日夜。

十五年十一月。黃梅孔隴鎮地藏菩薩日出淚。一縷循鼻而下。拭而復出。十二月二十三日。城陷。

陵異止此乎。曰賊將王克生、僞揚武知州張聯奎、謀發獻陵。風雷大作。被擊而死。則不啻主于哭也。城異止此乎。曰十七年十一月。滎澤縣東十里。平地忽現一城。雉堞井幹皆具。久之始沒。幾同影國。則不

止于聲也。神像之異止此乎。曰。五皇子之薨。慈聖李太后憑而告者。數千百言。自稱九蓮菩薩。則在天之靈。不止像也。嗚呼。異矣。

